

**NATIONAL ASSEMBLY OF
SEYCHELLES**

Tuesday 12th October, 2021

The Assembly met at 09am

National Anthem

Moment of Reflection

Mr Speaker in the Chair

MR SPEAKER

Bonzour tou Manm Onorab e bonzour nou piblik a lekout. Byenveni pou en nouvo travay lasemenn. Nou a konmans avek *Presentation of Papers*, Madanm Clerk.

MADAM CLERK

Mersi Mr Speaker. Mersi Mr Speaker. Bonzour Mr Speaker. Bonzour tou bann Manm e tou dimoun ki a lekout.

Bann Papye ki pe ganny prezante i *comme swivan*;-

S.I, 93 of 2021 Land Reclamation Order - Alderic Benoit 2021.

S.I 94 of 2021 Land Reclamation Order - Marie Jeannette Come 2021.

S.I 95 of 2021 Employment (Declaration for Distribution of Employment Benefits upon Death) Regulations, 2021.

S.I 96 of 2021 Privileges and Immunities of Dignitaries (Amendment of Schedule 1) Order, 2021. Mersi Mr Speaker.

MR SPEAKER

Mersi Madanm Clerk. Nou annan *Public Bills of First Reading* Madanm Clerk.

MADAM CLERK

Mersi Mr Speaker. *This Act may be cited as the Cybercrimes and Other Related Crimes Act 2021 and shall come into operation on such date that the Minister may by notice in the Gazette appoints.* Mersi Mr Speaker.

MR SPEAKER

Mersi. Avek sa nou a pas lo sesyon kestyon. E mon ava demann madanm raporter pou apel Minis ek son delegasyon silvouple.

Bonzour e byenveni Minis Dr Justin Valentin, Minis pou Ledikasyon. E byenveni osi Mrs Odile Decomarmond, *Principal Secretary* pou *Education Services*.

E Mr John Lesperance *PS* pou *Education Sector Development*. Mersi pou zot partisipasyon pou reponn kestyon bann Manm. Premye kestyon i pou Onorab Richard Labrosse.

HON RICHARD LABROSSE

Bonzour Mr Speaker. Mersi pou donn mwan laparol. E avan mon demann mon kestyon, mon ti a kontan dabor Minis, vi ki i la dan Lasanble, pou mon remerci bann ansenyan Lakres Plaisance Primer pou donn mwan sa loportinite, pou partisip avek mwan sa lannen dan Lazournen Alfabetizasyon.

Kot ansanm nou ti zwenn ek Lotorite Distrik, nou ti organiz en aktivite. Apre sa nou ti zwenn bann zanfan ki sorti Plaisance, nou ti kapab ganny en pti konversasyon ek zot Manm Lasanble.

Mon kapab dir ou sa bann pti manmay zot annan en bon pti pe kestyon, zot lespri i vreman avanse.

Apre osi mwan ti a pe osi profite Minis ler ou la, pou remerci Lekol Plaisance Segonder, pou donn mwan ansanm avek Onorab Vidot sa sans pou Lazournen *Teachers Day* kot nou ti ganny sans pou devwal plak lekol.

E sa ankor i montre langazman Minister ek bann Leaders dan distrik. San tarde Mr Speaker, mon al lo kestyon 92 lo *Order Paper*.

Minis, swivan bann nouvo fason fer dan sa moman

epidemik e lefitir, ki plan ek fitir Minister Ledikasyon i annan konsernan laprantisaz pou bann zanfan dan lakres?

MR SPEAKER

Mersi Onorab. Minis ou larepons silvouple.

MINISTER JUSTIN VALENTIN

Mersi Mr Speaker. Bonzour Mr Speaker. Bonzour tou Manm Lasanble e tou bann dimoun ki pe ekout nou lo bann diferan medya.

Mr Speaker i touzour en plezir pou mon vin devan Lasanble pou mwan reponn bann kestyon, bann Onorab, koumsa nou a ganny en bon, en pli bon leklersisman lo ki pe pase dan ledikasyon - sistenm ledikasyon dan Sesel.

Devlopman dan bann diferan nivo skoler dan lekol Leta ki osi enkli lakres, anliny avek reform dan laklas ki nou'n lanse.

Plan lefitir Minister Ledikasyon se servi sa platform lotonomi, pou ankouraz bann tim gouvrenans e zesyon dan sak lekol pou reflexir e propoz bann solisyon lokalize.

An se ki konsern laprantisaz, Minister Ledikasyon in deza lans en platform anliny avek *Teacher Management and Development*

Policy ki donn bann ansenyan en lavwa.

A ‘*school-based teacher forum*, pou anmenn bann propozisyon dan sa direksyon. Nou pou elev standar e konpetans *SITE* pou prevwar formasyon kontini pou bann ansenyan, enkli ansenyan lakres pou zot pli byen kapab prepar zot travay pou zot kapab travay avek bann zanfan.

Nou lanfaz konmela i aprantisaz prezansyel, osi byen ki laprantisaz par zistans. Mersi Mr Speaker.

MR SPEAKER

Mersi Minis. Onorab siplemanter.

HON RICHARD LABROSSE

Mersi Minis pou ou larepons. Mr Speaker mon ti annan 2 kestyon siplemanter. Mon premye kestyon Minis, mon ti ava kontan konnen ki dernyen fwa ki Minister zot ti fer en evalyasyon lo bann *curriculum*, sa depi lakres ek primer.

E dezyenm kestyon, i konsernan kot *quality audit* pou bann *teachers* ek lesan li menm ki ganny delivre dan lekol, ki bann kalite li menm ki zot pe rode. E si i annan okenn odit osi lo sa laliny ki’n deza ganny fer? Mersi.

MR SPEAKER

Mersi Onorab. Minis.

MINISTER JUSTIN VALENTIN

Mersi Mr Speaker. Mersi Onorab pou ou kestyon. Evalyasyon lo *curriculum* ti ganny fer an dernyen, ti ganny fer an 2013, dapre bann lenformasyon ki mwan mon annan.

E bann odit ki fer kot lekol par tim lenspekter ki tonm anba SQA, i get tou laspe edikasyonnel. E annefe tou laspe kot en lekol.

Byensir i pou vwar si sa ki Minister Ledikasyon i anvi enplimante e si sa bann lekol pe enplimante. Me parey mon dir, i annan nouvo *landscape* ki pe devlope dan lekol.

Kot bann tim gouvrenans e bann tim zesyon lekol, pou osi pran en pli gran rol dan proses devlop zot lekol. Alor nou ekspekte ki i annan bann serten sanzman dan fason evalyasyon.

Me tout an prenon kont ki nenport kwa ki nou fer, nou pou bezwen mentenir bon konpetans, mentenir kalite, evantyelman lev standar laprantisaz e lansennyman. Mersi Mr Speaker.

MR SPEAKER

Mersi Minis. Onorab Labonte, kestyon.

HON ANDY LABONTE

Mersi Mr Speaker. Bonzour Minis avek ou *panel*. Minis mon kestyon i plito baze lo en evalyasyon. Nou konnen poudir, si mon pa - *if I am not mistaken, preschool* li menm li i pa obligatwar.

Me selman nou konnen poudir i annan en evalyasyon ki pe ganny fer, sirtou avek bann *preschool* lo kote prive, ki pe ganny fer avek zanfan, avek bann zelev avan ler ki zot al dan *P1* - dan premye parey nou dir.

So ki lenpak oubyen ki zot vreman kolekte, ki lenformasyon vreman zot konekte pou zot kapab deside oubyen pran en desizyon, ki sa manrmay i vreman, i kapab komans son *primary 1*?

Akoz i annan konsern la deor ki i pa kler pou sa bann ansenyan oubyen sa bann *owner preschool*, ki kalite lenformasyon ki zot vreman pe kolekte? Mersi.

MR SPEAKER

Mersi Onorab. Minis.

MINISTER JUSTIN VALENTIN

Mersi Mr Speaker. Mersi Onorab pou ou kestyon. Me selman mon pou demann en

klarifikasyon, eski ou pe koz lo *day care* ouswa ou pe koz lo lakres?

HON ANDY LABONTE

Mon pe koz lo lakres.

MINISTER JUSTIN VALENTIN

Mr Speaker mon pou les *PS* eksplike, apre mon pou azout en keksoz. Mersi bokou.

MR SPEAKER

Mersi. *PS* ou annan laparol.

PS ODILE DECOMARMOND

Mersi Mr Speaker e mersi *Minister*. Onorab pou le moman la, i annan evalyasyon ki pe fer lo nivo *day care*, pou regarde si bann zanfan i pare pou antre dan lakres, ki nivo zot ete.

Akoz i annan en profil ki zot ranpli, pou get zot nivo preparasyon pou antre dan lakres. Lo nivo lakres, pou le moman la, i annan bann sesyon *familyarizasyon* ki pe fer.

Savedir an preparasyon pou zot antre dan *P1*. Letan zot in ariv dan *P1*, dan premye trimes, la nou fer sa evalyasyon, aköz nou fer li letan zot in ariv dan *P1*, aköz i annan zanfan dan diferan landrwa ki pe veye.

E nou pa pe *capture* tou sa zanfan. Savedir letan zot in antre dan premye lannen, dan *P1*, sa premye trimes, nou fer sa

evalyasyon pou regard en pti pe zot nivo. E i annan en profil osi ki nou ranpli, pou regard en pti pe dan diferan domenn, ki nivo zot pare pou zot swiv zot P1. Mersi.

MR SPEAKER

Minis ou ava azoute.

MINISTER JUSTIN VALENTIN

Mersi Mr Speaker. Onorab evalyasyon dan sistenm skoler i toultan enportan a tou nivo. E pou en paran byensir, pou tou lezot paran, i nesese konnen, a nenport moman, kote mon zanf an i ete.

E sa evalyasyon par egz anp ki pe ganny fer, i annan enn ki pe ganny fer spesifikman dan *day care*, parey ou dir, se pou etabli en nosyon lo kote bann zanf an i ete a en moman ki i komans lekol.

E pou nou bann dan ledikasyon, e mwan an partikilye ki kontan evalyasyon, ki konpran akoz nou bezwen evalyasyon, i permet ou swivre en zanf an pou ou konpran son progre e pou vwar a ki moman petet i bezwen bann lentervansyon spesifik.

Levalyasyon, evalyasyon, se ki i pa neserman ganny abize. Ler mon dir abize, tro bokou i bon. E i pa en fason pinisyon, me i en fason pou en

edikater. E menm paran kapab swiv devlopman son zanf an o firamezir ki i progrese. Mersi Mr Speaker.

MR SPEAKER

Wi Onorab Labonte, Onorab.

HON ANDY LABONTE

Mr Speaker. Mersi Minis, PS pou ou larepons. En pti kestyon siplemanter. Annefe egzaktaman sa ki mon ti oule konnen.

PS in met li byen. Me selman i zis ki mon pou mwan prezan al lo mon kestyon final plizoumw en. Akoz i annan *day care* ki si sa i korek ou kapab konfirman la, oubyen si i pa korek ou kapab konfirman;-

Eski i annan *day care* ki ler zanf an i sorti laba, i ganny demande pou li repet lakres, akoz i pa ganny aksept e, senpleman petet akoz dan sa *day care* i pa ti pe aprann Kreol, i ti pe aprann zis Angle. Eski i egziste sa, oubyen i pa korek? Mersi Minis.

MR SPEAKER

Mersi Onorab. Minis.

MINISTER JUSTIN VALENTIN

Mersi Mr Speaker, mersi Onorab. Mon pa'n tann sa komanter. Mon pa okouran sa

deklarasyon ki pe ganny fer.
Mersi.

MR SPEAKER

Onorab Esparon.

HON REGINA ESPARON

Mersi Mr Speaker, bonzour Minis ek ou delegasyon. Mr Speaker eski Minis i kapab eksplik mwan, sa program ki Onorab Labonte ti pe koz lo la i sa *early learning readiness* ki ganny fer dan *day care* avan ki i al lakres.

E sa enn ki Minister Ledikasyon pe koz lo la se sa *tracking and monitoring performance* ki zot fer, eski sa 2 program i annan en lyen ek kanmarad?

E dan ka kot evalyasyon in ganny fer, dan ka kot i annan problem ki ganny detekte, ki kalite program *follow -p* ki i annan? Mersi.

MR SPEAKER

Mersi Onorab. Minis.

MINISTER JUSTIN VALENTIN

Mersi Mr Speaker, mersi Onorab pou ou kestyon. Sa 2, pou sa 2 *form of* evalyasyon i pa neserman parey, me i ekivalan. Akoz tou lede pe etabli serten konpetans kote kot zanfan i ete.

E a sa moman dan lakres, i pa pe neserman pe rod lentervansyon pou li kapab, pe rod lentervansyon, me nou pe etabli kote nou ete. Akoz zisteman lakres pou komans en programm avek zanfan.

E i pa fer diferans si ou par deryer oubyen ou par devan. Lesansyel sa se konnen kot ou ete, le moman kot nou pe komans sa programm formel. Mersi Mr Speaker.

MR SPEAKER

Mersi Minis. Bon si napa lot siplemanter lo la, nou a pas lo prosen kestyon, e sa i kestyon 99 ki'n poze par Onorab Kelly Samynadin e Onorab Sandy Arissol pou poz son kestyon pou li dan son labsans. Onorab Arissol.

HON SANDY ARISSOL

Mersi Mr Speaker. Bonzour Mr Speaker. Bonzour Minis avek ou delegasyon, tou Manm a lekout e tou bann dimoun Au Cap ki pe ekoute.

Mr Speaker kestyon Onorab Kelly pou Minis Ledikasyon *MNA* pou Au Cap i lir koumsa;-

Avek bi pour retir presyon dan bann lekol ki sitye dan rezyon lavil, tout an prenon kont sityasyon *zoning* aktyel e bann mezir met an plas par

Minister Lasante kont pandemik *Covid-19*, eski Minis pour Ledikasyon i kapab eksplik sa Lasanble:

(1)Ki sityasyon *zoning* dan bann lekol Leta atraver pei?

(2)Ki bann lenkonvenyans ki bann lekol sirtou dan lavil pe rankontre par rapor avek program *zoning* aktyel?

(3)Ki nouvo plan lonterm e kour term ensi ki bann nouvo mezir, ki Minister Ledikasyon i anvizaze an sa ki konsern program *zoning* afen pour asire ki bann paran i respekte sa Polisi? Mersi Mr Speaker.

MR SPEAKER

Mersi Onorab. Minis ou repons.

MINISTER JUSTIN VALENTIN

Mersi Mr Speaker. Mersi Onorab pou poz sa kestyon lo non Onorab Samynadin. Premye kestyon, ki sityasyon *zoning* dan bann lekol atraver pei? Mr Speaker *zoning* i en provizyon dan Lalwa Ledikasyon.

An zeneral sistenm *zoning* pe mars byen. Parkont nou rankontre difikilte an se ki konsern demann pou *exemption from zoning*.

An se moman i annan en total 622 etidyan dan primer e 349 dan segonder, depi Zanvye

ziska Oktob ki pa pe al lekol dan *zone* respektif.

Bann lekol dan rezyon lavil, tel ki Mont Fleuri, Bel Eau, Plaisance, English River e La Rosière, i bann lekol ki annan pli gran nonm etidyan an deor zot *zone*.

Dan Sid Anse Royale primer e segonder, ki osi annan en gran nonm etidyan ki pa dan son *zone*. Bann demann pou *exemption* i ganny regarde ka par ka.

Ki bann lenkonvenyans ki bann lekol, sirtou dan lekol lavil pe rankontre par rapor avek bann program *zoning* aktyel. Mr Speaker bann lenkonvenyans ki bann lekol lavil i rankontre, i sirtou pou sa bann lekol ki nou'n mansyonnen pli boner.

E sa bann lenkonvenyans i lenformasyon ki ganny donner pa korek, rezon ki pa neserman zistifyab. Laklas ki tro plen, zanfan ki fatige apre en long vwayaz. Zanfan ki bezwen vwayaz tousel lo bis.

Bann lekol lavil in plen e pa pe kapab pran etidyan an deor zot *zone*. Pli gran lenkonvenyans se ki ler en zanfan i ganny refize en demann *exemption*, paran i pran sa bann ka personnel e zot komans ekrir partou pou rod rekour.

Ouswa ler en zanfan i ganny dir ki i bezwen bouz dan son *zone*, paran i refize. Konsekans se ki laklas i vin tro gran e bann standar ki nou pe sey swiv i kase.

En trwazyenm lenkonvenyans se ki dan bann lekol, napa en sistenm ki'n ganny etabli, pou verifye bann rezon ki paran i donnen ler i swazir pou zot rod en leksepsyon.

Trwazyenm parti kestyon, ki nouvo plan long term Minister Ledikasyon. Mr Speaker mezir kour term se pa aprouv demann *exemption of zoning*.

En dezyenm solisyon se rod en lekol alternativ pou en demann, si apre ki nou'n fer nou reser e nou'n war ki sa demann en paran i zistifyab, me ki napa plas kot i a pe demande.

En lot solisyon kourt term, se ki revwar lalis bann zanfan ki pa dan zot *zone*, par rapor avek rezon ki zot ti donnen inisyaman.

E si sa bann rezon i nepli zistifyab, nou a egzize ki sa zanfan i retourn dan son *zone*. Sa solisyon i riske nesaser ki nou legaliz en regilasyon e nou ava demann sipor Lasanble.

Plan long term se etabli bann vre rezon aköz paran i rod *exemption of zoning* e sey rod

fason amelyor sistenm skoler si i nesaser. Mr Speaker mon annan lentansyon anmenn sa deba *zoning* lo en nivo nasyonal.

Akoz mon anvi ki nou diskite lo relevans e modernite sa Lalwa. Minister Ledikasyon pe devlop en propozisyon pou diskite, pou eksite en diskisyon e rod pwennvi bann diferan parti prenan. Mersi Mr Speaker.

MR SPEAKER

Mersi Minis. Onorab Arissol ou oule poz siplemanter.

HON SANDY ARISSOL

Mersi Mr Speaker. Mersi Minis pou ou repons. Mon ti annan 3 pti kestyon pou Minis. Premye kestyon ki mon ti a kontan demann Minis, ou'n koz lo *exemption from zoning*.

Mon ti a kontan ou dir avek Lasanble, lekel ki aprouv *exemption from zoning* ki kree tou sa bann presyon ki Onorab Kelly in demande?

Dezyenmman mon ti a kontan demann ou, eski Minister Ledikasyon in fer en letid pou li vwar konbyen son *staff* ki asiz Minister Ledikasyon, ki li son zanfan i ganny *exemption to zoning*? Mon dezyenm kestyon.

Mon trwazyenm e mon dernyen kestyon, mon ti a

kontan demann Minis, avek bi pou retir presyon dan bann lekol, kan eski Minister Ledikasyon pe mazin vin avek sa nouvo Polisi pou legaliz sa Polisi parey ou'n dir atraver Lasanble Nasyonal. So kan eski nou pe ekspekte sa pou nou kapab dil avek sa zafer *zoning* enn fwa pour tou? Mersi bokou Mr Speaker.

MR SPEAKER

Mersi. Mersi Onorab Minis.

MINISTER JUSTIN VALENTIN

Mersi Mr Speaker, mersi Onorab pou ou kestyon. Mr Speaker an premye, *exemption of zoning* i ganny aprouve dan Lofis Sekreter Prensipal.

Dezyenm, e an konsiltasyon byensir, akoz letan mon'n vini osi i annan bann enstan ki bann ka i ganny diskite, mwan ek Sekreter Prensipal, nou diskite bann ka e nou rod bann solisyon.

Me sa ki'n arive depi ler mon'n vini, i difisil, mon pa rapel kot mon'n pran en ka pou donn *zoning*. Akoz bann lekol in vreman, vreman plen dan lavil, kot bann paran ti pe rode.

Dezyenm kestyon i koz lo si Minister Ledikasyon in vwar, e par en resers si i annan son bann *staff* ki son bann zanfan pe lekol lavil. Nou pa'n fer en

resers pou egzakteman lo sa spesifik, akoz i pa ti an parti sa kestyon.

E i ti pou enteresan si mon ti'n ganny sa dabor avans, mon ti pou'n kapab fer. Me selman, wi i annan bann dimoun ki travay dan Minister Ledikasyon, ki annan zanfan ki lekol dan bann lekol lavil.

Osi byen ki i annan lezot profesyon o tour lavil ki bann paran pe travay otour lavil, e zot zanfan osi pe lekol dan lavil. Parey mon'n dir i annan omwen 600 dan primer e omwen 300 dan segonder.

Sa regilasyon ki nou pe koz lo la ler mon ti prezant mon plan pli boner sa lannen, mon ti koz lo relevans *zoning*, eski *zoning* i ankor relevan.

Akoz byensir tou sa bann problem e lezot kompleksite otour *zoning* ki nou devret pe koz lo la. Donk boner lannen prosenn, nou pou dan en pozisyon pou komans prosedir pou legaliz sa regilasyon. Mersi Mr Speaker.

MR SPEAKER

Mersi Minis. Onorab Michel Roucou.

HON MICHEL ROUCOU

Mersi Mr Speaker. Bonzour Minis avek PS, bonzour spesyal pou tou

zabitan Mont Fleuri. Minis si ou kapab dir nou, *zoning* li menm li ki manner i ti komanse?

Eski ler i ti komanse i ti annan en soz spesyal ki bann zanfan ti gannyen, pou zot kapab transfer dan nenport ki lekol?

Apre osi Mont Fleuri i lekol ki pli senpatiz avek bann larestan distrik an term *zoning*. Akoz mon war poudir nou lekol primer ek segonder nou ankadre bokou manrmay ki pa tonm dan distrik ki tonm dan lavil obor nou.

E Minis eski i annan en problem dan bann larestan lekol, ki pe fer ki bann paran zot pran zot zanfan zot pran zot fer vin met dan bann lekol dan lavil?

Mon trwazyenm kestyon, Minis ki mon pou demann ou, i an term osi, nou war poudir i annan bann zanfan ki annan problem *behaviour* e zot osi zot ganny transfer dan bann lekol.

Mon krwar sa pou sey tir zot dan sa *comfort zone*. Ki sa pou sey gete ki manner zot pou aranz en pti pe zot latitud. Mersi.

MR SPEAKER

Mersi Onorab. Minis.

MINISTER JUSTIN VALENTIN

Mersi Mr Speaker, mersi Onorab pou ou kestyon. E Onorab ou vwar akoz petet mwan anvi lans en deba pou nou koz lo *zoning*.

Akoz zisteman i an relasyon ek sa bann kestyon ki ou pe demande. Premye, ou'n demande ki manner *zoning* ti komanse?

Zoning mon krwar in komans byen boner an 1982 anba en filozofi 'Lekol dan ou distrik. E byensir apartir la sa prezan pou anmenn nou dan ou dezyenm parti ou kestyon.

Be akoz pa tou zanfan ki anvi lekol dan son distrik, ouswa pa tou paran ki anvi met son zanfan lekol dan son distrik. I annan bokou rezon.

I annan rezon i vre, i annan bann rezon ki mon krwar petet nou pa pou kapab kasyet. I annan paran petet i dir, kot mon zanfan i ete, mon pa tro kontan sa lekol.

Pou plizyer rezon, alor i a sa moman, vwala sa moman ki i rod en leskiz. I annan bann leskiz - en bann leskiz bizar ki paran i donnen osi pou sa kapab arive.

E i annan byensir bann rezon ki vre, ki zistifyab. Kot bann paran i dir mon zanfan i annan en serten kompleksite lasante ki i bezwen pre avek kot mon travay.

Alor i demann Minister Ledikasyon pou sey *accommodate* sa demann. E byensir osi, i annan bann paran ki sanz landrwa reste tanzantan. E resaman la nou'n ganny en paran ki dan lespas 1 mwan in sanz 3 landrwa reste.

Ler i al laba, i oule son piti i al ek li, i retournen, prezan nou, nou zis pe ale vini nou. Ou konpran mwan? I annan en problem. E problem *zoning*, posibleman petet in ariv en problem, posibleman mon pa'n la. Me selman in kapab petet letan ou'n komans donn enn, laport in ouver pou lezot.

Donk i en problem ki mwan mon krwar i en konteks dan Ledikasyon, ki mwan mon krwar i demann latansyon. Akoz par egzanz? Mon pou zis petet anvoy en boul la.

En paran i dir ou, *well* akoz ki mon devret ganny pini pou mwan met mon zanfan lekol la akoz in ne la, akoz mon pa kapab swazir en lekol, en lekol ki mon anvi pou mon zanfan? Ou konpran mwan?

Be mwan lo nivo - sanmenm sa mon ti pe koz lo, nou bezwen gete ki rezon ki paran i demande - pe demande? Sa i en resers enportan ki nou devret fer.

Ki bann rezon ki paran pe demande pou plas son zanfan

dan en lekol kot i anvi? Eski sa i en rezon, akoz nivo lekol. E si sa i o nivo lekol i responsabilite Minister Ledikasyon, ki mon pou pran sa *challenge* pou nou kapab fer sir ki lekol i donn son mye.

An plis ki sa nou bezwen osi get, fer sa ki nou apel bann provizyon pou pozisyonn bann diferan ansenyan. Nou pa kapab annan en lekol, kot dizon i annan plis etidyan, ansenyan.

Plis ansenyan, dizon, ki kalifye ki en lot. Nou bezwen si ou oule dan sa prosedir kot nou plas ansenyan, nou bezwen fer sir ki i annan osi en serten *equitability* dan zot konpetans e zot kalifikasyon.

Se pou se la ki mon dir e mon repete ki *zoning* i en topik ki nou bezwen dan en fason sistematik, obzektif, get li, reponn e adres bann *issue*. E si fodre nou revwar sa regilasyon, sa Lalwa, nou bezwen war li. Vwala, mersi Mr Speaker.

MR SPEAKER

Klarifikasyon Onorab Roucou wi.

HON MICHEL ROUCOU

Mersi Minis pou ou larepons. Minis i annan sa trwazyenm kestyon an term kot bann manrmay ki i annan problem *behaviour*, kot zot osi

zot pe ganny bouze pou al dan bann diferan lekòl.

Aprè osi mon'n aprann ki lekòl Mont Fleuri pou reganny ankor bann nivo manmay *S1* ki pe sorti dan lekòl Belonie. Mersi.

MR SPEAKER

Minis.

MINISTER JUSTIN VALENTIN

Mersi Mr Speaker. Mersi Onorab. Wi par ler i vre, i malerezman. Me sa i arive preski dan tou sistenm ledikasyon, kot parfwa bouz en zanfan akòz son konportman i posibelman nesese.

Me an plis ki bouz en zanfan zis pou sanz li lekòl, i pa pou efektiv. I pou bezwen osi annan bann diferan stratezi ki akonpany sa zanfan, pou li kapab redres son konportman si i nesese.

Me parey nou'n war, annan de ler pou sekirite e byennet sa zanfan parfwa, i nesese ki ou sanz li en lekòl. E dan sa ka la, i annan en ka spesyal, e sa partou i arive dan tou sistenm Ledikasyon.

Eski i annan zanfan, eski lekòl Mont Fleuri pou resevwar ankor zanfan, sirtou sorti ot bann lezot lekòl? Byensir i annan bann lekòl ki pe ganny konstri, an konstriksyon.

Si i annan lekòl an konstriksyon, la i pa vin neserman, i pa tonm dan sa ka spesifik ki nou pe koz ladan. Akòz i annan lekòl ki pe ganny konstri.

E pou sekirite osi e pou lespas i pa kapab akeyir sa zanfan. Par egzansp dizon La Rosière, La Rosière pe ganny konstri. E napa plas laba. Alor nou rod en lekòl alternativ pou met sa bann zanfan.

E la nou pozisyon sa bann zanfan dan lekòl Mont Fleuri. Me le moman ki lekòl i pare, zanfan i retourn dan son lekòl normal. Mersi Mr Speaker.

MR SPEAKER

Mersi Minis. Kestyon, Onorab Aglae.

HON EGBERT AGLAE

Mersi Mr Speaker. Bonzour Minis avek ou *panel*. Minis mon ti a kontan petet eklersi nou en pti pe plis, petet osi i annan paran ki pe ekoute la deor.

Eski ou pe dir nou la poudir bann *zoning* ki'n ganny aprouve an se moman i pou reste? E nou tou nou konnen poudir *zoning* sak lannen ou bezwen re *request* ankor.

Eski lannen prosen, vi ki ou'n dir ki i pou tonbe, ou pa pe

pran okenn *zoning*? Eski lannen prosenn i vedit ki sa bann paran ki ti deza zot zanfan i dan *zoning* ozordi, zot pou bezwen retourn dan zot rezyon ki zot sipoze ete? Sa i enn.

Dezyenm, vi ki ou dir ou pe al *regulate the zoning issue*, eski ou pe vin, mazin Minister pou vin avek en bann *set* kriter spesifik ki fer ki si okenn *request* i vini, i ava annan kler *A to Z, A to B* mon pa konnen, bann kriter ki zot pou tonm dakor ki en paran i kapab ganny aksepte pou li antre dan proses *zoning*. Mersi.

MR SPEAKER

Mersi Onorab. Minis.

MINISTER JUSTIN VALENTIN

Mersi Mr Speaker. Mersi Onorab pou ou kestyon. Onorab premye kestyon ou pe demann eski bann zanfan ki'n deza ganny bann *exemption* ki pe lekol an deor son *zone*, eski i pou kontinyen ouswa i pa pou kontinyen?

Parey mon'n dir, lefe ki i annan en problem lespas dan bann lekol lavil, nou pou bezwen antre dan en legzersis pou get sa 622 e sa 349 zanfan ki dan primer, segonder efektifman, nou pou bezwen get zot en kou. Akoz zot an deor zot

zone. Nou bezwen revwar, eski zot rezon i ankor zistifyab?

Par egzamp, i annan en zanfan ki ler i ti vin dan *S1*, son paran ti vin avek sa rezon, i pa kapab pran bis li tousel. La prezan i dan *S3*, mon pe donn en legzamp, zis en legzamp. Eski sa rezon i ankor zistifyab? Si sa rezon pa neserman zistifyab, nou pou kapab pe dir li, be la prezan retourn dan ou *zone*, akoz pou ou kree lespas.

Akoz otreman ki pe arive, nou pou war bann zanfan ki devret dan lekol, li prezan i pa kapab lekol dan sa lekol, li i an deor son *zone*, akoz kot i ete son *zone* i plen. Ou konpran mwan?

I pou annan en pti pe tirbilan. Letan sa legzersis pou arive byensir, i pou annan en ta dimoun ki pou rod nenport ki rezon pou ekrir partou, partou. Se la kot sa regilasyon pou enportan.

Pou nou kapab etablir sa bann kriter. E la mon pe dir sa bann kriter nou pa pou kapab zis ekrir li la ozordi. I annan deza detrwa kriter ki mwan mon krwar senserman ki nou bezwen revwar letan nou pe get sa revwar sa sistenm *zoning*.

Sanmenm sa ki nou pou eksit en diskisyon, apre nou pou formalite bann kriter pou nou kapab fer bann

propozisyon legal pou nou kapab legaliz li. Vwala sa ki mon pe sey eksplike.

MR SPEAKER

Wi Minis ou kapab kontinyen.

MINISTER JUSTIN VALENTIN

Wi Mr Speaker, mon anvizis azoute, bann zanfan ki pa bouze e sa pou mentenir en stabilite.

Se si zot dan P6 ouswa zot dan S5, la nou dir zot pa pou bouze la, akoz zot bann dernyen lannen, e apre nou konnen i annan zot legzanmen Nasyonal ki bokou lekol in prepar sa bann zanfan. E zot ti a voudre sa bann zanfan i partisip dan sa bann legzanmen avek zot. Mersi Mr Speaker.

MR SPEAKER

Mersi Minis. Wi Onorab Cosgrow.

HON WALLACE COSGROW

Mersi Mr Speaker. Bonzour Mr Speaker, bonzour tou dimoun. Minis ou'n dir i annan en kantite rezon akoz ki bann paran i demann *exemption* pou from sa *Zoning Policy*, mon pe prezimen 2 bann rezon en pe pli popiler se, kot paran i travay dan lavil e osi petet performans zot lekol dan

zot rezyon ki zot santi petet i pa ase *challenging* pou zot zanfan.

Alor zot rod en *exemption from the Policy*. Minis ki eski Minister Ledikasyon ansanm avek bann *Council*, bann *School Council* dan lekol pe fer pou petet amelyor sityasyon *or* kree bann lanvironnman konvenab.

Pou ki bann paran *or* mwens paran i kapab tournen, i kapab vin kot zot pou demann *exemption*. Par egzanp si nou konnen paran i fini travay 5er e i napa okenn personn pou *supervise* son zanfan, sirtou bann zanfan primer.

Ki mannyer lekol i antre pou sey *improve* en pe sa sityasyon pou anpes annan sa kantite *request* pou *zoning*?

Dezyenm Minis, eski zot in war en *correlation* between sa zafer *zoning* avek petet bann *issues* sosyal ki vini dan lekol, avek bann zanfan sirtou petet ki pe lekol dan zot *zone*, e ki petet napa sipervizyon.

Zot war zot en pti pe partou, partou apre lekol. Eski sa i kree en problem pou bann lekol dan bann diferan *zone*? E eski Minister, si wi, eski Minister pe travay avek departman konsernen pou gete ki mannyer ou adres en pti pe sa bann *issues*?

Akoz mwan mon pe mazine petet i pou annan

serten *issues* sosyal ki leve, ler zanfan pa pe ganny serten sipervizyon apre travay.

Akoz paran i travay anvil, nenk 5er, 5er edmi ki i ariv dan lakour. E zanfan pandan sa bann letan i an deor kontrol en adilt. Mersi Mr Speaker.

MR SPEAKER

Mersi Onorab. Minis.

MINISTER JUSTIN VALENTIN

Mersi Mr Speaker. Mersi Onorab pou ou kestyon. Onorab bann rezon prensipal ki gannyen se travay me pa performans lekòl, me travay e lasante.

Sa i sa 2 ka prensipal ki bann paran i donnen pou rod sa *exemption of zoning*. Me nou, nou pe dir, si *zoning* pou kontinyen, ankor mon ensiste ki nou bezwen fer sa konversasyon. Si *zoning* pou kontinyen, nou pou bezwen gete ki manner.

Akoz parey nou pe dir, pou donn sa *exemption* i ganny drwa en pe difisil. E si nou'n dir nou pa pou donn *exemption*, omwen lo bann ka vreman spesifik. Wi byensir nou pou bezwen amelyor bann konteks dan lekòl, pou fer ki paran i swazir pou met son zanfan dan sa lekòl kot i devret ete.

Akoz i bokou paran e bokou zanfan ti a voudre pa lev granmaten pou pran en bis pou al lekòl dan en lot *zone* totalman an deor son *zone*. Me la kot i devret pe lekòl.

Sa i fer ki nou dan Minister Ledikasyon nou bezwen, napa swa, nou bezwen revwar dan bann lekòl ki pe arive.

Par egzamp la, si par egzamp, reste apre lekòl, i en problem, paran i dir ou kot lakour napa person pou kit son zanfan, nou annan en sistenm *after school service*. Petet i pa pe mars parey ti a voudre.

E la ankor nou, nou bezwen fer sir ki sa sistenm i efektif e i mars byen. Dezyenm kestyon, ou koz lo *corrélation* ant *zoning* avek sosyal.

Non nou pa'n fer okenn letid lo sa kote, i en letid valab ki posibleman i kapab ganny fer. E i kapab osi en letid ki avas sours diskisyon pou sa regilasyon ki nou anvi fer a lavenir. Mersi Mr Speaker.

MR SPEAKER

Mersi Minis. Onorab Terence Mondon.

HON TERENCE MONDON

Mersi Mr Speaker. Bonzour Minis avek ou

delegasyon. Sa problemn *zoning* in egziste pou bokou lannen. E eski in annan bann mezir konkret, ki Minister in esey met an plas dan lepase pou redres sityasyon e kwa ki'n ganny fer vreman?

E dezyenmman Minis in dir nou ki dan sid en gran norm zanfan pa pe lekol dan zot *zone*. Si i kapab donn nou en apersi ki sityasyon sa bann lekol dan sid? La nou pe koz Takamaka, Anse Royale, Baie Lazare silvouple. Mersi.

MR SPEAKER

Mersi Onorab. Minis.

MINISTER JUSTIN VALENTINE

Mersi Mr Speaker. Mersi Onorab pou ou kestyon. Onorab en mezir konkret ki'n arive petet pou rezourd en pe bann konpleksite pou anpes paran rod *exemption of zoning*. I sa sistenm *after school service*.

Kot apre lekol i annan en group dimoun dan sak lekol ki vey bann etidyan. Selman nou vwar sa sistenm pa neserman mars byen. Akoz i annan etidyan apre 2er edmi i anvi al se li- i anvi al se li.

E ou santi sa dan bann etidyan ki anvi al se li, alor petet la osi annandler kot malerezman, malerezman pa

tou kou ki ou ganny bann ansenyan, pou ankadre sa bann zanfan apre ler.

Ou ganny bann volonter, bann paran bann lezot *helper* ki mon krwar petet nou devret osi donn zot en serten formasyon. Akoz zot pe travay avek zanfan evantuelman. Donn zot serten formasyon pou zot kapab ankadre zanfan dan apre ler.

E la petet mon profit sa letan petet pou remerisi sa bann paran, sa bann volonter ki sey zot mye pou vin kot lekol pou zot donn lanmen vey zanfan en lot paran ki pe travay, ki pe prodwir pou devlopman sosyete.

Dezyenm pwen ou kestyon Onorab, les mwan *recall* akoz mon krwar mon'n perdi dezyenm pwen ou kestyon. Vwala dan sid. Ou'n koz dan sid;- sa ki mon'n dir se dan sid pa neserman annan 4n gran kantite etidyan ki pa dan son *zone*.

Dan sid landrwa kot i annan plis zanfan ki pa dan son *zone* se Anse Royale. Vwala sa pwen ki mon'n oule fer.

E en rezon prensipal i annan en distrik an partikilye sa rezon ki letan nou pe analiz bann demann nou pe fer, nou pe vwar i annan en distrik an partikilye ki i annan en pe problemn sosyal. Kot paran pe

dir mwan mon pa la apre 2er edmi mon pa anvi kot mon zanfan dan sa serten lo kalite.

Alor mon pou prefere met li dan en lot lekol, e sa i ava donn mwan en pe letan pou mon arive pran li pou mwan ler mon monte mon mont ek li.

Donk sa zafer *zoning prezan* otomatikman i sorti zis dan lanmen Minister Ledikasyon. I antre dan lezot Minister prezan. E vwala kot prezan mwan an si byen avek lezot bann Minis konsernen nou kapab prezan antre dan bann konversasyon.

Nou pe antre dan bann konversasyon. Ki mannyer petet nou kapab aranz bann lezot konteks. Akoz la i annan en nespes *jigsaw puzzle*, ki nou bezwen aranze pou nou kapab ganny sa vre portre ki nou anvi. Mersi Mr Speaker.

MR SPEAKER

Mersi Minis. Onorab Bistoquet.

HON ROSIE BISTOQUET

Mersi Mr Speaker. Bonzour Mr Speaker. Bonzour Minis ek ou delegasyon, bonzour tou Onorab.

Minis bann paran ki pa *comply* ek sa *zoning* kot zot zanfan i lekol dan lavil, ki lenpak sa i annan lo sistenm

transportasyon piblik sirtou dan bomaten avek aswar?

E osi eski sa sityasyon i osi kontribye pou konzasyon trafik ouswa annan co-relasyon avek trafik kot travayer i ganny retar pou antre travay ou antre dan lakour?

Akoz nou'n remarke ki par egzantp dan vakans ler i annan vakans transpor lo larout piblik sirtou bann ki desann dan lavil i *flow* normalman? Mersi.

MR SPEAKER

Mersi Onorab. Minis.

MINISTER JUSTIN VALENTIN

Mersi Mr Speaker. Mersi Onorab pou ou kestyon. Onorab mon napa levidans, mon napa levidans. Nou'n annan bann soupson ki posibleman sa i kapab en rezon bann *assumption*.

Me selman mon napa levidans pou kapab vwar sa relasyon. Akoz en dimoun i kapab osi *argue* ki dan letan vakans i annan bokou paran ki pran konze.

Alor petet, napa bokou dimoun ki pe desann. Akoz lakantite bis li, li menm li i reste konsistan. Me se loto e nou kapab *argue* petet zanfan pe desann dan loto ek zot paran.

E paran pe pran konze. Tou sa ki mon pou dir la i pou

lasonpsyon. Napa en levidans konkret.

Me ti ava bon nou zwenn *SPTC*, pou nou vwar si sa i en rezon posib e petet si sa i en rezon posib e petet si sa i en rezon posib ki nou kapab fer vizavi sa.

Me mon reste konvenki, ki nou bezwen, lo nivo Minister Ledikasyon e kit bann lekol atrakte paran pou lekol dan son *zone*. Sa i devret en target inisyal, atrakte en paran pou anvoy son zanfan lekol dan son *zone*. Mersi Mr Speaker.

MR SPEAKER

Mersi Minis. Onorab Lemiel.

HON SYLVANNE LEMIEL

Mersi Mr Speaker. Minis bonzour avek ou delegasyon. Mr Speaker mon ti anvi demann sa kestyon konman *Chairman COGA*.

Mon santi ki i en lasirans ki ozordi atraver sa kestyon ki Minis in vin donnen dan Lasanble, kot in dir nou i pe al lans en deba. E zot pou vin avek en regilasyon kot i konsern *zoning*.

Akoz mannyer mon vwar la i napa en Polisi i zis dan sa *act* li menm ki dir poudir en zanfan i devret pe lekol dan distrik pli pre kot i reste.

So Minis petet kan ki ou pe mazin sa deba i ganny deklanse avek bann dimoun ki konsernen? E petet la kan ki nou pe mazin kan ki nou pe mazin vwar en Polisi or sa regilasyon *zoning* konmans met an mars? Mersi.

MR SPEAKER

Mersi Onorab. Minis wi.

MINISTER JUSTIN VALENTIN

Mersi Mr Speaker. Mersi Onorab pou fors en dat. Mon pa pou kapab fors en dat. Parey mon pe dir la ler mon kit lasal la, parey ou pe dir, nou'n donn en lasirans, me sa lasirans i deza dan mon plan, kot nou pe eksit en deba lo *zoning*, relevans *zoning*.

E pli boner mon'n dir ki boner lannen prosen. E posibleman anver Avril nou pou'n kapab dan en pozisyon pou nou kapab konmans *formulate* en regilasyon e anmenn devan Lasanble.

E *PS* i anvi koz en pti pe lo sa laranzman bis pou bann manrmay ki annan *exemption of zoning*. Akoz in avek sa en pe letan, so mon ti ava kontan i adres sa. Mersi.

MR SPEAKER

Mersi *PS*, wi.

PS ODILE DECOMARMOND

Mersi Mr Speaker. Mersi *Minister*. Pou bann laranzman bis, sak zanfan ki ganny son let aprouve pou *exemption*, zot anmenn sa let kot *SPTC*, e zot ganny zot en kart pou zot voyaz lo bis.

E i annan ler spesifik ki zot bezwen vwayaz lo bis pou zot servi sa kart. Si non bis i pa sipoze pran zot dan zot *uniform* apre sa bann ler ki in donn zot pou zot vwayaz lo bis. Sa i pou ede pou redwir en pti pe bann presyon ki bann manmay lekol i mete.

Minister si ou permet mwan zis pou mon pou Onorab Lemiel nou annan *guidelines* pou *exemption from zoning*, ki ti ganny devlope depi an 2012.

E se sa *guidelines* ki nou pe servi pou lemoman. Lezot travay anliny avek sa ki *Minister* pe dir la, akoz i annan serten *boundaries* osi ki'n sanze - i annan lezot travay ki nou pe fer, ki nou'n met li dan sa *draft Policy* ki nou'n fer.

Prezan sa *draft Policy* ki Minis prezan pou anmennen pou koz lo la. Me selman i annan travay ki'n fini konmans fer lo sa dan sa direksyon. Mersi.

MR SPEAKER

Mersi *PS* pou sa leklersisman. Nou ava pas lo prosen kestyon. Onorab Gervais Henrie.

HON GERVAIS HENRIE

Mersi Mr Speaker. Bonzour tou dimoun. Kestyon limero 100 i lir koumsa:

Eski Minis pour Ledikasyon i kapab donn en kontrandi, nou Lasanble lo bann rezilta legzanmen nivo P6 sa dernyen 3an? E eski ou Minister i satisfè ki gran mazorite bann etidyan pe demontre sa nivo konpetans nesese dan lektir e matematik pou kapab swiv leson lo nivo segonder? Mersi.

MR SPEAKER

Mersi Onorab. Minis.

MINISTER JUSTIN VALENTIN

Mersi Mr Speaker. Mersi Onorab pou ou kestyon. Mr Speaker P6 i reprezant dernyen nivo primer dan konteks Sistenm Ledikasyon dan Sesel.

Bi legzanmen Nasyonal P6 i *comme* swivan;- Evalye nivo performans zanfan baze lo bann target laprantisaz, dan bann size a lafen staz primer.

Fer disponib dan lekol segonder rezilta lo performans zanfan pou ki bann lekol segonder i pli byen kapab

prepar zanfan pou letid lo nivo segonder.

E trwazyenmman enfliyans amelyorasyon dan bann program letid lo nivo primer.

A lafen P6, bann zanfan i ganny evalye lo nivo Nasyonal dan sa 6 size swivan;- *Anglais, Français, Kreol, Matematik, Lasyans, e Letid Sosyal.*

Pou lannen 2018, 2019 e 2020 Minister Ledikasyon ti'n etabli en target, ki omwen 45poursan zanfan ti ava ganny grad C ou pli meyer dan tou bann size prensipal.

Analiz lo bann rezilta, i *comme* swivan - (E la mon pou reponn sa kontrandi)

Kot langaz i konsernen bann zanfan i ganny evalye lo sa 4 stil lengwistik, lir, ekri, ekoute, e koze dan 3 size, *Anglais, Français* e Kreol.

Dan sa dernyen 3an rezilta i montre ki performans in desann eksepte dan Kreol. Dan *Anglais* an partikilye rezilta i montre ki dan sa omwen 1300 etidyan P6 ki fer legzanmen, 43poursan ti ganny grad C ou meyer an 2018. 34 ti ganny sa menm grad an 2019 e zis 26 lannen pase an 2020.

Mwayenn - setadir *average score Anglais*, sa dernyen 3an in osi desann.

An 2018 - 51, 2019 - 47, e 2020 - 42poursan.

An se ki konsern rezilta dan size *Français*, poursantaz zanfan ki ti ganny grad C ou meyer, ti *comme* swivan;- 39poursan an 2018, 29 an 2019, e 42 an 2020.

Bann mwayenn *score average score*, an *Français* pou sa 3 lannen respektivman 53, 46, e 54poursan.

Poursantaz zanfan ki ti ganny grad C ou pli meyer dan Kreol, ti 58poursan an 2018, 40poursan an 2019 e 50poursan an 2020.

E mwayenn *score* dan sa size pandan sa 3 dernyen lannen respektivman 58poursan, 51poursan e 57poursan an 2020.

Poursantaz etidyan ki ti ganny grad C ou pli meyer, dan matematik, ti 24poursan an 2018, 25poursan an 2019 e 15poursan an 2020. E mwayenn *score* dan sa size ti 43poursan 2018, 43 osi poursan an 2019 e 37poursan an 2020.

Mr Speaker, pou dezyenm parti kekyon Onorab i eski nou satisfè ki gran mazorite bann etidyan pe demontre sa nivo konpetans?

Minister Ledikasyon pa satisfè avèk sa rezilta. Akoz nou pa pe kapab zwenn pou mentenir target sa omwen

45poursan grad C ou meyer, dan bann size prensipal pandan sa dernyen 3an.

Minister i swete ki en pli gran norm etidyan ti ava annan sa nouvo laprantisaz apropiye pou ranforsi zot sans fer byen ler zot mont lo nivo segonder.

Plan ledikasyon ki mon ti prezante dan Lasanble pli boner sa lannen, i viz ver lamelyorasyon dan performans etidyan. Mon soulinyen ki nou devret investir dan lansennyman. E program devlopman lekol pou nou reisir lenfliyan sanzman dan sikse bann etidyan. Mersi Mr Speaker.

MR SPEAKER

Mersi Minis. Siplemanter Onorab Henrie.

HON GERVAIS HENRIE

Mersi Mr Speaker. Mersi Minis pou larepons. Mon bann kestyon evidaman, kote problem i ete lo nivo etidyan zot menm, nivo kalite lansennyman, nivo mank lentere paran. Donk kote sours problem i ete pou sa kalite rezilta?

Dezyenmman, ki zot anvizaze Minister letan mon pe dir zot ki zot anvizaze fer?

E trwazyenmman, par lefe ki enn bann target se pou donn

lekol segonder sa rezilta sa bann zanfan i donn lekol segonder zouti pou travay avek kot pou plas zot bann keksoz koumsa.

Donk sa kalite rezilta ki zot vin avek ki mannyer i enpakte prezan, mannyer i enpakte lo lekol segonder an term kot pou met manrmay, ki kalite zefor an plis ki lekol segonder i bezwen fer pou amelyor zot standar konpare avek sa ki zot vin avek? Mersi Mr Speaker.

MR SPEAKER

Mersi Onorab. Minis.

MINISTER JUSTIN VALENTIN

Mersi Onorab pou ou kestyon siplemanter. Mersi Mr Speaker pou donn mon laparol. Kote problem i ete?

Larepons i en pti pe partou-partou. Nou bezwen admet dan tou bann domenn e se pou se la ki ler mon ti vini lot fwa mon ti prezant sa plan. Sa plan zisteman ti pe viz ver lamelyorasyon dan performans bann etidyan. Nou bezwen admet.

I annan problem dan performans ansenyan. Dan kalite ansenyan, i annan. I annan bann bon ansenyan dan sistenm. I annan bon ansenyan me osi i annan petet bann

ansenyman ki nou bezwen travay ek zot pou lev zot konpetans.

E dan mon plan, i annan sa. I annan problem lo konportman zanfan. E osi sa volonte zanfan. E sanmenm sa ki ler mon ti vini lot fwa mon ti koz lo relevans, relevans *curriculum*.

Eski sa *curriculum* ki nou pe donn zanfan, i sa *curriculum* ki sa zanfan sa zenerasyon i devret abzorbe? So i annan relevans osi dan *curriculum*.

E apre i annan konteks lekòl, i annan konteks lekòl. Sa landrwa kot nou pe travay. Semenn pase mon ti demann bann ansenyman pou nou revwar lafas nou laklas. Annou revwar kwa ki nou prezant avek etidyan? Kwa ki nou ki nou fer zeneralman pou fer ki zanfan i kontan lekòl?

Nou osi bann ansenyman, i kontan sa travay. E pou mwan anmenn sa transformasyon, sa sanzman ki nou anvi fer kot lekòl lokalize, i sa nide deryer *the 'school-based teacher-led' forum*. Pou *teacher* annan en lavwa li osi lo ki mannyer i amelyor a laklas.

Ou konnen bokou nou'n pran bann keksoz *from above* ler mon dir *from above from the Headquarters* nou'n anmenn dan lekòl.

I letan la. I letan nou'n donn bokou formasyon bann ansennyman, i annan ki ankor pe gannyan. E nou pou kontinyen donnen.

Alor mon krwar i neserer prezan ki sa transformasyon laklas, sa transformasyon dan laprantisaz e dan lansennyman annou fer ki i osi konmans dan laklas-konmans dan laklas.

E apre lo en faz vreman sistematik nou bezwen annan bann resers re aprofondir ki tras bann devlopman.

Mon'n deza partisip dan en resers dan Minister Ledikasyon bartematik e ki'n montre ou poudir letan i annan en resers, e bann lentervansyon stratejik e sistematik, i annan en *improvement* dan *learning*.

E sa bann kalite lentervansyon, mwan mon pou ankouraze akòz mon konn son benefis lo laprantisaz. So mon pou ankouraz sa.

Alors ki nou anvizaze fer, lentervansyon, stratezi e lentervansyon sistematik vize ver performans. Akòz nou bezwen fer sa? Nou bezwen fer sa e la mon antre dan trwazyenm parti ou kestyon, ki performans dan primer, i annan en relasyon direk dan segonder e menm dan tersyer.

Norm zanfan ki kalifye par egzant pou fer *IGCSE*

matematik *extended*, i pa zoli - pa bon.

E si deza matematik ki en size (mon pou servi sa lekspresyon) i en nespes size fondamantal, i pa bon, ou kapab konpran prezan ki reperkisyon i annan anler.

Alors performans dan primer i annan relasyon direk avek performans dan segonder. Dan segonder prezan ou pa ganny ase sa bann etidyan ki ou bezwen, pou zot kapab fer bann size enportan pou zot kapab prezan pli tar antre dan pos-segonder avek sa swa ki zot pa ti anvi.

E se la ki ou pou tande ki bokou bann sant profesyonnel i dir ek ou koumsa, ki etidyan ki vin kot mwan napa *level*, napa nivo *and so and so forth*.

Alor i annan en zafer domino la ki tonbe anmezir ki ou monte dan sistenm skoler. Nou annan en latas. Nou annan en latas. E sa latas i pa neserman zis pou Minister Ledikasyon. Tou parti prenan i bezwen zwenn ansanm. I bezwen zwenn ansanm pou nou vwar.

Akoz si Ledikasyon ki pe get sa performans, lo en lot kote ki kominote pa pe get son bout, pa krwar nou pou reisi sa target. Alor nou domaz konman Ledikasyon se nou pou

bezwen konman sa *conductor*, ki anmenn tou dimoun ansanm, ki devlop sa bann lentervansyon stratezik ki en nespes lide dan sa rol akoz i nou Minister. Nou vin *the leader* pou nou kapab bouz laprantisaz e lansennyman - nivo lansennyman lo sa nivo ki nou ti ava voudre ete. Mersi Mr Speaker.

MR SPEAKER

Mersi Minis. Siplemanter Onorab Monthy.

HON PHILIP MONTHY

Mersi Mr Speaker. Bonzour Minis avek ou delegasyon. Onorab Henrie in pas en pe obor mon de kestyon dan son siplemanter.

Me selman kekfwa mon ava demann Minis pou elabor en pti pe plis osi ankor.

Minis premye kestyon, eski in annan okenn letid konkret ki'n ganny fer pou prouve ki vreman se kalite lansennyman lo nivo primer, i pe enpakte direkteman lo performans bann etidyan, dan serten matyer parey matematik? Ou'n mansyonnen langaz ler zot ariv lo nivo segonder?

Akoz nou koze nou dir lo nivo lansennyman, lansennyman kalite *teacher* ki

responsab. Eski in annan en letid pou prouve ki sa i vreman leka? *Ok?* Kalite lansennyman ki pe ganny donnen lo nivo primer ki lakoz prensipal.

Dezyenm kestyon, performans en etidyan i baze lo plizyer faktor Onorab Henrie in sit detrwa. Kalite *teacher* i enn, i annan osi lezot parey partisipasyon paran dan laprantisaz zot zanfan, i en lot, stati sosyo ekonomik en fanmir, nivo motivasyon, resours, metod lansennyman, tousala i bann faktor ki enpakte performans en etidyan.

Kestyon se ki zefor ki pe ganny fer pou kapab idantifye lekel sa bann faktor ki pli prominan o nivo primer e ki plan ou Minister pou kapab adres sa bann sityasyon? Mersi.

MR SPEAKER

Mersi Onorab. Minis.

MINISTER JUSTIN VALENTIN

Mersi Mr Speaker. Mersi Onorab pou ou kestyon. Mon pe ganny en kestyon sorti kot en ansenyan.

E mon bezwen reponn li – reponn li tre byen. Ou konnen semenn pase nou'n fer en lasemenn lansennyman semenn bann lansennyman, e bokou keksoz in ganny sorti.

Mon pou kler lansennyman i pa sa faktor prensipal ki pe fer sa. Me i en akter li osi. Parmi bann lezot faktor, i en faktor.

E dan ou pti rezimen, ou'n mansyonn lansennyman e mon'n osi koz lo konpetans e volonte bann zanfan, sistenm kot lakour.

I annan en letid ki fer lo nivo P6 e sa letid i apel *SACMEQ Study*. I regroup 15 diferan pei dan sid *L'Afrique*. Dan ki Sesel i form parti e zot rol se *monitor education quality at primary level*.

Sa letid lo en pe letan lo konmansman mon pe koz ou dan 2000 in konmans depi 2000 li. 2000, 2005 i fer tou le 5an nou ganny bann lenformasyon enportan.

E la i annan de dernyen letid ki mon pou demann bann dimoun pou nou get ladan o profon. Ki sa letid pe dir nou, ki i pe koz ek nou?

Akoz ladan i pran tou bann diferan *variable* nou apel sa, pou nou kapab koz lo ledikasyon, kalite ledikasyon i koz lo lansennyman, i koz lo zanfan li menm, i koz lo lakour, i koz lo en bon pe keksoz.

E mon ti ava kontan en zour mon ti ava kontan en zour vin prezant ek Lasanble rezilta sa dernyen letid *SACMEQ* ki

nou ti fer e ki i pe dir nou lo nivo ledikasyon dan Sesel. Ti pou enteresan.

Alor zot envit mwan ouswa kantmenm zot pa envit mwan mon kapab fer en pti demann spesyal nou vin koz lo la. I pou en zoli letid ki donn nou zoli letid ki donn nou zoli lenformasyon.

E *PS* i rapel mwan ki a moman anmezir nou pe koze la, demars pe ganny fer pou nou ganny fer sa sizyenm edisyon-sa sizyenm edisyon. E nou, nou espekte anmas nou lenformasyon an Novanm sa lannen.

Alors nou riske lannen prosenn boner annan nou detay lo sizyenm edisyon vreman resan *SACMEQ*.

E prezan nou kapab fer sa konparezon depi 2000 leer i ti konmanse ziska la 2021 ki manner performans in arive. E sa pou nou pou en keksoz enportan, akoz i pou kapab montre kot nou sorti, kot nou ete, e ki bann target ki nou anvi tape.

Donk ou kestyon Onorab lekel sa fakter pli prominan, donn mon en pe letan mon kapab reponn ou sa kestyon ler nou pou'n analiz resers syantifik ki'n ganny fer lo nivo nasyonal *SACMEQ* e la nou pou kapab dir egzaktman ki bann

pattern ki nou pe vwar dan *data* pou nou kapab koz lo la. e *ya* vwala. Mersi Mr Speaker.

MR SPEAKER

Mersi Minis. Onorab Hoareau.

HON JOHN HOAREAU

Mersi Mr Speaker. Bonzour Minis ek ou lekip. Bonzour tou dimoun a lekout.

Mr Speaker mon kestyon i baze en pti pe lo larepons ki Minis in donn nou an vi koz en pti pe lo *teacher competences*.

Mon ti ava kontan konnen ki poursantaz an se moman *teachers* dan nou sistenm ledikasyon primer, Gouvernman, *data* ki *certificated* oubyen diplomen parey nou dir?

E osi mon ti ava voudre kontan konnen an vi ki'n koz lo *SACMEQ* ki mon konnen i enn son pti baba.

So si i ti ava kapab dir nou an konparezon avek sa 15 lezot pei ki Sesel pe balans son bann rezilta avek, ki manner tre briyevman ki manner nou sityasyon i ete?

Eski osi annan bann dekouver ki li in pas atraver lo kote *gender*, bann diferan e ki remedye i pe fer pou sa? Mersi.

MR SPEAKER

Mersi Onorab. Minis.

MINISTER JUSTIN VALENTIN

Mersi Mr Speaker. Mersi Onorab pou ou kestyon. Bonn sans, nou'n mars avek nou dernyen bilten *statistics*. *Data* ki nou annan 83poursan bann ansenyan dan primer zot annan zot omwen en *certificate in education*;- savedir zot kalifye pou *teach* sa nivo segonder.

Dezyenm kestyon, ou'n refer *SACMEQ* konman mon pti baba, me mon pou plito dir ou mon kontan sa zanfan dan plas ki mon pti baba.

Ou kestyon, *ok* mon ti'n perdi ou kestyon mon'n ganny ou kestyon. Konparezon avek bann pei *L'Afrique*.

Rezilta ki nou annan Sesel i parmi sa bann pei ki dan sid *L'Afrique* pou matematik, akoz nou ti nou ganny *assess* osi dan Matematik, langaz *Anglais* e *life skill* i parmi bann premye 3 pei dan sa group.

Me parmi bann premye 3 pei dan sa group, i pa vedir sa ki nou, nou anvi. Menm si nou ti kapab premye dan en size, rezilta ki mon'n donneren taler i pa sa ki nou anvi.

Alors i annan de kalite rezilta la. I annan rezilta relatif avek rezilta absolli. Rezilta relatif i *ok*. Me nou ... rezilta absolli, baze lo en kriter. Nou pa satisfte. Mersi Mr Speaker.

MR SPEAKER

Mersi. Wi mon vwar ou pe lev lanmen Onorab Hoareau ou annan klarifikasyon.

HON JOHN HOAREAU

Wi lo kote *gender*. Mon ti'n demann en pti klarifikasyon lo la. Mersi.

MR SPEAKER

Wi.

MINISTER JUSTIN VALENTIN

Onorab ou kapab repete *please* silvouple

HON JOHN HOAREAU

Mersi. Minis mon ti ava kontan konnen lo kote *gender* si i annan okenn gran diferans ki'n ganny dekouver? E eski ki ou stratezi pou ou kapab remedye sa diferans dan nou lekol primer? Mersi.

MR SPEAKER

Mersi. Minis.

MINISTER JUSTIN VALENTIN

Mersi Mr Speaker. Mersi Onorab. *Gender* Mr Speaker fiy i perform bokou pli byen ki bann zanfan an zeneral dan nou lekol primer osi byen ki segonder.

E sa *pattern* i en pti pe osi en pe enternasyonal. Me pa akoz i enternasyonal ki mon bezwen krwaz lanmen e dir enternasyonal alor i natirel la. Non i pa neserman natirel.

Nou bezwen lev en pe - sanmenm sa mon koz lo tou kou relevans *curriculum*. Nou bezwen osi get tou sa keksoz ki nou ekspoz nou zanfan avek. Sa relevans sa *curriculum*.

Lafason ki nou pe mezir zot eski napa okenn, eleman ki petet i defavoriz en serten group.

Alors ankor mon retourn lo mon plan aköz sa i mon *plan*. I *plan* ki nou'n etabli pou nou bouze. Tousala i fer i don mon sa platform pou mon kapab fer sa amelyorasyon dan Ledikasyon.

Alor dan plan ki mon'n etabli nou'n osi koz lo relevans *curriculum*, lafason ki nou ekspoz bann zanfan kwa ki nou donn zot. E osi byensir fer ki nou pa defavoriz bann zanfan, bann diferan pti group e sirtou garson e fiy.

Alors ki mannyer nou fer? Ki nou etabli dan nou sistenm skoler en serten ekilibrasyon fiy e garson o nivo lansennyman, pou pa annan sa disparite gran disparite parey ki egziste la a ler aktyel la. Mersi Mr Speaker.

MR SPEAKER

Mersi, mersi Minis. Onorab Bastienne.

HON DESHEILA BASTIENNE

Mersi Mr Speaker. Bonzour Mr Speaker. Bonzour Minis e bonzour tou dimoun a lekout.

Minis an kestyon orizinal i tous lo konpetans e rezilta. Sa i fer ki i fer nou get laprantisaz an zeneral kot lankourazman i antre.

Minis dan primer, ansenyan ti kontan servi diferan metod, tel parey sistenm *stars*, *stickers*, eksetera ki ti vin konman en fason rekonpans ou osi lankourazman pou bann etidyan ki fer ki zot *compete* pa rantre zot me zot *compete* ek zot prop lekor.

Ozordi mon'n ganny 50, demen mon ava fer sir mon ganny 55, lot semenn mon ava monte mon ava vin 75 e sa i ava kontinyen. E sa fason osi i en fason byen prepare pou bann zanfan primer antre dan segonder.

Ki bann nivo metod ki zot pe ankouraz bann ansenyan fer lo nivo segonder, pou gard sa menm *rhythm* ki zanfan in sorti avek dan primer, ki pous zot pou kontinyelman fer pli byen pou relev nivo ledikasyon e ed

zot anmenn pli bon rezilta?
Mersi.

MR SPEAKER

Mersi Onorab. Minis.

MINISTER JUSTIN VALENTIN

Mersi Mr Speaker. Mersi Onorab pou ou keston onorab mon parey mon'n dir taler, nou osi pe demann bann ansenyan pou zot o nivo zot laklas, o nivo zot lekòl, rod bann solisyon. Pa tou solisyon, ki nou pou kapab enpoze lo laklas lo lekòl, parske pa tou solisyon ki marse dan tou konteks.

Alors bann lekòl - Bann lekòl mon konfortab e mon konfidan ki ler bann *teachers* i zwenn ansanm kot zot lekòl zot annan en lafors. Me petet oparavan nou pa'n petet donn zot sa lasirans ki sa lafors i for.

Mwan mon pe vin avek sa lasirans pe dir ek *teachers* pran en kou kontrol lo zot laklas.

E se sa fondamantal nide par deryer sa '*teacher voice*' *forum* ki nou koz lo la. nou, nou apel li *the 'school-based teacher-led' Forum*. Me *teacher* kort lekòl pe apel li en *teacher*' *voice forum*.

Pa zis e mon fer kler i pa en *forum* pou nou pik *management* dan ledò. Me i en *forum* pou nou rod solisyon. Pou *teachers* rod solisyon pou

bann problem ki pe arive o nivo son laklas.

E nou konman bann zofisye Minister Ledikasyon prezan, nou vini pou nou apiy lekòl avek zot bann solisyon ki zot pe rode.

Si lekòl i santi poudir sa metod i marse dan son laklas, nou donn li sa permisyon, servi sa metod ki marse dan laklas. Donk segonder, primer tousala, menm pos-segonder nou pe demann zot dan sa platform lotonomi zot pe gannnen, pou zot osi donn lanmen rod solisyon pou sa problem.

Si en group *teachers*, i anvi petet fer en formasyon antre zot, zot konn sa formasyon zot vini zot demann nou sipor, nou pou apiye - nou pou apiye akòz nou anvi ki mouvman - mon servi sa mo *action happen at the school*.

E nou anvi sa i arive. E mwan konman Minis Ledikasyon, letan mon pe dir sa mon senser dan sa parkour. Mersi Onorab.

MR SPEAKER

Mersi Minis. Onorab Esparon.

HON REGINA ESPARON

Mersi Mr Speaker. Mr Speaker eski Minis i kapab dir nou si i annan an plas si i

annan en Polisi an plas pou ed bann zelev avek *special needs*? Sirtou letan *it comes to* legzanmen, *mock exam* sirtou bann legzanmen ekrire. Si i annan sa Polisi pou bann zanfan *special needs* ganny ede?

Parski dan legzanmen sa zanfan zis i ganny donnen sa papye e si i konpran sa ki lo la i konpran me si i pa konpran i ganny kit deryer. Mersi.

MR SPEAKER

Mersi Onorab. Minis.

MINISTER JUSTIN VALENTIN

Bon mersi Mr Speaker. Mersi Onorab pou ou kestyon. PS lontan ou pa ankor dir en pti keksoz ou kapab eksplik sa mon vwar ou ou'n eksplik sa. Mr Speaker mon ava les PS eksplik sa pti bout. Me an zeneral i annan wi.

MR SPEAKER

Wi PS.

PS ODILE DECOMARMOND

Mersi Mr Speaker. Mersi Onorab pou ou kestyon. Nou'n devlope en *guidelines* pou bann zanfan avek *special needs*. E ordinerman lekol letan zot annan en ka zot fer sa *request* baze lo sa ka spesifik pou

demande ki lasistans zot anvi pou legzanmen.

E sa i annan en Komite ki regard dan sa demann. E par egzanp si en dimoun ki'n ganny i annan en keksoz maladi *whatever* zot annan zot sertifika, e nou regard tousala e nou etabli ki lasistans ki sa zanfan pou kapab gannyen dan son legzanmen.

Pou lemoman nou pa pe kapab donn tou sa varyete lasistans parey pou en *special needs case*. Me selman sa ki nou pou kapab donnen;- par egzanp si en zanfan ki retarde, ki bezwen en pe letan an plis pou li kapab konplet son travay sa i annan son provizyon.

E i annan provizyon pou bann ki kekfwa ou bezwen lir lenstriksyon avek li bann kalite keksoz koumsa oubyen bann ki i annan en pti pe problemm vizyon kot nou bezwen *print* papye spesyal avek gro let, pou li kapab swiv son legzanmen. Enn de sa bann mezir ki nou annan. Mersi.

MR SPEAKER

Minis ou kapab azoute.

MINISTER JUSTIN VALENTIN

Mersi Mr Speaker. E Onorab nou anvi al en pe pli lwen ki sa. Par egzanp bann

diferan form *assessment* ki annan kot lekol.

Pou lemoman nou pe konsantre zis lo *paper and pencil test*. Mwan mon krwar e mon senserman kwa ki nou bezwen bouz osi dan bann lezot osi form *assessment*.

E sa bann *assessment* i osi bezwen annan en konponan ki ganny rikorde ofisyelman lo *score sheet* sa bann zanfan. Par egzant en lobzervasyon, bann ka pratik sa osi i enportan dan evalyasyon bann zanfan.

Donk nou bezwen bouz dan bann diferan metod lansennyman, metod *assessment (sorry)*, metod *assessment evaluation* pou fer ki ler ou pe evalye en zanfan i konplet. Mersi Mr Speaker.

MR SPEAKER

Mersi Minis. Onorab Romain. Onorab Adelaide.

HON FRANCOIS ADELAIDE

Mersi Mr Speaker. Bonzour Minis avek ou delegasyon, tou Manm Onorab, tou dimoun ki a lekout.

Dabor Minis mon oule remersye ou pou vin pas Baie Lazare dan ou parkour ler ou sorti Takamaka, e bann *staff* i vreman apresye i vreman bann sipor ki ou pe donn Minister

Ledikasyon an menm tan avek lekol Baie Lazare.

Minis mwan mon kekyon pou se ki ou konnen nou'n tande poudir nou pe demann tou bann ansarz pou *run* zot lenstitisyon parey en biznes.

E vi ki bann *headteachers* zot ki ansarz zot lekol e nou souvandfwa koz lo lotonomi, e petet mon pe demann ou vi ki nou pe dir primer i sa baz kot etidyan i konmanse, eski ou Minister pe mazine petet pou konmans avek sa lotonomi?

Petet donn *headteachers* avek *Council* sa posibilite pou zot swazir zot bann *teachers*. Akoz nou kapab fer li lo konmansman, vi ki la i labaz pou ki sa bann *staff* ki *teachers* avek *Council - headteachers* avek *Council* i *recruit*.

I bann *staff* travay de kalite ki ava vreman konmanse e pous sa zenn etidyan pou li konmans aprann byen ptipti, e petet dan segonder i zot kapab anmenn bokou plis rezilta. Mersi.

MR SPEAKER

Mersi Onorab. Minis.

MINISTER JUSTIN VALENTIN

Mersi Mr Speaker. Mersi Onorab pou sa pwennvi. Me selman sa ki mon kapab dir, ozordi nou pa ankor pare

konmsi pou les bann lekòl swazir zot *teacher* akòz petet i riske i napa ase sa varyete pou zot swazir ladan.

Alors nou ki nou fer, nou sey mentenir en serten ekilibasyon nou fer ki nou pozisyonn en pe bann *teachers* en pe partou, partou. Nou fer sir nou aziste zot kalifikasyon nou aziste zot performans *and so on*.

Me selman sa ki enteresan, se ki bann *Council members* avek bann *headteachers* i pran par dan *interview* ler zot pe *interview* zot bann *teachers* konmela.

E sa i en prosedir ki zot osi zot ganny sans par egzansp si i annan en *teacher* ki pe transfer ouswa en nouvo *teacher* ki pe vin kot en lekòl, sirtou bann ki fek *graduate*, zot ganny sa sans pou zot *interview* sa bann ansenyan.

Me sa ki pli enportan, me lefe ki ler ou'n ganny sa group ansenyan pou ou travay avek mentenir prezerv li. Mon pe rod sa mo la i la prezerv li. Manner ou prezerv li ankadre li byen. Fer sir ki baze lo sa bann Polisi ki nou pe anmennen, son *professional development* i mentenir.

Pou fer li kit li azour avek bann devlopman ou donn li akse avek bann keksoz ki pe

arive otour li, otour lemonn, ou donn li sa sans kot son lekòl, dan son laklas, pou li fer bann pti *experiment* ek son bann zanfan. Ou konpran mwan?

Annou - akòz ki pe arive nou'n tro santre lo i annan en legzanmen, i annan en legzanmen ki nou bezwen *pass*.

Mon krwar sa i sa keksoz ki osi detri en pe, detri en pe *learning* dan lekòl, akòz nou pe *focus* nou tou nou pe dril nou lekor pou nou pas sa legzanmen laba.

San ki nou realize poudir be non, i annan en group zanfan ki nou bezwen fer li devlop sa lanmour pou aprantisaz. Fer li konnen ki manner pou aprann. Ou konpran mwan?

Bon so mon pwèn ki mon anvi fer sorti la, se menm si ozordi nou pou napa sa liberte pou nou swazir sa *teacher* pran li kot en lekòl fer li vin *teacher* kot mon laba, koz ek li anba bol, konmsi konmdi koze, kas anba en lot lekòl pou ganny sa *teacher*, nou napa sa liberte pou fer sa.

Me ki nou annan, nou annan en liberte konman bann *manager at school level*, bann *governors*, zot annan sa liberte pou nou kapab ankadre nou *teachers* ki nou'n gannyan pou

fer li kapab reste kot nou lekol.
Mersi.

MR SPEAKER

Mersi. I reste mon de entervenans lo mon lalis. Mon pa tro anvè dezapwènt zot. Nou avè prolonz sa sesyon en pti gin. Me nou lo *borrowed time*. Onorab William.

HON WAVEN WILLIAM

Mersi Mr Speaker. Bonzour Minis. Bonzour tou dimoun ki a lekout. Minis mon'n ekout ou avèk bokou pasyon e latansyon.

Mon anvè demann avèk ou, lefe ki ou avan ou'n vin Minis, ou'n pas atraver sa lenstitisyon.

Eski ou santi poudir ozordi, ou pe ganny tou sipor bann lezot Lazans Gouvernman. Akoz parey ou'n dir ki mon dakor ek ou. Problenm ki nou pe fer fas avèk dan Minister Ledikasyon ouswa dan bann lekol, i pa zis problenm Minister Ledikasyon.

So eski ou santi poudir ozordi, par lefe ki nou'n fer tou sa bann resers, tou sa bann rapor, eski ou krwar poudir ozordi nou pe a dres problenm?

Akoz sa pou tou Manm Lasanble ozordi lenformasyon ki nou pe gannyen i en pti pe enkyetan pou nou fitir

devlopman zonn e fanm.
Mersi.

MR SPEAKER

Mersi Onorab. Minis.

MINISTER JUSTIN VALENTIN

Mersi Mr Speaker. Mersi Onorab pou ou kestyon. Mr Speaker nou pe devlop sirtou bann mon krwar sa i vizib lo medya nasyonal. Bann Minis nou pe devlop en travay kolaborasyon ki mon vwar sa i prometan i efektiv.

Par egzannp nou fer bann *joint* vizit, nou fer bann *team work*, bann *meeting* pou nou rod bann solisyon ansanm.

Mwan mon santi personnelman ozordi *as I speak* Minister Ledikasyon, pe kolabore e pe ganny bokou sipor. Mon pou dir bon sipor, bann diferan parti, bann diferan Minister. Akoz nou'n met sa konman enn nou platform pou travay.

Annou kolabor ansanm, annou rod bann solisyon kolektiv. E sa pe mars tre byen.

Donk mwan mon plito annan bon lespwar ki lafason ki nou pe travay, lafason ki nou pe rod sa bann solisyon, nou pou bezwen vwar en amelyorasyon dan sa prosedir lansennyman e laprantisaz.

Akoz sa nou target prensipal. Rod en amelyorasyon. E mwan mon target mon tenm ki mon'n swazir pou mwan bouz mon plan avek se *build the aspiration*, e apre fer sir ki laprantisaz rezilta laprantisaz i itil e vo lapenn. Mersi Mr Speaker.

MR SPEAKER

Mersi. Onorab Georges.

HON BERNARD GEORGES

Mersi Mr Speaker. Mr Speaker mon konnen letan i kont nou. E mon kontan Minis in reponn Onorab William en pti pe dan direksyon ki mon ti anvi anmenn li.

Minis nou'n koz bokou depi bomaten. Me mon krwar ki sa ki reste se ou bann statistik ler ou ti reponn kekyon Onorab Henrie i enkyetan.

I reste enkyetan. 40an apre en reform dan Ledikasyon isi Sesel kot nou'n annan *zoning*, kot nou'n annan *comprehensivisation* mon vwar nou performans i ankor *wanting*. Si mon kapab dir.

E mon pa pe blanm personn sertenman pa ou aköz ou i annan zis lan depi ki ou la, me mon krwar ki an zeneral popilasyon Sesel i

dezapwente ki nou pa'n fer plis progre ki in fer. Ki ankor enn fwa bann rezilta ki pe arive pa alaoter ki nou ti a kontan vwar.

Ou'n koz bokou lo bann rezon. E nou tou nou konnen sa bann rezon. Toulezan nou repas en pe lo bann rezon ki i annan pou fer avek etidyan zot menm;- ki i annan pou fer avek formasyon pou zot resevwar ki annan pou fer avek *curriculum* kekfwa lekol ki i annan pou fer avek kote zot ete, dan zot vwazinaz, dan lakour;- si zot annan sipor paran, eksetera.

Tousala se bann keksoz ki nou konnen. Dan de mo Minis e mon felisit ou pou vizyon ki ou annan pou ou vizyon personnel pou ou Minister Ledikasyon.

Me dan de mo eksplik nou ki mannyer avek en sistenm ledikasyon kot Minister pe pey pou sak etidyan en lekivalan sa ki i depanse dan en lekol prive, ou kekfwa menm plis, avek tou sa bann resours ki nou met a dispozisyon bann zanfan, avek tou bann rezon ki nou konnen aköz zanfan pa perform pli byen;-

Ki mannyer eski dan sa 4an ki devan ou, avan prosen eleksyon ou krwar ki ou pou kapab anmenn en lamelyorasyon pou ki lannen ale, lannen vini nou pa pou ganny bann rezilta

dezapwentan sorti kot Minister Ledikasyon? Mersi Mr Speaker.

MR SPEAKER

Mersi, mersi Minis. Minis sey gete ki ou kapab fer avek de mo si ou pa kapab, petet 22.

MINISTER JUSTIN VALENTIN

De mo Mr Speaker. Mersi Mr Speaker. Mersi Onorab pou ou sa pou pous mon lo bor miray. Sa de mo ki mon pou dir e ki nou pa ankor fer, met pouvwar dan lekol. Fer lekol vin solid.

E mwan mon anvi konsantre dan laklas avek bann ansennyan. Dan laklas. Donn zot sa pouvwar, pou zot donn lanmen fer sa sanzman

E mon dezyenm mo dan sa 2 mo, se relevans *curriculum*. Relevans *curriculum*. Nou anvi ki *curriculum* i relevan pou sa zenerasyon ventyenm sek. Kontenir e osi son prosesis pas sa *curriculum* avek sa bann etidyan. Mersi Mr Speaker.

MR SPEAKER

Mersi. Onorab Gill. Si ou kapab fer li vitman, mon ava permet ou kestyon. *Brief please.*

HON CHURCHILL GILL

Mersi Mr Speaker. Bonzour Minis ek ou delegasyon. I pou tre kourt aköz en bout dan mon

kestyon Minis in nonmen se relevans *curriculum*.

Alors mwan mon kestyon pour Minis menm si ler ou'n fini ganny sa *curriculum* ki oule, i relevan. Mon santi aköz depi ler mon'n ekout bann larepons mon pa'n tande dir ki bann *teachers* a serten pwen, i annan serten evalyasyon ki ganny fer lo zot, aköz kestyon ti lo P6. Petet avan P6.

Avan etidyan i ariv P6 eski i annan bann lankadremman evalyasyon pou *teachers* lo sa bann *curriculum* ki zot pe servi ozordi, i ler manrmay in ariv P6 nou pe vwar nou, nou pe ganny bann rezilta koumsa?

Mon santi i devret annan en ankadremman evalyasyon *teachers*. Petet sak *step* anmezir etidyan i monte, e ler ou'n ganny sa *relevancy curriculum* mon krwar avek sa i ava pli fasil pou raport en rezilta. Mersi.

MR SPEAKER

Mersi Onorab. Minis ou adres sa vitman silvouple.

MINISTER JUSTIN VALENTIN

Mersi Mr Speaker. Mersi Onorab pou sa kestyon. Onorab dan sa prosedir, dan sa plan ki mon ti prezante, nou osi koz lo bann diferan proze ki nou pou fer pou devlop laprantisaz.

Byensir i pa detaye, me i annan. Me i annan bann proze ki ler i pou ganny devlope, byensir si fodre evalye bann ansenyan kontinyelman.

E la mon retourn lo en travay ki mon ti fer avek dan lepase. Mon ti osi get *readiness* bann *teachers*, pou zot pas sa *curriculum* avek bann zanfan. Sa i enportan sa.

E si zot pa *ready*, ki mannyer nou prezan nou form zot. E mon koz dan premye larepons. ki mannyer *SITE* ki rol *SITE* dan sa prosedir pou li kapab ankadre bann *teachers* pou donn zot sa formasyon, sa konpetans neser ki zot bezwen pou zot bouz Ledikasyon lo en lot nivo. Mersi Mr Speaker.

MR SPEAKER

Mersi Minis. Bon nou pou termin la pou sa sesyon. Nou pe rebran travay 11er en kar pou larestan kestyon.

Minis mon pe remarke ki ankor annan en kestyon ki enplik prezans Dr Decomarmond. So mon ti ava sizere ki i pran sa apre e an menm tan si ou lot zofisye Bernard Arnephy i kapab antre, nou ava pran Kestyon *Without Notice*, nou fini avek Dr Decomarmond apre nou ava al lo lot kestyon.

Si ou kapab aranz sa, i ava mars byen. Mersi nou ava rezwenn 11er en kar.

MR SPEAKER

Mersi *next question please* i Onorab Egbert Aglae.

HON EGBERT AGLAE

Mersi Mr Speaker. Ankor enn fwa bonzour Minis avek ou *panel* e Mr Arnephy.

Mr Speaker avan mon demann mon kestyon, permet mwan zis pou pas mon sener kondoleans avek lafanmir Germain e lafanmir Tamboo, Auguste swivan sa de lanmor ki'n ariv dan distrik Port Glaud yer.

Eski Minis i kapab dir ek sa Lasanble konbyen *teachers expat* ki aktyelman pe *teach* dan nou sistenm skoler piblik? Konbyen Seselwa ki pe swiv formasyon pou vin *teachers*? Ki target ou Minister an se ki konsern annan plis *teachers* Seselwa dan nou sistenm skoler? Mersi.

MR SPEAKER

Mersi Onorab. Minis.

MINISTER JUSTIN VALENTIN

Mersi Mr Speaker. Mersi Onorab pou ou kestyon. Mr Speaker an se moman, i annan 270 *teachers expatriate* ki

aktyelman pe ansenny dan nou sistenm skoler piblik.

17 dan primer, 223 dan segonder, e 30 dan bann sant profesyonnel.

Mr Speaker, an se ki konsern konbyen Seselwa ki pe swiv formasyon pou vin *teachers*? An se moman i annan en total 87 etidyan Seselwa ki pa ankor antre dan servis ki pe swiv formasyon pou vin ansenyan kot *SITE* an plentan.

E an plis i annan 16 ki lo *Aspiring Teacher program* kot *SALS*. Dan sa group 87 etidyan, 56 pe swiv formasyon pou vin ansenyan primer, 31 pou vin ansenyan segonder.

An se ki konsern etidyan ki dan lanplwa, i annan en total 201 ki pe swiv formasyon o nivo Diplonm, Degre, *PGC* e *Master* an plentan oubyen an tan parsyel.

133 ansenyan primer pe swiv formasyon kot *SITE*, 49 pe swiv formasyon dan Liniversite Sesel, e 19 aletranze. Sa norm pa enkli sa 18 manm zesyon lekol ki pe swiv kour o nivo *Masters in Education Leadership* avek *UniSey*.

Ki target mon Minister an se ki konsern annan plis *teachers* Seselwa dan nou sistenm skoler.

Mr Speaker target Minister Ledikasyon, se ki annan en ansenyan avek omwen en Diplonm dan tou nou laklas. Dan sa prosen 10an annan en ansenyan Seselwa ki annan en degre dan sa size prensipal ki pe ansennyen lo nivo segonder.

Mon rekonnèt ki Minister Ledikasyon li tousel pa pou kapab realiz sa target. I pou bezwen en travay kolektiv e en zefor nasyonal.

Nou'n konmans sa parkour pou atrakte ansenyan. Sa regilasyon pou en konsey ansenyan ki nou ti lanse le 4 Oktob i enn parmi sa bann letap.

Nou pe osi vwar *package* bann ansenyan. E fer li vin pli atraktif e relevan. Mon osi anvi revwar sa konteks dan ki ansenyan i travay. Mon anvi bann ansenyan ki kontan zot profesyon, mon ensiste ki sa '*school-based teacher*' forum pou ed nou reisi sa lobzektif. Mersi Mr Speaker.

MR SPEAKER

Mersi Minis. Mon regrete mon pa'n ganny lord egzakt lev lanmen. Nou pou prosed en pe balanse. Premye Onorab Romain. A eskiz mwan, pa ti ankor demann siplemanter

Onorab Aglae. Wi Onorab ou siplemanter.

HON EGBERT AGLAE

Minis mon pou dir ou mersi pou ou bann larepons. Minis premyerman mon ti ava kontan demann ou fas a sa lakantite *expatriate* ki ou deza annan, ki pe *fill* sa bann pos.

Eski ozordi nou sityasyon, mank *teachers* dan lekol, pou kapab dekrir koman i anba kontrol, fas avek mannyer nou sistenm skoler pe *operate* ozordi, sirtou avek bann gran lekol.

Dezyenmman ou'n tous en pti gin lo kote *package*, *bann teachers*. Eski Minister i an diskisyon pou osi annan en pti pe sa *fairness* dan sa *package*, kot i konsern en *expat* ki pe ganny ki pe vini pou li kapab zis dan nou sistenm skoler ek enn nou *teachers* lokal, pou fer ki avek bi atrakte ankor en pti pe plis nou bann *teachers* pou zot reste. E ankouraz bann nouvo pou swiv sa formasyon li menm?

E dernyen mon ti ava kontan demann ou Minis, enn bann faktor petet ki dekouraz *teachers* osi pou reste dan profesyon, i en pti pe avek *the conducive learning environment* kot bann letablisman lekol.

Eski petet ou pe mazin vwar en pe lafason ki zot kree en lanvironnman skoler, sirtou an balans avek etidyan e li menm avek ladministrasyon lekol, pou fer ki i annan sa konprenezon dan en fason o nivo, ki i ankouraz *teachers* li menm li pou reste?

Ki ler i vini bomaten i pa neserman pe vin avek en latet fatige, ouswa pe ganny en malez ler i pe al antre dan sa baro lekol li menm? Mersi mon krwar ou pe konpran mwan ki mon pe dir Minis.

MR SPEAKER

Mersi Onorab Aglae. Minis.

MINISTER JUSTIN VALENTIN

Mersi Mr Speaker. Mersi Onorab pou ou kestyon. Premye kestyon se eski mankman *teachers* i anba kontrol, ouswa eski kantite *teachers* ki nou annan i anba kontrol?

Non, i pa anba kontrol. Akoz nou, nou ti ava voudre annan plis *teachers* Seselwa ki zwenn bann lenstitisyon skoler. E parey la semenn pase mon'n fer mon'n lans en lapel osi avek bann zenn, pou zot osi konsider zwenn lansennyman koman en profesyon.

Dezyenm kestyon se sa *fairness* ant *expatriate* avek Seselwa sa sirtou dan konteks saler.

Mr Speaker sa i en konteks ki mon'n zwenn. Ti la. E byensir nou bezwen get ladan, aköz nou pa neserman aksepte ki i annan sa *unfairness*.

I annan mon krwar bann dimoun pe koz lo lapey. Nou pou bezwen revwar tousala tou sa bann *package*, revwar *package teachers*, met li e an menm tan nou pa anvi defavoriz okenn group dan sa prosedir.

Me selman Minister Ledikasyon la i angaze, pou fer sir ki nou met sa diskisyon *package teachers* lo latab osi.

E ankor trwazyenm kestyon, i koz lo *conducive learning*. Mon retourn ankor lo sa plan ki mon'n prezante. sa konteks lotonomi kot lekol, sa konteks '*school-based teacher-led*' forum, i sa konteks osi ki pou donn sans *teacher* koz lo son kondisyon travay;-

Koz lo konteks kot i pe travay, pou fer ki i devlop en latmosfer kot li i kontan vin lekol. E osi son bann zanfan i kontan pou vin etidye kot lekol. Mersi Mr Speaker.

MR SPEAKER

Mersi Minis. Wi Onorab Romain i ou trou prezan.

HON GEORGE ROMAIN

Mersi Mr Speaker. Bonzour Minis ek ou *panel*. Mr Speaker mon kestyon Onorab Aglae ti'n konmans tous en pti pe lo la.

Me selman an gro mon ti oule demann Minis, an vi ki nou konnen nou pe ganny sa problenm *teacher* Seselwa ki nou annan ki pa ase dan lekol, bokou etranze pe antre pou pran sa karyer.

Nou konnen kategorikman ler ou par en *teacher* Seselwa ek en etranze i annan en gran diferans parey Minis fek eksplike.

Ler ou kalkil en etranze byensir i kapab vin ek son msye oubyen ek son madanm ek son bann zanfan, son zanfan i lekol dan *state school*, i ganny lozman, i ganny fasilite pou ki li byensir reste Sesel.

E sa mon santi definitivman i pa pou ede kekfwa dan en serten sans aköz *package* ki sa lokal pe gannyen, pa pou ede fer li reste konman en *teacher* dan lekol.

E alors an vi ki nou annan sa bokou kou ki koute pou anmenn *expatriate* dan nou pei, mon santi ki lo kote Gouvernman pou benefisye long term.

Alors mon pe demann Minis nou bezwen fer en keksoz la, plito nou dann nou Seselwa en pti pe pli bon *package*, ki nou ava koup lo sa etranze ki savedir nou pli nou Seselwa i ava reste dan lekòl.

Mon kestasyon Minis, mon konnen ou okouran *about* sa size byen, ki vreman Minister Ledikasyon pe fer pou vreman atrakte nou bann zenn Seselwa, oubyen nou bann Seselwa ki deza dan *teaching* la pou lemoman pou reste dan sa karyer? Mersi Mr Speaker.

MR SPEAKER

Mersi Onorab Romain. Minis.

MINISTER JUSTIN VALENTIN

Mersi Mr Speaker. Mersi Onorab pou ou kestasyon. Mr Speaker letan mon pou konmans sa lentervansyon osi la, mon pou mon ti ava kontan ki bann ansenyan *expatriate* nou rekonnèt zot lafòrs e zot volonte, zot kouraz ki zot pe anmennen dan transformasyon osi dan sistenm skoler dan Sesel. E sa i tre byen.

E mwan mon'n benefisyè konman en ansyen etidyan, mon'n benefisyè avèk lafòrs e kouraz bann *expatriate*, e i annan ankor ki pe donn otan.

Me an menm tan nou rekonnèt ki sa kou parey Onorab pe dir, i ti ava swetab ki sa kou pa neserman parey i ete. Me ou konnen pou fer vini en *expatriate* i demann en kantite.

An se ki konsern saler. Letan ou get saler, i pa tro napa tro disparite ek saler. Me problem se ki bann lezot benefis ki *expatriate* i gannyan, sa ki fer sa *package* en pe pli bel.

Mon'n deza lans serten konvèrsasyon par egzanp. Mon'n deza dir avèk bann ansenyan, si dizon dan zot lekòl i annan 4 laklas ki ou pou bezwen dizon fer vini en ansenyan pou *teach* sa 4 laklas. Dizon mon pe koz en size parey en size spesyalize parey dizon matematik, lasyans.

E kot sa lekòl dizon i annan 2 ou 3 *teachers* ki pare pou rezourd sa problem an servan redonn zot - reget zot saler pou rezourd sa problem.

Pou mwan sa i bokou pli efektiv, ki ou pou fer vini dizon en *expatriate* pou vin fer 4 laklas. Servi 2 ansenyan pou rezourd sa 4 laklas, i en keksoz ki nou kapab konsidere e ki mwan mon pe demann bann lekòl dan sa bann konteks koumsa pou konsidere.

E mon'n menm lans en deba dan Minister Ledikasyon, mon'n demann zot annou sey mazin - annou sey mazine en kou, fer krwar nou pa kapab fer vini *expatriate* pou vin *teach* dan Sesel. Meton nou pa kapab fer vini. Ki mannyer nou kapab rezourd sa problemn?

Annou annan 2 konteks annou annan en konteks kot la normal ki nou pe nou fer vini *expat* e annou osi annan en konteks kot nou pa kapab fer vini, ki nou fer?

Annou rod bann solisyon. E ankor rod solisyon. Nou pou napa swa. I annan bann keksoz ki nou tro kit li konman bann keksoz envaryab, nou pa oule sanze. Par egzantp ler lekol, i reste aköz i bezwen reste 8er-2er edmi.

Lekel ki pou kondann nou si nou bouz sa ler lekol? I bann keksoz ki nou bezwen mazine. So pou nou rezourd sa problemn laprantisaz *expatriate*, i pa zis en zafer fer vini *expatriate*, me i osi bouz lezot keksoz.

Sanmdi - lekel aköz Sanmdi byensir i annan serten larelizyon ki pa permet zot travay ouswa lekol dan Sanmdi.

Me nou aköz nou bezwen fini 2er edmi, aköz nou pa fer sa pli long? Dakor? Bann vakans ki ou donnen, ki mannyer ou

kapab re-aziste bann vakans? Ou konpran mwan?

Par egzantp la, la nou'n fer en nou'n antre dan en staz kot ti annan *COVID*, nou'n vwar ki laprantisaz pe ganny deroule lo en baz vin sa semenn pa vin lot semenn.

Nou pa ankor fer en letid syantifik pou rod son lenpak lo la, lo aprantisaz. Me i pa pe donn nou en lendikasyon ki pa pe marse. Laprantisaz pe marse

So i annan bann keksoz ki nou ki krwar i envaryab, nou bezwen bouze. Nou bezwen bouze, nou bezwen sanz li. E pou mwan sa i fantastik.

Donk nou bezwen osi pe demann nou bann ansenyan pou zot petet revwar lafason ki ansanm zot rezourd bann problemn mankman *teachers* lo zot lekol, vin ek en propozisyon.

E mwan konman Minis Ledikasyon, mon kontan get propozisyon. E nou koz lo propozisyon si i byen e i fer sans nou enplimante san okenn difikilte. Mersi Mr Speaker.

MR SPEAKER

Mersi Minis. Onorab Uranie e i a swiv par Onorab Letourdie silvouple.

HON ROCKY URANIE

Mersi Mr Speaker. Bonzour Minis avek ou delegasyon. Bonzour tou koleg Onorab e bonzour spesyal pou tou bann *teachers* ki a lekout.

Minis ki manner *recruitment* pou bann *expat* i ganny fer? Eski nou rod bann *expat* ki *fresh*, savedir ki fek sorti Liniversite pa vreman annan leksperyans *teaching*, oubyen nou servi bann ki deza pe *teach*?

Mon lot kestyon kantite letan en *expat* i ganny met lo probasyon ler i vini? E si i pa pe performen, eski sa *MOU* i donn zot difikilte pou fer li retourn dan son pei?

E apre apepre konbyen larzan i pe kou Gouvernman pou retenir tou sa bann *expat* ozordi dan Sesel? Mersi.

MR SPEAKER

Mersi Onorab. Minis wi.

MINISTER JUSTIN VALENTIN

mersi Mr Speaker. Mersi Onorab pou ou kestyon. Onorab i demann mon ki manner *recruitment* i ganny fer?

Mr Speaker a sa pwen mon pou dir ki manner *recruitment* ti ganny fer. Akoz depi kot ler mon'n vini nou pa ankor entre dan *recruitment* bann *expat*. *PS* i annan

lenformasyon pou lo sa ki manner ti ganny fer.

E byensir tou keksoz, mwan mon dan en faz osi kot nou revwar bann keksoz ki manner in ganny fer. Si i neserer pou fer bann sanzman dan lafason ki i pe ganny fer nou a ganny fer.

An se ki konsern, bann *MOUs* mon pa krwar i devret annan okenn *MOUs* ki anmar lanmen en sistenm pou li pa progrese. Si ou'n fer vini - e sa mon krwar i dan tou profesyon, ou'n fer vini en *expatriate*, apre en serten letan ou vwar li pa pe donn rannman ki ou ti anvi i donner, mon krwar i annan sa posibilite pou remersye li.

Donk vwala sa de pwen ki mon anvi koz lo la an se ki konsern kestyon Onorab. mMe petet Mr Speaker si ou ava les mon *PS* i ava entrodwir ki manner sa prosedir pou anmenn en *expatriate* Sesel i ganny fer? Mersi.

MR SPEAKER

Tre byen *PS* oule adrese?

PS ODILE DECOMARMOND

Mersi Mr Speaker. Mersi Onorab pou ou kestyon. I annan diferan kategori letan nou koz lo *expatriate*. I annan *expatriate* ki nou rod atraver *MOU*, me i annan ki nou zi bann

ki *apply online*, e la nou annan en prosedir *interview* kot nou fer ordinerman nou fer nou ti pe fer en *Skype interview*, kot nou ti ganny sans enterakte. E apre la ki nou fer prosedir pou zot vini.

Tou *expatriate* ki vini zot ganny mete lo en probasyon 6 mwan, menm parey avek nou bann *new recruits* lokal.

Letan probasyon in fini si i annan ki bezwen en *extension of probation* nou fer, e la en evalyasyon i ganny fer. E parey Minister in dir menm anba en *MOU*, si i annan performans ki pa alaoter prosedir i ganny fer pou zot retournen. Mersi Mr Speaker.

MR SPEAKER

Mersi *PS*. *Ok* en klarifikasyon Onorab Uranie, annou fer li vit.

HON ROCKY URANIE

Wi mon krwar en kestyon konbyen i pe kout Gouvernman pou tenir sa bann *expatriate*?

MR SPEAKER

Wi Minis oubyen *PS*. Eski zot annan repons?

MINISTER JUSTIN VALENTIN

Mersi Mr Speaker. Mersi Onorab. *Ok* konbyen i kout, nou napa sa sonm egzakt. Me selman sa ki nou konnen par

mwan *on average* i omwen R35 mil pou kit en *expatriate* dan lekol, omwen.

MR SPEAKER

Mersi Minis. Onorab Letourdie.

HON JANY LETOURDIE

Mersi Mr Speaker. Bonzour tou dimoun. Minis mon kontan sa kotasyon ki dir i annan zis en metye, ki tou lezot metye i bezwen pas atraver, e sa se metye ansennyan.

E alors i montre ou ki poudir en ansennyan li son sa keksoz ki i annan pou fer, i depas tou bann baryer ki i annan pou fer li fer dan son lavi toulezour. I bezwen ale e i bezwen kontinyen donn sa ledikasyon nou zanfan.

E ou konman en ansennyan, e prezan Minis Ledikasyon avek ou lekip mon swete ki ou vreman zot vreman avek sa nouvo Gouvernman osi ou vreman anmenn en bon rannman, en bon *way forward* pou ki a lafen dizour nou kapab satisfè ki nou ganny nou bann *teacher* Seselwa e ki pou osi fer zot reste dan lansennyman.

Minis ou'n dir i annan sa '*teachers' voice' forum*. Kestyon ki mon ti ava kontan demande, eski sa kominikasyon pe vreman marse ant bann

teachers? Ki bann keksoz pertinan ki pe sorti?

E si bann keksoz ki *teachers* pe ganny anmenn met devan dan zot '*voice*' *forum* pe ganny adrese? Mersi.

MR SPEAKER

Mersi Onorab. Minis.

MINISTER JUSTIN VALENTIN

Mersi Mr Speaker. Mersi Onorab pou ou kestyon. E mon kontan ou komanter Onorab, akoz vre mon ansenyan, mon kontan sa profesyon, e mon kontan akey bann lezot dimoun pou vin dan sa profesyon.

La konman Minis lefe ki mon pe tanzantan pe demann bann dimoun pou vin dan sa profesyon, byensir mon pou servi sa lekspresyon mon pou lager lebra kase, pou mwan donn bann ansenyan en *good deal. The best possible deal.*

An se ki konsern ou lot kestyon i konsern sa *teacher forum* ki nou pe koz lo la. nou ti lans sa *forum 2* mwan pase.

E nou ti zwenn li premye mwan, mwan pase sa ti en lentrodiksyon zeneral kot bann *teachers* - sa ki enteresan bann *teachers* nou ti fer sa en zour Vandredi. E ler ti ariv 3er mwen zen kar tou *teachers* ti ankor anvi koze.

E 4er zot ti ankor la, nou ti anvi koze, e ti montre ou ki mannyer zot eksite pou zwenn sa *forum*, pou zot kapab vwar ki benefis i anmennen dan zot lansennyman.

Forum lo premye lentrodiksyon ti pe dir zot egzaktman ki nou anvi zot fer, ki zot rol ensidswit. E bann keksoz pou sa enn *forum* bann keksoz komen ti sorti.

Par egzanp, lapey *teachers* ti sorti, ki mannyer zot pou fer sanzman dan zot laklas, ki zot Lotorite, lotonomi, ki bor bout limit i arive.

Dezyenm *forum* pou ganny fer Vandredi ki pe vini. E la nou pe demann bann ansenyan pou zot - akoz mwan mon'n dir zot mon pa anvi fer azanda mwan, mon anvi zot ki anvoy bann pwen pou met dan azanda.

Akoz si mwan mon fer azanda, i pou en *forum* ki mwan ki pe donn leksitasyon bann parol. Me mon anvi zot ki pe dir nou ki nou anvi koz lo la.

Alors nou pe espekte ki ozordi, demen nou pou annan nou, nou set azanda ki pou'n vini. E la ti ava enteresan, si petet apre nou dezyenm *forum* mon ti ava kapab fer Lasanble ganny petet en nide atraver *Minutes Meeting* ki bann pwen ki ti ganny diskite.

E ki bann direksyon ki sa *forum* pe ale, mon ti ava kontan partaz sa avek zot. Mersi Mr Speaker.

MR SPEAKER

Mersi Minis. Onorab Vidot.

HON AUDREY VIDOT

Mersi Mr Speaker. Bonzour Minis ek ou delegasyon, tou Manm Onorab e tou manm piblik ki a lekout. En bonzour spesyal pou zabitan Roche Caiman.

Minis dan sa statistik zeneral ki ou'n donner pli boner, eski i posib pou ou dir nou Lasanble konbyen ansenyan etranze ki ansenny ledikasyon fizik dan nou sistenm skoler piblik?

Eski i annan Seselwa dan sa dernyen 6 mwan ki'n fer laplikasyon pou ansenny ledikasyon fizik? Si wi eski i posib pou ou fer nou Lasanble ganny sa sif konbyen laplikasyon zot in aksepte e konbyen zot in refize? Mersi.

MR SPEAKER

Mersi Onorab. Minis.

MINISTER JUSTIN VALENTIN

Mersi Mr Speaker. Mersi Onorab pou ou kestyon. I en pti pe spesifik ou kestyon, pou nou kapab donn ou en larepons byen detaye, nou pou bezwen

anvoy serten sif apre sa diskisyon.

Me sa ki nou kapab dir la a ler aktyel i annan en *expatriate* ki pe *teach* lansennyman fizik, ledikasyon fizik dan sistenm skoler. Ti annan de enn i ale i reste zis enn.

An se ki konsern konbyen laplikasyon ki'n vini e ki pa'n ganny aksepte, sa nou mon pa pou kapab donner a ler aktyel akoz mon napa sa sif.

Me selman sa ki mon anvi dir osi otour sa, ledikasyon fizik i en domenn kot nou pe rod, nou pe rod ansenyan. Akoz ki nou pe vwar nou pe vwar ki nou bann ansenyan ki fer ledikasyon fizik a ler aktyel zot pe en pe, pe antre lo larz, nou bezwen ranplas zot. Nou bezwen ranplas zot o fir anmezir.

E la mon pe fer en lapel avek bann zenn Seselwa ki anvi konsider ledikasyon fizik koman en karyer, alors nou pe apel zot. Mersi Mr Speaker.

MR SPEAKER

Mersi. Klarifikasyon.

HON AUDREY VIDOT

Mersi Mr Speaker. Zis en pti lenformasyon Minis, prenon kont ki Gouvernman pe fer reform. E nou konnen ki i

annan serten Minister ki petet par egzant pou get pou Spor, petet i annan serten travayer ki annan bann kapasite pou ansenny zanfann ledikasyon fizik, eski zot kapab travay an kolaborasyon ek sa bann Minister.

E vwar petet an term *training* lo nivo Ledikasyon osi ki zot kapab ofer sa bann etidyan. Prenon kont ki zot i annan lespas pou zot rod bann ansenyan pou *train* dan ledikasyon fizik. Mersi.

MR SPEAKER

Mersi. Minis ou ava adres sa silvouple.

MINISTER JUSTIN VALENTIN

Dakor. Mersi Mr Speaker. Mersi Onorab pou ou keston. Me Onorab toudswit mon pou dir ou wi nou fer sa, akoz i deza annan la omwen mon mazin en la deswit ki ti travay dan en Minister kot NSC, e an se moman la, i pe travay dan en lekol koman en ansenyan ledikasyon fizik.

Me sa ki osi nou bezwen note, ki pa neserman akoz ou fer spor ki ou pou kapab ou kalifye pou vin en ansenyan ledikasyon fizik.

E byensir si ou prezant sa lentere, sa lanvi, nou pou pare pou ankadre ou e form ou pou

vin en ansenyan parey nou fer avek lezot profesyon. Avek lezot ansenyan. Mersi Mr Speaker.

MR SPEAKER

Mersi. Onorab Monthy.

HON PHILIP MONTHY

Mersi Mr Speaker. Mon keston in ganny aborde tel parey taler par enn mon koleg *teacher* - mon krwar nou mazin en pe parey.

Me selman mon pou al en pti pe aprofondi ankor Minis. Akoz nou'n koz zis lo sa peryod probasyon pou bann *teacher* etranze.

Mon keston ki bann kriter oubyen sistenm evalyasyon performans en *teacher expatriate* ki annan an plas, pou determinen si son kontra i merit ganny renouvle oubyen non?

Eski sa prosesis pe ganny fer dan en fason ki serye, oubyen zis kontra pe ganny renouvle akoz nou annan en mank *teachers*? Mersi.

MR SPEAKER

Mersi. Minis.

MINISTER JUSTIN VALENTIN

Mersi Mr Speaker. Mersi Onorab pou ou keston. Wi probasyon i annan e kontra letan i renouvle i annan en

appraisal pou bann *expatriate* ki sipoze ganny fer.

E mwan mon pou ensiste ki sa i ganny fer. Anba mon gidans sa i ganny fer. E sa ki enteresan osi se ki nou ti lans en le 4 Oktob semenn pase nou ti lans en regilasyon pou regilariz profesyon lansennyman.

E sa i kouver osi bann ansennyman *expatriate* ki pe travay dan sistenm ledikasyon dan Sesel. Zot osi zot pou bezwen kapab ganny zot *license* rod zot *license* e fer sir ki zot kit li azour par rapor avek bann kriter ki sa bann regilasyon pe demande.

E sa pou fer ki ava annan en disiplin dan sa profesyon, pou ki dimoun i ava kontinyen bann ki anvi reste dan posesyon i ava kontinyen travay pou reste dan sa profesyon. Mersi Mr Speaker.

MR SPEAKER

Mersi Minis. Onorab Gabriel.

HON CONRAD GABRIEL

Mersi Mr Speaker. *Welcome* Minis. Bonzour Minis ek ou delegasyon. Bonzour tou dimoun ki a lekout.

Minis ou'n dir nou zot pe travay lo *package* pou revwar pou *teachers*. Nou konnen

poudir sa *Laptop Scheme* ti mars ase byen.

Mon pe zis demann ou eski petet zot pe mazine, zot pe mazine pe anvizaze pou met en *Housing Scheme* petet pou ankouraz plis *teachers*? E osi petet bann lezot pti *incentives* par egzanp *car loan* e osi bann pti *one-off loan* zis pou ed en pe bann *teachers*.

Aprè mon dezyenm Minis an pasan ou kapab zis donn nou en ledikasyon, apepre konbyen *teachers* lokal ki'n *resign* depi 2019 ziska la? Mersi.

MR SPEAKER

Mersi Onorab. Minis.

MINISTER JUSTIN VALENTIN

Mersi Mr Speaker. Mersi Onorab pou ou keston. Onorab ou'n fer propozisyon pou detrwa *incentive* ki nou kapab met dan sa *package*. Byensir nou pou konsidere.

Me bann *incentive* parey nou pe dir, i pa depan lo zis Minister Ledikasyon. I bezwen osi lo konteks Nasyonal, osi byen ki lo resours e kapasite finansyel en sosyete.

Me nou konman bann advokater, nou ki pe rod sa bann ansenyman, byensir nou pou fer sa bann propozisyon. Me apre i pou tout ki mannyer

bann diskisyon i deroule, e ki bann resours ki nou annan pou nou kapab fer ki sa bann demann i vin en realite.

E dezyenm pwen ou'n demann mwan lakantite *teachers* ki'n *resign*, depi 2019. Nou pa'n prepar nou pou sa enn larepons, alors nou ava fer ou ganny sa larepons dan dizon apredmen. Mersi Mr Speaker.

MR SPEAKER

Mersi Minis. Mon pou termin sa sesyon kestyon la. Akoz nou annan lezot kestyon pou pas lo la.

Eskiz mwan mon annan plizyer Manm ki'n lev lanmen, alor mon pa kapab fer lotreman mon bezwen en demi erdtan pou en dernyen kestyon. E mon annan en Kestyon *Without Notice* ki mon pou donn 5 minit, e i pou zis kestyon sa orizinal, pou napa siplemanter lo la.

Onorab Esparon, mon ava demann ou poz ou Kestyon *Without Notice*.

HON REGINA ESPARON

Mersi Mr Speaker. Eski Minis i kapab dir sa Lasanble kwa ki pe ganny fer pou amelyor sityasyon lekol Glacis, kot karya in anvair sa lekol, e bann lafnet e laport pe ganny afekte e konstitye en danze pou bann zanfan? Mersi.

MR SPEAKER

Mersi. Minis ou ava adres sa silvouple.

MINISTER JUSTIN VALENTIN

Mersi Mr Speaker. Mersi Onorab pou ou kestyon. Mr Speaker lekol Glacis ti ganny ofisyelman ouver an Mars 2016, e i ti ganny konstrir atraver en donasyon Gouvernman *La Chine*, e sa proze ti ganny sipervize par Minister responsab pour Litolizasyon Later e Labita sa letan.

Annefe depi son louvertir, i bon note ki Minister Ledikasyon in fer travay renovasyon lo sa lekol, ki enkli travay pou refer son sistenm elektrik, sanz *railing*, ranplas bann *tiles* ki ti pe poz en danze pou bann etidyan, ensi ki travay lo bann twalet.

Nou rikord i montre ki Minister Ledikasyon, in depans environ R9.2milyon lo sa lekol Glacis depi ki in ouver.

Dan bann vizit routin ki'n ganny fer kot sa lekol sa problemn *drywood termites*, in ganny idantifye, dan en fason stratezik. Pou nou byen kapab servi resours finansyel.

Mon'n demann bann zofisye pou fer en *assessment*, lo tou bann ka renovasyon e prioritez zot pou nou soumet pou ganny

finansman. Oubyen si nou annan en larzan nou rezourd bann ki pli nesaser.

Dan enn ka - dan sa enn ka, ek en menm ka, i aparet kot lekòl Baie Lazare ek lekòl Au Cap ki'n fini ganny rektifye. Mon pou donn sa de ka spesifik, lekòl Glacis e lekòl Baie Lazare latansyon pou fer ki Minister Ledikasyon i rod lekspertiz lokal, pou arive trouv en solisyon dirab e afordab.

Swa tret sa bann *frame* si kapab, ouswa ranplas zot konpletman. Nou annan deza en estimasyon provizyonnel, R2.7milyon pou ranplas bann *frame*, laport ek lafnet kot lekòl Glacis. Mersi Mr Speaker.

MR SPEAKER

Wi siplemanter tre vitman Onorab Esparon.

HON REGINA ESPARON

Mersi Mr Speaker. Minis an vi parey ou'n dir sa ti en donasyon *Sinwan*, ki kalite Polisi ki Minister i annan pou *supervise* sa travay letan pe ganny fer? Parey ou'n dir *housing* ki ti fer pou get sa *quality*, kalite materyo ki ganny servi pou konn son dirabilite.

Akoz problem i paret mwan sa materyo ki'n ganny servi i en materyo, ou kapab dir bonmarse ki pe kout

Gouvernman ser prezan. E dan limedya parski la nou pou annan 6 semenn vakans avek lekòl kot lekòl pou fermen.

Konmsi ki *how soon* ki sa travay pou ganny fer? Parske letan lekòl pou fermen ou konnen karya i manz anba li, lekòl pou fermen, letan lekòl pou reouver si keksoz pa ganny fer latansyon pa ganny mete lo sa bann lafnet la.

Ler Zanvye pou'n arive, bann zanfan pou'n tourn dan lekòl i pou'n pli pir ki i ete. Lafnet i deza pe konmans tonm par bout la. Mersi.

MR SPEAKER

Ok mon'n konpran ou Onorab Minis.

MINISTER JUSTIN VALENTIN

Mersi Mr Speaker. Mersi Onorab pou ou kestyon. Onorab i pou enportan, akòz nou osi nou en pe zennen, avek sirtou en lekòl ki ase nef e ki pe pas dan sa bann difikilte koumsa.

Donk i pou nesaser ki vre letan sa bann konstriksyon pe ganny fer sa bann donasyon pe ganny donner, ki nou bann ekspertiz lokal i met tou zot resours ansanm osi pou fer ki nou donn nou standar e lekòl i ganny konstri baze lo standar lokal e Nasyonal.

Parey mon'n dir mon pou donn latansyon sa de lekol. Akoz i annan lekol Au Cap - sorry lekol Au Cap in ganny rektifye. Lekol Baie Lazare e lekol Glacis, mon pou donn li latansyon pou fer ki si zanmen i annan en danze - en danze imedyat pou bann zanfan, nou pou fer sir ki nou rektifye li. Akoz byensir nou pa anvi apre pey lezot konsekans.

Alor nou pou revwar, nou pou reprioritiz bann renovasyon kot bann lekol e si sa enn ka spesifik i tonm dan sa lalis priyorite, nou pou bezwen donn li en latansyon spesyal. Mersi Mr Speaker.

MR SPEAKER

Mersi Minis. Avek sa mon ava remersye PS Decomarmond, PS Lesperance e osi Direkter Mr Arnephy pou zot partisipasyon e mon ava envit zot pou fer zot depar.

(PS DECOMARMOND AND HER DELEGATION WAS EXCUSED FROM THE HOUSE)

MR SPEAKER

Nou ava pran en pti poz teknik avan nou rebran delegasyon. Mersi.

Madanm Clerk ou kapab *alert media team* ki nou pe pran en poz teknik *please* mersi.

(technical break)

MR SPEAKER

Byen bonzour e byenveni bann zofisye ki'n zwenn Minis. Mrs Joelle Perreau *Vice-Chancellor of University of Seychelles*, Mrs Nadia Lauricourt *CEO ANHRD* e Mrs Aline Morel *Information Communication Officer*.

Nou ava pran kestyon 102 ki Onorab Woodcock.

HON WAVEL WOODCOCK

Mersi Mr Speaker. Bonzour Minis avek ou delegasyon. Mon kestyon i *comme swivan*;-

An vi ki anba Gouvernman presedan bokou bann *scholarship* ki Sesel ti gannyen avek bann pei zanmi pa'n ganny servi, ki Polisi nouvo Gouvernman kot i konsern bann *scholarship* ki nou ganny avek bann pei etranzer?

Dezyenm kestyon, ki ou Minister pou fer pou fer sir ki nou pa gaspiy sa bann *scholarship* ki nou gannyen dan lefitir? Mersi.

MR SPEAKER

Mersi Onorab. Minis ou ava reponn silvouple.

MINISTER JUSTIN VALENTIN

Mersi Mr Speaker. Mersi Onorab pou ou kestyon. Mr Speaker i kler ki dan lepase Sesel pa'n byen servi *scholarship* ki i ti gannyen avek bann pei zanmi.

Depi ler mon'n vin Minis sak nouvo Anbasader ki vin vwar mwan, i fer mwan realiz sa e ki zot dir mon Sesel pa bezwen zot *scholarship*.

Semenn pase pandan sa zournen *EU Seychelles Dialogue* sa komanter in leve.

Hungary, L'Espagne, UAE, Azerbaijan, L'Egypt, i legzanp sa bann pei kot Sesel pa'n neseserman pran tou zot *scholarship* dan lepase.

Ennler *comme* dir koze mon anbarase. E mon ankor pe kontinyen demande, parske pou Sesel akonpli son bann plan devlopman resours imen, i pou absoliman neseser nou kontinyen ganny sipor nou bann Pei Zanmi.

Kestyon Onorab se ki Polisi nouvo Gouvernman kot i konsern bann *scholarship* ki nou gannyen avek bann pei etranzer?

Mr Speaker Polisi se, plas etidyan konpetans dan tou *scholarship* ki nou gannyen e asire ki etidyan i konplet zot labours avek sikse.

Dezyenm kestyon pe demann mwan ki Minister

Ledikasyon pou fer pou evite ki nou pa gaspiy bann *scholarship*?

Mr Speaker i annan en plan stratezik ki nou'n konmans egzekite.

Premyerman Mr Speaker, Gouvernman pe siport devlopman en *manpower plan* pou sa prosen 5an. Responsabilite ANHRD se pou labours dapre sa menm *manpower plan*.

I neseser ki etidyan i ganny *counsel*, lo zot swa karyer e devlopman sosyo ekonomik pei. Bann *scholarship* ki nou gannyen ek bann Pei Zanmi i devret ganny klasifye detaye pou ki nou anliny li avek sa plan resours imen *the Manpower Plan*.

Atraver Minister Zafer Etranzer, nou pou travay ek bann pei ki donn nou *scholarship*, pou zot donn nou labours dan bann domenn ki anliny avek nou plan resours imen. Nou'n deza antre dan sa legzersis.

Sa ki ti manke dan lepase se swivi. Apre ki Lazans ti'n fer etidyan ranpli zot dosye e aplikasyon elektronik, ti napa en swivi pou verifye si vreman sa bann etidyan ti pe ranpli ouswa ki staz zot ti'n arive.

Mr Speaker mon konmans vwar en fri dan sa stratezi deza. Depi Zanbye ziska le 11 Oktob 2021 Gouvernman Sesel atraver Minister pour Zafer Etranzer e Tourizm, in resevwar en total 54 labours bilateral, miltilateral e formasyon a kour term.

Sa bann labours in ganny ofer lo nivo Diplonm, *Degree*, *Master*, e menm Doktora.

Parmi sa bann labours ki'n ganny pibliye, in ganny in annan en total 46 Sesel ki'n fer laplikasyon e ki'n fer Lazans *ANHRD* ganny en kopi zot laplikasyon.

Parmi sa 46 aplikan 25 in ganny ofer en labours. Parkont an vi ki laplikasyon pou lamazorite sa bann labours i ankor pe ganny fer, e i pe ganny fer *online* i ankor ouver, i annan posibilite ki nou ganny plis dimoun ki *apply*. E nou pa pou bezwen espere pou – (anfen nou pou bezwen espere) - pou gete ki kantite ki reisi dan sa domenn.

E nou osi anvi anmenn Liniversite Sesel dan sa parkour. Mon santi ki Liniversite Sesel i dan en bon pozisyon pou travay avek serten bann Liniversite, dan bann Pei Zanmi, pou fer ki bann program ki nou gannyen i a benefisye nou bann plan

resours imen. Mersi Mr Speaker.

MR SPEAKER

Mersi. Onorab Woodcock ou annan siplemanter? Mikro silvouple.

HON WAVEL WOODCOCK

Mersi Mr Speaker. Minis i sagrinan pou aprann ki anba Gouvernman lepase i annan sitan sa kantite *scholarship* ki nou bann zenn in perdi sa bann loportinite pou zot gannyen pou zot al fer zot letid aprofondi aletranze.

Me mon kontan lapros ki ou pe pran Minis, me petet si mon kapab demann en kestyon, i kler poudir ti annan en problem sinerzi osi antre Minis pour *Foreign Affairs* avek *ANHRD*. Akoz si ti annan tou sa bann *scholarship* mon prezimen k ti annan bann *MOU* osi in ganny sinyen ant Sesel avek plizyer sa bann pei.

Si nou ganny sa bann kantite *scholarship* dan lepase, ou'n mansyonn detrwa pei *Hungary*, *Spain*, *UAE* *Azerbaijan*, me ki'n arive, eski ti annan en mank sinerzi kominikasyon ant Minister pour *Foreign Affairs* avek *ANHRD*?

Ouswa eski *ANHRD* ti annan sa bann lenformasyon,

lenformasyon sa bann *scholarship*, zot pa'n kekwafwa fer en travay adekwat pou *ensure* ki bann zenn i antre lo sa *scholarship*.

Ouswa eski zis *Foreign Affairs* ki ti annan sa bann lenformasyon, e zot pa'n *communicate* sa bann kour avek *ANHRD*. Eski ti annan en pe sa defayans ant sa de Minister *Foreign Affairs* dan lepase e avek *ANHRD*?

Aprè ou'n mansyon en pe partenarya avek bann liniversite aletranze. Par lefe ki plizyer sa bann pei parey ou'n dir, i annan bann Pei Zanmi avek Sesel, zot in ofer sa bann *scholarship* dan lepase.

Me eski i annan konversasyon ki'n konmanse avek sa bann Pei Zanmi pou kekwafwa Liniversite Sesel i kapab ofer sa bann kour - konmsi en partenarya ek sa bann liniversite aletranze pou sa bann kour kapab ganny ofer kot Liniversite Sesel?

Parey nou annan Liniversite *Londres* plizyer i ofer bann kour parey pou Lalwa, e *Bachelor* dan Ladministrasyon Biznes.

Konmsi eski i annan sa konversasyon ki pe deroule a ler aktyel pou nou al lo sa dan sa direksyon? Mersi.

MR SPEAKER

Mersi Onorab. Minis.

MINISTER JUSTIN VALENTIN

Mersi Mr Speaker. Mersi Onorab pou ou kestyon. Mr Speaker mon ti ava kontan petet ki *CEO ANHRD* i eksplik en pti pe petet aköz ki petet in annan sa defayans dan sa prosedir.

E aprè les VC Perreau pou li elabor petet lo bann konversasyon ki i annan a ler aktyel ant Liniversite Sesel e bann lezot liniversite, pou nou kapab pran pli byen sa bann *scholarship* ki nou gannyen. Mersi Mr Speaker.

MR SPEAKER

Tre byen. *CEO ANHRD*.

CEO ANHRD NADIA LAURICOURT

Mersi *Minister* e mersi Mr Chair. Egalman Manm Onorab mersi. Si nou pou regarde *in the past*, ti annan en mank en pti kolaborasyon.

La ki mon pou dir se ki nou annan plis sa kolaborasyon e diskisyon ant nou e Minister Zafer Etranzer. Lo mon kapab dir e baz ki pli regilye.

Aprè o nivo Lazans, nou annan en dimoun ki fer *follow-up* ki asir *follow-up* bann

scholarship bilateral ki vini e nou pibliye.

Parey ki zot pou vwar dan Nasyon, lo nou *webpage*, nou annan tou sa lenformasyon ki konsern *scholarship* bilateral. E nou fer li nou devwar nou anvoy kot tou MDAs.

So tou MDAs i ganny en kopi *as well* tou *scholarship available*. Set en difikilte petet o nivo bann *scholarship* bilateral. Parfwa i konsern *the time frame, by the time* ou ganny sa *scholarship*, i *short*. *The time frame* i 2 semenn, ki petet pa pe donn ase sa letan bann aplikan *apply*.

Nou annan egalman sa ki pou fer avek son prosedir egalman, i pou en pti pe letan, laz ki serten sa bann *scholarship* pe demande. Zot annan en *time frame* i ganny etablir ki laz ki ou pou kapab *apply* li.

Mon annan osi sa laspe petet enn, lo kote mon pou dir *mindset*. Sa i en gran *issue* ki petet nou pou bezwen travay lo la en, lo kote *mindset*. Kot pou nou fer nou bann etidyan, oubyen piblik an zeneral konpran poudir en *scholarship* bilateral ek enn ki ganny ofer par Gouvernman i annan li menm valer.

Akoz serten i krwar poudir si sa i ganny ofer ek bilateral,

savedir i mwen enportan ki si Gouvernman ki pe donner. Non *it's the same*. I annan menm valer. Parfwa osi i annan sa *mindset* lo kote pei kot nou'n en pti pe *choosy*, kote nou pou ale e kwa ki nou pou *apply*.

Nou pran en legzanp kot nou annan ki donn nou en kantite *scholarship L'Inde* ki petet ou pa pe ganny sa kantite aplikan ki ou, ou ti ava voudre pe gannyen.

Son prosedir petet lo kote ki mannyer ou pou verifye lekel aplikan, oubyen ki kantite aplikan ki'n *apply*. Nou pe travay lo serten stratezi lo serten striktir ansanm ek *DFA*, pou nou vwar i letan en *scholarship* bilateral i ganny pibliye omwen nou kapab verifye lekel dimoun ou konbyen dimoun ki pe *apply*.

Akoz bokou sa bann bilateral i *online*. I pa pe permet nou *as* Lazans osi pou vwar petet lekel ki pe *apply*. E menm si nou ensite ek bann aplikan poudir a sak fwa ki ou pe *apply*, *at least* ou fer Lazans konnen poudir ou pe *apply* pou nou kapab *ensure* ou *follow-up*.

E *follow-up* i enn ki nou pe met bokou lanfaz lo la. E in annan serten mon krwar zis en amelyorasyon dan sa domenn, kot mon pran en legzanp ek *Hungary*, kot nou ti kapab

etablir poudir omwen si nou etidyan bann aplikan nenport ki aplikan ki pe *apply* sa *scholarship*, i annan en striktir an plas ki permet nou *unsure the monitoring*.

Wi nou'n annan en serten diskisyon ek *DFA* atraver tou *scholarship* ki vini i pas par *DFA* ki i normal. *At the same time* pe demann ek bann pei ki *once* zot konnen lekel nou bann aplikan ki *successful*, oubyen menm zot donn nou en kopi lekel sa bann aplikan ki'n *apply* sa bann *scholarship*.

So wi i annan en travay ki nou pe fer dan sa laliny, pou fer sir poudir tou bann *scholarship*, tou ki nou gannyen san eksepsyon i ganny servi o maksimonm.

E sa i en travay ki nou'n anvi entansifye sa kolaborasyon avek *DFA* e lezot nou bann *partenaire*. E parey ki *Minister* in dir nou'n annan *UniSey* la i an *Zen* pou nou kapab vwar lezot fason fer *as well*. Mersi.

MR SPEAKER

Mersi madanm. Nou ava pas lo *Vice-Chancellor University*.

THE VICE-CHANCELLOR JOELLE PERREAU

Mersi Mr Speaker. Bonzour Mr Speaker. E bonzour tou bann

Manm Onorab e tou sa ki pe swiv nou.

Pou mon i en loner premye fwa pou on vin la konman Liniversite Sesel. Donk parey Minis in dir, depi nou'n konmanse liniversite nou'n annan bann partenarya - parey Onorab Woodcock in mansyonnen avek par egzanp Liniversite *Londres*.

I pa *que* Liniversite *Londres* me nou'n annan avek bann lezot liniversite par egzanp dan larezyon a *La Reunion* oubyen lezot pei *Européen*.

Me sa ki nou remarke se ki liniversite nou manda se ede pou kit pei i devlope dan en fason meyer posib. E si nou kapab pas atraver diferan *mode* sa posibilite ki nou ofer, i byen.

E Liniversite Sesel an se moman nou osi nou dan sa kolaborasyon. Akoz bann diferan fason ki nou kontribye pou ki sa bann *scholarships* i marse, se atraver nou prop program par egzanp.

I annan lezot pei i annan deplizanpli pei e liniversite ki rekonnet nou Liniversite Sesel koman en liniversite kredib. Akoz nou ganny akredite pa zis *SQA*, me osi enternasyonalman akoz nou Manm en kantite lasosyasyon liniversite.

E donk zot pe fer nou konfyans pou ki a lenteryer nou bann program ki nou devlope isi, zot zwenn nou e nou fer li dan en sistenm co-diplomasyon par egzantp. Enn ki nou'n fer se avek *La France*, avek *La Sorbonne* ki nou'n devlop en program ansanm avek zot. Sa i e fason ki zot partisipe dan sa formasyon tout an restan dan Liniversite Sesel.

Me i annan en lot model ki i deza egziste dan Sesel avan, sa model *twinning*, kot ti annan bann etidyan ti fer par egzantp ek *Manchester* zot ti fer lan isi apre zot ti al *Manchester*.

I annan bann program par egzantp kot ti fer *Sussex* ti fer en morso isi en morso *Sussex*. E menm *La France* nou ti fer en bout nou formasyon Sesel e en lot bout an *France*. E tousala ti annan en konponan *scholarship* ki sa pei ti pe donnen.

E la nou nou'n antre dan sa demars pou nou kapab reentrodwir plizyer formasyon dan sa sistenm *twinning*.

E nou'n ganny aprozé - nou pe kontinyen ganny aprozé avek bann lezot liniversite, aköz sirtou depi ki *COVID-19* in konmanse i pli fezab pou tou liniversite dan lemonn prezant ki nou ofer sa bann formasyon

anliny, oubyen dan en sans ibrid.

Savedir zot fer li anliny i kapab avek sa lot liniversite. E isi Sesel nou bann *staff* akademi, ki donn sa soutyen sirplas pou ki sa bann etidyan i kapab kontiny sa program.

E nou'n fer sa a plizyer repriz notaman pou Ledikasyon par egzantp avek bann *headteachers* e nou'n ganny bann rezilta eksepsyonnél.

Savedir olye ki i deza zot pe ale zot kapab fer en formasyon ki en nouvo ki rekonnet dan tou bann pei *Commonwealth* isi avek Liniversite *Maurice* ek Liniversite Sesel. Donk i en sistenm ki pe avanse ki pe marse.

Nou annan osi bann kominikasyon pou kote tourizm. Nou annan osi demann pou langaz pou lezot kalite program ki Sesel i bezwen.

Ankor enn fwa ler nou swazir pou nou *partner* avek en lot Liniversite byen evidaman nou siny en Lagreman, me sa Lagreman i baze lo bezwen pei.

E realite ki nou pe fer avek la e ki nou, nou krwar nou pou fer fas pli tar avek, selon konsey ki nou gannyen sorti kot Minister Zafer Etranzer avek Minister Ledikasyon.

E nou vwar poudir ler nou konmans sa proze ki i annan en sans ki reel pou nou Nasyon, i marse aköz bann etidyan i fer nou konfyans ki sa formasyon ki zot pe gannyen i *genuine*.

E zot antre lo la e nou siport zot pou zot kapab fini li. Lo sa kote koumsa mon krwar i annan en kantite posibilite ki bann *scholarship* i ganny servi dan en fason pli realis.

Aprè Liniversite Sesel ki nou, nou anmennen pou permet bann etidyan antre lo sa bann diferan program ki nou ganny donner, nou annan en sistenm kot nou ki nou apel li en *academic support system*.

Savedir avan nou annan en *unit*, avan bann etidyan i ale lo sa bann *scholarship*, nou, nou donn zot soutyen, soutyen teknolozi, nou donn zot soutyen langaz, nou donn zot ki mannyer ou ekrir dan en nouvo akademik iniversiter, avan ler zot kapab *enrol* lo sa bann program.

E en lot sipor ki nou donner nou pe donn sa plis an plis, i annan program ki nou pe forseman ofer, me nou ganny servi konman en referans oubyen konman en garan pou sa bann etidyan ki pe *apply* lo sa bann program.

Par egzantp nou, preski tou le semenn nou ekrir en let

referans akademik. Aköz bokou liniversite, bokou pei i donn ou en *scholarship*, me i aksepte pou ou vin lo sa program, ziske ler konmsi sa en lot liniversite son koleg son kolaborater konmsi dan en sans dan nou pei, i ateste ki ou annan sa nivo pou ou antre lo sa program.

Par egzantp *Japon*;- *Japon* i enn sa pei ki nou fer sa. *Japon* in donn Sesel en kantite *scholarships* ki annan Seselwa pa'n pran oubyen pa'n gannyen. Aköz menm si i donn *scholarships* fodre nou dimoun i kapab ganny aksepte pou li swiv.

E ler nou, nou antre an *jeu* nou, nou donn zot en garanti akademik pou zot kapab swivre. Nou kontan ki i annan pa mal ki pe ganny aksepte an se moman.

Menm *L'Amerique* bann Liniversite *Americaïn* prezan zot demann nou referans pou zot donn sa bann dimoun bann *scholarships*.

I annan en program a Liniversite Sesel pou lenstan avek *L'Inde* par egzantp, ki'n tal dan nou liniversite sa program ...; setadir ki olye ki bann etidyan i al dan *L'Inde* pou al fer sa bann letid, zot kapab fer li isi menm dan nou liniversite atraver en sant ki'n fini enstale

- anfet in fini arive sa bann lekipman.

E i annan son prop sant legzanmen ladan. E olye donn 5 *scholarship* i kapab donn 50. I pa neserman en Degre 3an me i kapab 3 mwan i kapab 6 mwan dan tou domenn ki pa forseman ki nou, nou pe ofer.

Donk Liniversite Sesel i donn garanti avek *SQA* avek *ANHRD* ki sa i en program de kalite e ki zot pa pe zis *enrol* lo en nenport liniversite dan *L'Inde*.

Donk *High Commission* i travay avek nou pou asire ki sa en Seselwa ki pe pran sa.

E en lot keksoz ki mon ti kontan dir, se ki a lenteryer liniversite nou annan en biro ki apel *International Affairs* e sa biro i travay etrwatman avek *Foreign Affairs* e avek Minister Ledikasyon.

E toulezour *scholarship* nou osi nou gannyen. E i annan omwen pres 2000 etidyan Seselwa ki'n *graduate* avek Liniversite Sesel depi 2009 nou ankor pe anmenn zot oka ou zot enterese ek sa bann *scholarships*.

E nou, nou donn zot nou soutyen teknik. Nou donn zot en garanti ki si zot pe ganny problemm akademik ki nou kapab ed zot swiv program. E

nou'n vwar sa in benefisye en kantite dimoun.

Zis en dernyen keksoz, liniversite nou'n ganny en sit lo sa nouvo Komite pour *University of Transformation* ki *SADC* pe organize.

Savedir sak liniversite dan *SADC* ki annan en *niche* oubyen en forte, nou, nou ofer par egzantp nou dan lanvironnman, en lot pei *SADC* i ofer dan *engineering*, e nou kolabore koumsa. Donk vwala nou kontribisyon pou lenstan ladan. Mersi.

MR SPEAKER

Mersi Mrs *Vice- Chancellor*. Minis ou anvi azout keksoz?

MINISTER JUSTIN VALENTIN

Mersi Mr Speaker. Mon ti anvi fer en konklizyon sa ki se ki nou'n sezi sa problemm e nou pe prezan travay ansanm pou fer ki nou nepli gaspiy bann zoli labours, bann zoli sans labours ki nou pe gannyen.

E sa ki enteresan dan sa prosedir, nou bezwen osi pe *counsel* bann etidyan. Akoz lesansyel se etidyan ki pou benefisye sa bann *scholarship*. E pou fer zot vwar.

Ou konnen parey dan lepase ti annan etidyan ki ti *study* dan langaz etranzer. Nou vwar ki nou bann etidyan

konmela pa tro anvi anbisye pou fer letid dan bann langaz etranzer.

Be nou tousala i en *counselling* ki nou pou bezwen met dan zot, poudir annan en trwazyenm langaz dan ou lanmen, oubyen en katriyenm langaz dan ou lanmen i touzour en lavans si zanmen ou annan sa lentansyon pou travay dizon dan en striktir, ouswa dan en konteks en pe pli enternasyonal.

Donk *ANHRD*, *UniSey*, *SQA*, Minister Ledikasyon in zwenn ansanm pou nou rezourd sa problenm. E enn fwa pou tou fer ki nou bann etidyan i ganny labours. Pou zot kapab kontinyen zot letid sa ki Gouvernman pe donneren osi byen sa ki bann Pei Zanmi pe donn nou. Mersi Mr Speaker.

MR SPEAKER

Mersi Minis. Onorab Hoareau.

HON JOHN HOAREAU

Mersi Mr Speaker. Mr Speaker mon apresye lesplikasyon ki'n ganny donneren, i ase elabore lo preski tou size ki petet mon ti ava anvi adrese.

Me selman zis ki mon pe demande, eski i annan en serten demars *proactive* pou fer sir ki par egzantp bann *cost* ki

ganny ofer bilateralman i plito bann *cost post grads* avek *doctorate*.

So ki, olye ganny sa bann *course* ki pli o, nou ganny sa bann *course* ki en pe pli ba, *first degre courses*. Ki ti ava kapab ganny pli byen itilize par bann manrmay ki fek fini zot *A Levels*.

Apré si Minis ti kapab donn nou en pti pe detay lo si bann dimoun ki pe pran par dan sa bann labours, oubyen ki pe pran sa bann labours bilateral, si zot osi zot bezwen, siny *bond* avek Gouvernman, ki mannyer sa i marse? Mersi.

MR SPEAKER

Mersi Onorab. Minis.

MINISTER JUSTIN VALENTIN

Mersi Mr Speaker. Mersi Onorab pou ou kestyon. Annefe nou ganny *course labours scholarship* en pe lo tou nivo.

E parey mon'n dir, nou prezan, lefe ki i annan en pei ki pe pare pou donn nou *scholarship*, nou osi pou antre dan konversasyon ek sa pei pou demann li *scholarship* baze lo nou plan devlopman resours imen, pou li kapab si i oule donn nou en *scholarship*, donn nou dapre nou plan.

E sa mon krwar i pe mars byen. E letan par egzanp bann Anbasader ki'n vin kot mwan, nou'n koz lo sa difikilte, zot in dir mon, be sa i en keksoz ki zot kapab konsidere.

Alors si dizon i nesaser, akoz nou pa pou kapab neserman konsantre zis lo dizon lo *first degree*. I pou'n osi nesaser konsider lo nivo en pe pli avanse, *Master*, *Doktora*. Sa nou fer tre byen.

Epi dezyenm parti kestyon, mon pa konnen si, dezyenm parti kestyon i koz lo *bonding*. Annefe, sa ki nou pe dir, sa labours ki en etidyan in gannyen, i pa sa etidyan ki'n al rode. Se Gouvernman, Sesel ki'n al rode. Alor sa etidyan li, ou pe fer ou *commitment* pou ou travay e ou'n ganny sa labours.

Akoz annefe ou ti pe fer en promes pou ou vin kontribye dan devlopman sosyoekonomik pei. E se sa rezon lo ki baz ou ti ganny sa labours. Alors, e lo sa rezon lo ki baz sa *bonding* pe ganny mete.

Bonding fodre pa dimoun i war *bonding* koman en pinisyon, *bonding* me selman se en garanti, ou'n demann en sipor e nou pe dir ou koumsa, nou siport ou e nou pe ekspekte ki ou pe vin kontribye dan devlopman sosyoekonomik pei.

Malerezman, malerezman i annan en ta etidyan ki mon pou servi sa lekspresyon, in bar plas zot kanmarad e zot in al *study* zot pa'n retourn zanmen! Zot pa'n kontribye dan devlopman sosyoekonomik pei.

E mon krwar sa i pa neserman byen. E alor, mwan mon pe dir avek bann etidyan, kot zot ete, ki zot in ale, zot ti'n ganny *course* lo baz pou zot vin kontribye, i pa ankor tro tar pou zot retournen pou zot retournen vin kontribye dan sosyo, dan devlopman sosyoekonomik Sesel.

Akoz sa rezon zot ti ganny sa labours prensipal. E ozordi petet sanmenm sa rezon petet i en pe pli, i annan kriter en pe pli strik lo bann etidyan pou fer ki i annan sa mefyans, akoz ou per pangar zot pe ale.

E annan de ler ou santi bann etidyan pe vini, ou pe demann zot pou siny en *bond*, zot pe pas isi, say kontour. E deza ou pe santi poudir *day 1* zot komans pe donn ou sa sinyal si mon ganny sans mon pa pe tournen.

I pa byen. I pa byen pou bann ki pe vini, konpran mwan? So sa i en pwen ki mon anvi fer sorti. E parkont i annan etidyan ki pa'n siny *bond* enkli mwan menm, mon'n

retourner san okenn difikilte. Sa i normal. Bon, so mersi Mr Speaker.

MR SPEAKER

Mersi Minis. Onorab Cosgrow.

HON WALLACE COSGROW

Mersi Mr Speaker. Mr Speaker an ekout an larepons Minis taler, mon ti a kontan petet demann Minis, ouswa si CEO ti kapab eklersi, vi ki Minis pa ti la sa bann letan;-

Eski CEO, or Minis, or CEO atraver Minis i kapab dir nou kwa ki petet ti anpes Lazans oparavan pou met sa bann mekanizm ki CEO in eksplike pou kapab fer sir ki nou *capture* plis sa bann *scholarship*.

E nou fer sir ki nou *monitor* ant lazans avek *Foreign Affairs* pou fer sir ki plis sa bann *scholarship* i ganny itilize?

Apre dezyenm Mr Speaker, mon ti a kontan demann Minis, si i annan lenformasyon oubyen si i napa, si i kapab *provide* Lasanble, depi 1977 ziske lannen pase, konbyen *scholarship* ki ou Gouvernman ki ti la oparavan, in met a dispozisyon bann etidyan Seselwa?

Eski Onorab ki'n demann kestyon premye i en dimoun ki'n benefisyé, Onorab Woodcock? Mersi.

MR SPEAKER

Minis wi, mon pa konnen si ou oule pas laparol avek CEO.

MINISTER JUSTIN VALENTIN

Wi, Mr Speaker mon krwar premye kestyon mon a les laparol CEO. E apre dezyenm kestyon, mon panse Onorab sa pwen in bezwen leve enn fwa dan - sa statistik manke ou'n bezwen tande dan *Cabinet* dan lepase.

(laughter)

MINISTER JUSTIN VALENTIN

So nou pa pou retourner.

MR SPEAKER

Mersi. Bon CEO ou a pran laparol.

CEO ANHRD NADIA LAURICOURT

Mersi Mr Speaker. *Thank you Minister*. Mersi Onorab. Lo kote, taler letan mon'n koze o komansman, mon'n fer resorti poudir o komansman nou ti napa en dimoun ki petet ti pe *monitor* sa. Ti pe *monitor* bilateral.

Letan nou'n komanse, nou'n vwar wi, bilateral i enplik, set en prosedir *as well*. E menm o nivo aplikasyon, i annan bann etidyan, lo kote

aplikasyon i annan bann etidyan ki pou *call* ou pou ou kapab ed li. So ou bezwen kapab *as well* ed sa etidyan. E pou ou fer sa ou bezwen annan dimoun osi ki *available*.

E wi nou annan sa *Scholarship Unit* ki travay ek tou bann etidyan. Me nou konnen pou dir *the load also* i bokou.

La ki i arive, letan nou annan nou en dimoun ki pe fer sir poudir *once the scholarship* i sorti i ganny pibliye, i *monitor the closing*, i *monitor application as much as possible*.

E se li ki etabli kominikasyon, mon kapab dir ant nou e *the Foreign Affairs*. E sanmenm sa ki nou'n dir o komansman, petet osi, lo kote kolaborasyon, kordinasyon, in annan plis la. Lo kote sa 2 lenstitisyon.

E se sa ki permet ou annan sa *monitoring* lo kote ou bann *scholarship as well*. En keksoz petet i enportan, wi ki nou ganny en kantite *scholarship*. *At the same time* parey ki mon'n dir, *at the same time*, ou bezwen get ou bann dimoun ki pe *apply*.

E Minister in fer sa resorti, wi nou annan bann etidyan ki *apply*, petet zot nivo i pa pe *meet* sa kriter *as well*. So nou pou annan sa.

MR SPEAKER

Mersi. Wi Onorab Cosgrow, pa antre dan en largiman la. Si ou annan klarifikasyon *go ahead please*. *Go ahead*.

HON WALLACE COSGROW

Mr Speaker mersi. Mersi Mr Speaker. Mon santi mon dezyenm kekyon pa'n ganny reponn, akoz Minis in refer mwan ek *Cabinet*. Mwan mon pa'n demann kekyon pou *Cabinet*, mon demann kekyon pou pep Seselwa!

Minis si ou annan lenformasyon, ou dir pep Seselwa, si ou napa ou dir pep Seselwa osi. Mersi bokou!

(Interruption)

MR SPEAKER

Mersi. *Order* silvouple! Nou a kontinyen. Onorab Henrie.

HON GERVAIS HENRIE

Mersi Mr Speaker. Bonn apre midi tou dimoun. Mr Speaker mon'n apresye larepons ki, Vi-Sanselye Liniversite in donner.

Lo en kote nou kapab osi ranvers sa sityasyon zimlaz, bann keksoz koumsa ki ou'n koz lo la pou ed bann lezot sektor lekonomi pei.

Par egzantp si zanmen ou kapab antre dan en lagreman avek en Liniversite, ki li son bann etidyan i vin fer kantmenm 3 mwan, 6 mwan, isi Sesel, labote nou pei, zot pou kontan pou vini, lanvironnman, nou lanmer, zot kapab lwe lakaz. Ki-? Eski zot pe reflesir dan sa direksyon? Mersi.

MR SPEAKER

Mersi. *Vis-Chancellor* ou pou reponn. Minis.

**THE VICE-CHANCELLOR
JOELLE PERREAU**

Mersi Mr Speaker. Mersi Onorab pou sa keston. Wi sa i deza en keksoz ki nou fer. Nou ti a kontan fer li lo en pli gran lanpler. E nou pe travay depi *des années* pou nou kapab fer li vin plis, pli aktiv e pli reel.

Akoz nou'n annan par egzantp bann *l'échanger* ki'n profitab pou Sesel. Par egzantp avek *ETH Zurich* ki mon *hope* ki zot ti vwar, ki i fer trwazyenm fwa zot in vin Sesel. Zot ti vin pou *waste management* apre la zot in vin pou transpor.

E sa zot in vini menm si nou napa en gran group etidyan *Masters* oubyen Doktora. Me sa ki nou nou'n gannyen isi se ki i pa zis bann etidyan Liniversite ek *staff* Liniversite, me bann profesyonnel dan sa bann

domenn ki zot in vin travay lo la.

Zot osi zot in partisip dan sa mwan resers. E ler, sa ki byen ek sa proze, sanmenm sa ki nou nou'n siny avek zot, se ki a lafen zot toultan donn nou en keksoz an retour.

Savedir zot fer prezantasyon avek sa Minister oubyen sa Departman konsernen.

E sa bann propozisyon ki zot fer, i kontekstyalize pou Sesel e i kapab ganny servi dan sistenm. E zot an retourn zot ganny Sesel koman en laboratwar.

Akoz nou, nou grander i ed nou koman en Liniversite. Savedir ki zot pran nou parey en *sample*. Letan dan en lot pei ou bezwen swazir *sample*, Sesel i *already* en *sample*.

Donk nou'n benefisye en kantite par egzantp sa lannen avek sa proze lo transpor, ki pe ed nou. Donk zot vini, zot lwen lakaz zot menm, zot pey tou keksoz zot menm. Nou, nou ganny zis sa kote syantifik.

Lot *échange* ki nou'n fer se avek *La Suede* par egzantp. E *La Suede* nou'n ganny pou bann *lecturers*, me osi pou bann etidyan. *Lecturers* menm mwan mon ti al pas 1 mwan dan Liniversite *La Suede*.

Akoz ler ou en *lecturer*, ler ou pe travay dan en Post Segonder, ki ti nou ka, e pou ou vin travay dan liniversite, i annan en gran diferans. Donk *La Suede* ti ofer nou sa *Internship* si mon kapab dir, ki nou'n ale, nou'n ganny en biro koman en *lecturer*, nou'n al *teach* e nou'n aprann en kantite ki manner pou egziste dan en liniversite parey kot zot.

Me zot, zot vin Sesel osi, zot in *teach* isi e zot in fer resers an kolaborasyon avek nou. *From* sa nou'n kapab pibliye, akoz ou konnen, nou, nou bezwen pibliye enternasyonalman. E atraver sa bann relasyon ki nou annan, nou'n kapab pibliye e ganny rekonnet.

Me nou bann etidyan ti al pou 3 mwan. E ler zot in al pou 3 mwan, zot in menm aprann ki manner en *Learning Center* dan en Liniversite i sipoze ete.

Ki ozordi mon kontan, akoz i annan enn sa etidyan prezan i pe travay ek nou. E i pe donn nou bann propozisyon ki manner nou pou amelyor nou *library* isi.

E nou *library* ler nou pou amelyor li i pou benefisye tou dimoun dan Sesel. Donk sa bann *l'échange* i nou lobzektif premye preski. Akoz Sesel nou

pa bezwen fer en gran proze pou dimoun anvi vin isi.

Sa ki nou, nou bezwen liniversite, se en sipor pou nou annan ase *staff* pou okip sa sistenm. E apre fodre nou sistenm imigrasyon isi ki nou deza annan an konversasyon ek zot, i permet sa bann etidyan vin Sesel vin fer sa resers.

E i permet nou etidyan ale. Akoz pou nou kapab aksepte sa bann *researches* ek bann etidyan, nou bezwen annan en konteks diferan ki nou pe donn touris.

E sa mon krwar nou pe travay avek *Tertiary Education* osi kot Minister Ledikasyon, pou sey donn sa posibilite pou zot vini.

Nou ganny kontakte parey nou pe dir, i annan en kantite *researchers* ki oule vini. Ler zot vin isi zot vin fer zot resers, an retour zot travay avek bann diferan lasosyasyon. So sa i enn nou travay lo la kotidyennman.

E nou vwar poudir i annan en kantite potansyel. Akoz se sa manda osi liniversite. Nou pa neserman bezwen pe *teach* en program dan nou liniversite pou nou zwe en rol dan lekonomi.

Me pei ler i koz ek nou i dir nou i bezwen plis lenformasyon syantifik dan tel domenn, be

nou avek sa bann liniversite ki nou travay avek, ki anvi vin isi pou en rezon vini. I kapab enn zot, i met en kantite nou dan en lasal e nou aprann en kantite keksoz. Donk *l' échange* i se sa ki nou pe travay lo la. E i byen bon la, savedir nou kapab gannyen sipor Lasanble osi pou sa. Mersi bokou.

MR SPEAKER

Mersi *Vice-Chancellor*. Onorab Vidot ou kestyon.

HON AUDREY VIDOT

Mersi Mr Speaker. Minis enn nou bann valer kle se *gratitude*, alors mon pou felisit Gouvernman presedan e osi byen ou Minister pou ki sa lekip profesyonnel ki'n akonpany ou ozordi i montre ki ledikasyon iniversel in fourni ankor. E i ankor pe fourni bonn konpetans o nivo dan ledikasyon e osi lo marse lanplwa.

Nou apresye ki zot pe batir lo en sistenm ki 43an in met an plas. Alors Minis, ou ki'n dan, ou ki'n dan Ledikasyon pou plizyer lannen, e ler ou'n reponn kestyon Onorab Woodcock, eski ou pe dir nou Lasanble ki 43an anba Gouvernman presedan, *scholarship* in ganny gaspiye pou met plizyer Seselwa, ki

enkli bann ki prezan ozordi dan Lasanble? Mersi.

MR SPEAKER

Mersi Onorab. Minis.

MINISTER JUSTIN VALENTIN

Mersi Mr Speaker. Mersi Onorab pou ou komanter e kestyon.

Mr Speaker lobzektif sa konversasyon ki nou pe fer la, se ki *scholarship* pou sa detrwa lannen pase, *scholarship* ki bann Pei Zanmi pe donn Sesel, pa pe ganny byen servi. Etidyan pa pe pran.

Ozordi nou pe koz lo ki manner sa group, nou'n zwenn ansanm, sa group dimoun in zwenn ansanm *UNISEY*, Ledikasyon, *ANHRD*, *SQA*, nou'n zwenn ansanm pou nou kapab fer ki nou'n maksimiz sa prosedir.

E an plis ki sa, nouvo direksyon ki nou pe ale, se ki manner nou pa a gaspiy okenn bann *scholarship* ki nou gannyen avek bann Pei Zanmi.

Akoz si ou komans gaspiye, en lot pou tande ki Sesel pa bezwen sa bann *scholarship* e nou pa pou ganny ankor bann *scholarship* bann pei zanmi. Vwala lobzektif fondamantal sa konversasyon ki nou pe koz lo la. Mersi Mr Speaker.

MR SPEAKER

Mersi Minis. Onorab Georges.

HON BERNARD GEORGES

Mersi Mr Speaker. Mr Speaker annefe mon kestyon ti relye avek kestyon presedan. Me mon pa'n ganny en loportinite. E mon pa pou abiz nou *Standing Order* pou mon demann en kestyon ki napa relevans avek kestyon 102.

Mon ti a kontan selman pran laparol pou reasir bann dimoun deor ki'n demann mwan, demann kestyon lo '*Blended learning mode*' ki mon pou fer sa imedyatman apre ki Lasanble *in rise* direktteman avek Minis ek son *panel*.

E mon ava enform zot priveman lo repons ki mon gannyen. Mersi Mr Speaker.

MR SPEAKER

Mersi. Onorab Waven William.

HON WAVEN WILLIAM

Mersi Mr Speaker. Mr Speaker mon anvî demann Minis, an relasyon avek kestyon ki Onorab Woodcock in demande.

Par lefe ki Minis Mr Speaker in, ti vin dan Lasanble a de repriz, fer nou konpran ki i annan en lodit ki'n demande ganny fer. E ki Oditer Zeneral

osi to demande ganny fer dan *ANHRD*.

Eski sa ki ou pe dir nou ozordi Minis i baze lo rezilta sa lodit, in komanse ouswa pa ankor komanse? Pou nou kapab fer sir ki dan lavenir, sa rezilta ki pep Seselwa pe ekspekte avek *ANHRD* i sa ki nou pe ekspekte? Mersi.

MR SPEAKER

Mersi Onorab. Minis ou'n pare pou ou adres sa?

MINISTER JUSTIN VALENTIN

Ok. Mersi Mr Speaker. Onorab mon en pe dezole, mon pe sey konsilte, nou pa pe konpran sa kestyon.

HON WAVEN WILLIAM

Ok. Si ou permet mon Mr Speaker mon ava elabor lo la.

MR SPEAKER

Silvouple sey fer li vit, wi.

HON WAVEN WILLIAM

Mr Speaker nou pe koz lo en Departman dan lepase, ki enn, ti annan en lodit ti sipoze ganny fer par Oditer Zeneral.

Me an menm tan Minis, mon anvî rapel ou ankor, poudir a de repriz ou'n vin dan sa Lasanble e fer nou konpran poudir sa lodit i bezwen ganny fer.

E ou osi ou'n demande, si baze lo sa stratezi, sa nouvo plan devlopman imen, an menm tan sa swivi, nou anvi koman en Lasanble, ganny sa lasirans poudir sa i pe dekou *from* sa lodit.

E mwan mon anvi konnen si sa lodit in ganny fer ouswa pou ganny fer. Ki nou fer sir ki sa Departman i byen marse avek Bidze ki nou koman en Lasanble nou vote pou donn Minister. Mersi.

MR SPEAKER

Minis.

MINISTER JUSTIN VALENTIN

Dakor. Mon panse Mr Speaker, mon panse Onorab ou pe koz lo sa odit *defaulters*, bann etidyan ki pa tournen. Ouswa odit *ANHRD* dan li menm. Akoz ...

Non, napa lodit a ler aktyel ki pe ganny fer dan *ANHRD*. Me mon pou, nou ava konsilte bann rapor ki pe gete. E mon a osi konsilte ou apre sa Lasanble pou nou gete, pou fer sir ki okenn odit i neser ganny fer i ganny fer pou ki parey ou pe dir, nou ava donn sa lasirans Lepep Seselwa. Ki zot larzan pe ganny servi dan en bon fason. Mersi Mr Speaker.

MR SPEAKER

Wi, Onorab sey termin sa.

HON WAVEN WILLIAM

Mersi *Mr Speaker for your indulgence*. Mr Speaker mon konsernen. Akoz mon annan lenformasyon ki i annan serten bann mankman deza dan *ANHRD*, par egzanp lo kote personnel pou travay.

So mon anvi koman en Manm Lasanble, ganny sa lasirans, pou dir sa bann mankman. Akoz 1 mwan pase apepre 3 dimoun in sorti, eski i annan bann ranplasan? Eski nou ekspekte en bon servis vizavi sa Departman? Mersi.

MR SPEAKER

La ou'n sanz en pe ou kestyon Onorab. Mon pa konnen, Minis avek *CEO* si zot annan en repons vitman silvouple satisfere Onorab apre nou a *move-on*.

MINISTER JUSTIN VALENTIN

Dakor. Mr Speaker nou ava, la pou le moman definitivman mon napa okenn repons pou sa kestyon. Me parey mon pe dir, nou ava rod lenformasyon spesifik e nou ava donn en laklerte lo okenn size relevan. Mersi.

MR SPEAKER

Mersi. Onorab Labrosse.

HON RICHARD LABROSSE

Mersi Mr Speaker pou ou kestyon. Mr Speaker mon'n asize mon'n ekout bann kestyon ki'n sorti, mon'n ekout enn sorti kot en ansyen Minis ki ti dan *Cabinet*.

Me mwan mon kestyon Mr Speaker i viz ver bann zenn Plaisance ki mon ti pas kot zot dan konpany. Zot ti fer mon ganny en konpran ki dan sa bann zafer *scholarship* i annan bann manboulouk ki pase.

La mon ti a kontan Minis i eklersi sa pou lenformasyon piblik. Par egzanp fer krwar ou tonton i ansarz en gro pozisyon, ou, ou sorti anba, ou pa devan tou dimoun, ou ganny sa bann keksoz parey. La nou pe koz lo *scholarship*.

Eski ou pe dir nou ozordi Minis, ki si sa i vre, si pa vre, ki sa in aboli? Kot bann zenn Plaisance, parske nou, parey Onorab in dir, nou pe target koman en bastyon entelizan, ki tou nou bann zanfan ki war - *I mean* tou bann dimoun ki enterese pou ganny *scholarship* i ganny li lo la baz merit, me non pa faver ouswa parey ti ete dan lepase.

Mon ti a kontan ou konfirm sa avek dimoun deor, ki sa i nepli egziste oubyen pa ti egziste lontan.

Apré mon dezyenm kestyon Minis, i konsern en pe lo laliny odit parey mon ti tann pe koz lo la, la. Eski i an se moman la *ANHRD* in fer en odit pou gete kantite *scholarship* ki - *I mean* kantite karyer ki nou bezwen dan pei pou anvoy nou bann dimoun ki enterese, ki'n kalifye lo la?

E apre mon lot kestyon osi, eski zot pe fer, mon pa'n tann nonm sa, kekfwaw mon pa konnen si mon pa'n *pick-up*, zot annan sa bon partenarya avek Minister Lanplwa lo kote karyer ek bann metye ki pei i bezwen? Mersi Mr Speaker.

MR SPEAKER

Mersi Onorab. Minis.

MINISTER JUSTIN VALENTIN

Mersi Mr Speaker. Mersi Onorab pou ou kestyon. Onorab ou premye kestyon ou pe demann lo manboulouk anba mon *leadership*, pou napa manboulouk.

Dezyenm pwen ou pe koz, nou, nou toultan met *scholarship*, sa nouvo stil ki nou pe koz lo la, la ozordi, sa konversasyon, se ki i fer ki *scholarship* i vin par rapor a *manpower need of the country*.

En keksoz ki nou anvi devlope e ki Gouvernman pe siport son devlopman. Pou fer

ki letan nou pozisyonn en etidyan, i anliny avek sa plan ki nou anvi devlope.

E apre byensir pou bann *scholarship* bilateral, i annan osi bann *scholarship* parey nou dir, ki zot, sa pei ki set bann kriter. Me nou, nou pe dir ki lefe ki nou bezwen benefisye ek sa bann *scholarship*, la kot nou antre dan sa dyalog avek sa bann pei.

Pou fer ki sa kriter i anliny avek osi nou *manpower plan*. Mersi Mr Speaker.

MR SPEAKER

Mersi Minis. Onorab Aglae.

HON EGBERT AGLAE

Mersi Mr Speaker. Minis dan ou bann larepons, mon ti a kontan eklersi, ou eklersi en keksoz byen. Akoz i annan, i paret mwan i annan serten konfizyon.

Akoz serten dimoun pe *text* mwan tou la. Eski ou pe dir nou poudir tou *scholarship* ki Gouvernman in *funded*, in ganny servi dan en fason ekitab? Mon pou met li koumsa.

E ki bann ki nou gannyen avek nou bann partner bilateral, ouswa atraver bann groupman miltilateral ki pa ti pe neserman ganny servi? Eklersi mwan lo sa.

Apre Minis, mon ti a kontan petet demand ou si *CEO* osi i konnen, akoz i annan bann tandans dan lepase kot si en *scholarship* pa neserman *fully funded, financially*, sa Departman, ouswa menm sa Minister, zot pa neserman enterese pou anvoy sa endividi pou li al ver sa *scholarship*.

E dernyen mon ti a kontan petet ou eklersi nou ankor, an vi ki *CEO* in fer resorti poudir parfwa in annan sa bann *scholarship* ki'n ganny donnen, me nou'n napa sa dimoun soutenab, swa in sot laz, swa kalifikasyon.

Dan sa ka, ki a lavenir ou pe mazine pou fer pou petet, si in al ver en tel Departman ki li in napa en kandida siksesiv, eski pa kapab revwar dan sistenm ankor, menm atraver bann lezot Minister pou kapab ganny bann kandida dan sa *search*, pou kapab *fulfill* sa *scholarship* ki pei i bezwen? Mersi.

MR SPEAKER

Mersi Onorab. Minis.

MINISTER JUSTIN VALENTIN

Mersi Mr Speaker. Mersi Onorab pou ou kestyon. Mon konmans ek trwazyenm kestyon. Trwazyenm kestyon, parey nou pe dir, i annan, letan

ou annan en *manpower plan*, sa kestyon pa ganny dimoun i tonbe.

Akoz ou pou pozisyonn dimoun dapre sa *manpower plan*. Donk sa ki nou anvi etabli. En *manpower plan* pou nou pa ganny sa problem kot nou dir, nou pa ganny dimoun kalifye, nou ganny dimoun tro vye.

E byensir parey nou pe dir, i annan osi Gouvernman Sesel ki donn labours. Sa i reste li. I pa vedir in aboli, i pou aboli menm si nou pou ganny *scholarship* avek bann Pei Zanmi.

Akoz byensir i annan bann landrwa kot bann Pei Zanmi pa kapab arive, bann bout kot nou pa kapab zwenn.

E zisteman, *the Seychelles Government of Seychelles Scholarship* i reste la. Vwala. Dezyenm, ou premye kestyon, ou ti pe koz lo sa diferans *Government versus Bilateral Scholarship*.

Ou konnen, nou ki nou pe sye dir, bann etidyan i *become so choosy*. Ki zot tant pou, letan ou fer zot bann *scholarship* ki ler en *scholarship* pe ganny sponsor par pei ABCD, zot tant pou pa pran lentere lo la.

Me letan sa i arive, zot met presyon lo sistenm *Government of Seychelles scholarship* ou

konpran? Be nou, nou pe dir, pou fer ki zot benefisyen en *scholarship*, akoz mwan letan mon pe get en *scholarship*, i pa neseserman, *who really* - konmsi lekel, akoz, lekel ki pe pey sa *scholarship*?

Sa i pa sipoze en kestyon sa. Ou pe ganny en *scholarship*, dapre sa ki ou, dapre ou letid ki ou anvi fer. E byensir nou. nou pou fer, nou pou dir avek bann etidyan.

Akoz sa ki nou pe tant pou al ver. Lala bann diferans *scholarship* ki egziste. E ou, ou bezwen *apply* ou osi Sesel pou sa bann *scholarship*.

E ou ava ganny li baze lo ou konpetans, baze lo sa konpetisyon si ou oule, ki ou pe fer parmi tou sa bann lezot dimoun ki pou anvi en *scholarship*. Dakor.

E ou'n koz lo *fully funded scholarship*, si bann dimoun pa enterese, bann lorganizasyon pa enterese, toultan ANHRD i osi i annan posibilite kot i, nou apel, nou'n servi sa mo '*top-up*' bann lezot *scholarship* petet ki pa *fully funded* avek en pei, ANHRD i met ladiferans pou fer ki i vin en *complete scholarship*.

Nou pa pou zanmen anvoy en zanfann lo en *scholarship*, kot i annan zis en bout ki i gannyen laba. I pou toultan plen sa *scholarship*. I ava annan en

bout petet ki ganny *funded by* sa pei or lorganizasyon, e en lot bout ki ava ganny *funded by the Government of Seychelles*. Mersi bokou.

MR SPEAKER

Mersi. Wi *CEO*, silvouple.

CEO ANHRD NADIA LAURICOURT

Just to add, petet anmenn en pti pe plis sa lalimyer. Letan bilateral i ganny ofer, *most of* sa bilateral se sa pei ki'n ofer sa *scholarship*, ki fer seleksyonman e ki dir lekel sa bann etidyan baze lo bann kriter ki zot etabli.

E parey pou Gouvernman Sesel, i annan bann kriter ki ganny met an plas vizavi bann *local e overseas*. So nou annan bann kriter ki determinen ki mannyer en *scholarship* i ale.

Lo kote bilateral avek Gouvernman, wi i annan diferan kalite vini, i pou annan bann bilateral ki donn tou. Me ou annan bann bilateral ki petet Gouvernman, swa i donn tiket, oubyen kot i *supplement* en pti pe bann bout ki manke.

Me selman dan tou sa prosedir ki nou'n war, *be it Government or bilateral*, nou fer sir poudir *everything* in ganny *catered for* pou sa etidyan avan ler i ale. Mersi.

MR SPEAKER

Mersi. Mon regrete mon pa kapab al pli lwen avek sa sesyon. Nou en demi erdtan an retar. Madanm Clerk mon a demann ou pou avans nou program apre midi par en demi erdtan silvouple.

E Madanm *Deputy Clerk* mon a demann ou pou avans nou *meeting* avek nou bann teknisyen par en demi erdtan osi. Avek sa mon a dir mersi Minis ek son delegasyon pou zot partisipasyon.

E mon a swet zot bonn rantre, bonn apre midi, bonn kontinyasyon. Nou a pran *pause* pa e nou a rezwenn 2 er edmi. Mersi.

(BREAK)

MR SPEAKER

Bonn apre midi tou dimoun pou nou kontinyasyon. E an se moman nou annan en *Statement* par Minis pou Lagrikiltir, Sanzman Klima e Lanvironman lo *Commonwealth World Food Day*.

Madanm raporter ou ava apel Minis silvouple. Bonn apre midi Minis Flavien Joubert e nou kontan pou akey ou pou fer sa *Statement* lo *Commemoration of World Food Day*.

Avek Minis nou swet labyenveni osi Mr Keven Nancy, Sekreter Prensipal pou Lagrikiltir, Mr Guy Morel, *Assistant Convenor* pou *Food System Summit* e Mr Kenneth Racombo, Sekreter Prensipal pou *Blue Economy*.

Mersi Minis pou vin partaz sa *Statement* avek nou. Mon ava envit ou pou ou fer ou *Statement*.

MINISTER **FLAVIEN**
JOUBERT

Mersi Mr Speaker. Bonn apre midi Mr Speaker, bonn apre midi tou bann Manm Lasanble Nasyonal e osi bann dimoun ki pe ekoute ozordi apre midi.

Mr Speaker sa *Statement* nou pe fer li dan kad selebrasyon *World Food Day* ki ganny selebre le 16 oktob e a i Sanmdi prosen. Mr Speaker dan detrwa zour, le 16 Oktob Sesel avek lemon pou ankor en fwa selebre Lazournen Mondyal pou Manze.

Sa i en lokazyon pou tou pei met latansyon lo prodiksyon ek provision manze e fer en konstat bann defi ki zot pe fer fas avek.

Sa lannen tenm pou sa lokazyon, pe demann nou pou grosi, nouru e soutenir ansanm pou nou fitir. En tenm ki tre

apropriye dan sa letan kot tou akter dan pei i bezwen rebran zot aktivite apre sa bann defi lannen 2020 e osi lannen 2021.

A lokazyon sa lazournen, Minister Responsab pou Lagrikiltir, byensir dan prezans reprezantan Minister Responsab pou Lapes, (akoz sa lyen direk ki egziste ant sa de sekter) i oule prezant avek Lasanble Nasyonal rezilta bann dyalog Nasyonal ki'n lo nou sistenm alimenter ki nou'n fer dan kad Some Nasyon Ini lo sistenm alimenter mondyal, ki ti ganny organize dan bann mwan ki'n pase.

E prezante atraver *internet* le 23 Septanm 2021. E osi prezant bann vizyon ki swiv sa prosesis ki pou form parti nou stratezi pou sa sekter dan lavenir.

Mon ti a voudre rapel ou Mr Speaker, ki sa dyalog ti osi enkli bann Manm Lasanble Nasyonal. Mr Speaker, mersi pou akord nou sa privez vin fer sa prezantasyon dan Lasanble Nasyonal ozordi.

Avan mon al plis, dan plis detay sa dialog, mon oule zis pran lokazyon pou salye sak endividi, msye ek madanm, pti ek gro prodikter e osi bann regroupman, ki pe met zefor pou nouru nou popilasyon avek

manze sorti lo nou later ek dan nou lanmer.

Selebrasyon Lazournen Enternasyonal Manze i en rekonesans sa rol ki zot pe zwe, pou ki nou kontinyen viv en lavi an bonn sante e ki nou fitir pa depan lo lenportasyon.

Sesel i merit fer plas dan tou bann plan ek Polisi, pou permet partisipasyon tou sa ki anvi prodwi e ganny son lavi avek prodiksyon manze dan pei.

Napa en sekter ki plis ki en lot. E napa en sekter ki merit ganny defavorize letan bann desizyon i ganny pran. Mr Speaker, mon a komanse, par an revi bref sityasyon aktyel dan Sekter Agrikol Sesel.

Sekter Agrikol Sesel i kontribye en ti pe mwens ki 2 poursan dan prodwir domestik brit pei. Lapes parey nou konnen i bokou plis e sa i 8 poursan.

Prodiksyon agrikol lokal i reprezant environ 10poursan la kantite manze ki nou konsonmen. Nou annan 648 fermye anrezistre e ladan 74 poursan i kiltiv fri e legim, 15 poursan i sonny zannimo, 8 poursan i fer tou lede.

Nou annan environ 8mil lakour ki fer en ti pe aktivite agrikol. Nou osi annan 684 parsel later Leta dan 26 distrik.

Sa i reprezant environ 426 ektar ki'n ganny dezinyen pour aktivite agrikol. Me nou ekspekte ki sa i kapab ogmante avek bann demars ki pe ganny fer pou ogmant lagrikiltir lo zil elwanye.

En pwen enportan pou note, se ki 74poursan later lagrikiltir i sitye dan 5 distrik. Sa se Anse Boileau, Baie Lazare, Grand Anse Praslin, Grand Anse Mahe e Port Glaud.

65poursan laferm i lo teren montanny e zis 30 poursan ki lo later plat. Lo Praslin 75poursan laferm i lo lakot. Laplipar laferm i annan sistenm irigasyon, e kiltivasyon anba kouvertir pe vin pli popiler.

Parey zot okouran, aktivite agrikol i konsantre lo prodiksyon legim, fri e osi sonny zannimo.

Sa ki konsern prodiksyon lavyann, mon kontan pour vwar ki prodiksyon poul in kontinyen ogmante;- depi 2013, sorti 216 tonn pour ariv pres 1000tonn pour lannen 2020 e sa premye 6 mwan 2021 i montre ki malgre COVID prodiksyon pou klerman depas sa nivo.

Mon annan konfidans ki byento avek bann mezir parey akse avek finans, e bann restriksyon ki'n ganny tire, prodikter lokal i a kapab depas

sa rikord 1560 tonn ki ti anrezistre an 2006.

Egalman prodiksyon dizef in kontinyen ogmante pour ariv pres 39 milyon dizef par lannen, ver lafen 2020, ki reprezant 100 poursan *market share*.

Nou osi annan bon nouvel dan prodiksyon pork, kot a la fen 2020, nou'n anrezistre en prodiksyon local 587 tonn. Sa i fer nou annan 41 poursan *market share*.

Lo menm laliny, nou ekspekte kas sa rikord 687 *metric ton* ki ti ganny mete an 2007 an 2021 ouswa 2022 si tou bann devlopman ki'n deza ganny planifye, i abouti.

Menm si prodiksyon lavyann bef i reprezant zis 4 poursan *market share*, mon kontan note ki inn annan bokou progre dan aktivite elevaz bef ver lafen 2020, Sesel ti prodwi 42 tonn lavyann bef.

I osi annan bokou lentere e bokou potansyel pou lezot zannimo parey kabri, ki zot osi pe ganny targete pou prodiksyon.

Lo kote prodiksyon legim ek fri, bann lenformasyon i endike ki nou prodwi anviron 6 mil tonn legim ek 5 mil tonn fri par lannen. Sesel i annan bokou travay pour fer avek prodiksyon gro manze.

Mr Speaker sa dyalog ki nou'n fer avek kominote fermye e bann lezot akter dan prodiksyon manze lokal in fer nou reevalye nou vilnerabilite, e osi gravite risk ki nou konman en pti pei nou ekspoze avek.

Nou annan de swa;- kontinyen avek *business as usual* e priye ki nou a ganny proteze kot fitir, kont bann fitir permitasyon mondyal, ouswa pran nou desten dan nou lanmen.

Koman en pep nou bezwen swazir dezyenm opsyon pa bes lebra me fer fas avek nou desten. Sa i vedir met plis lanbisyon dan vizyon pou Sekter Agrikol.

Menm si nou rekonnet bann defi, i annan en gran dezir e motivasyon pour transform Sekter Agrikol, pour vin en sekter pli prodiktiv e pour kwa pa, osi en sekter ki konpetitiv e ki form en pli gran porsyon prodwi nasyonal brit.

Sa travay in fer nou revwar e apresye nou bann pwen for. Premye, menm si nou teritwar *terrestrial* i limite, nou annan ankor later pour met a dispozisyon aktivite agrikol.

La mon pe refer, pe fer referans avek later lo nou bann zil elwanye e osi lo later La Digue, Praslin, Mahe ki annan potansyel ek lenportans pour

devlopman lagrikiltir, parmi bann ki pa pe ganny servi efikasman.

Konsonmater, i prefer nou prodwir agrikol lokal, e demand i la, me nou bezwen adres abilite pou founi e osi sa bann zafer pri *speculative* ki serten pe abize ek pratike.

Menm si lagrikiltir i annan en kantite risk, i osi ase rantab e i annan larzan pour fer dan sa sekter.

Lo nivo mondyal i annan en gran zefor ki pe fer, ki pe ganny mete espesyalman par Nasyon Ini pour siport bann pei reform sistenm alimenter pour fer sir ki nou kapab, ki nou prodwi ase manze ki *nutritive*, aksesib e *affordable* pou tou dimonn.

Lo nivo lokal;- sa legzersis in montre nou ki i annan en gran lentere, dezir ek motivasyon pou nou kapab prodwi plis sa ki nou konsonmen konman en pep. Nou'n osi idantifye nou bann defi.

Premyerman, nou'n devlop en latitid pou tro depan lo lenportasyon pou nouru nou pep. Byensir sa in ganny motive par bann rezon komersyal e fasil.

Dezyenmman nou sistenm *supply* ek *value chain* i pa byen organize, ki fer ki i

annan en kantite defayans, inefikasite ek bokou mankman dan sistenm aktyel.

Trwazyenmman globalizasyon ek ladopsyon bann kiltir *fast food* in fer ki en porsyon nou popilasyon pa apresye e pa konn valer siperyer nou ban prodwir lokal e lakwizin Kreol Seselwa.

I osi annan mankman dan serten konesans agro teknik, inovasyon ek teknolozi, ki nou bezwen pour vin pli prodiktiv e konpetitiv.

Mon osi rekonnet ki akse avek resours finansyel tel ki sibvansyon ouswa *Grants* ek bann fasilite finansman avek lentere ba, i ase difisil pou ganny pour nou enplimant proze devlopman.

Nou osi konnen ki lanvironnman biznes i tre konpetitiv, an rezilta bann lagreman komers ki Sesel in annan avek lemonn eksteryer.

Mr Speaker, lenportasyon pou reste e kontinyen form parti solisyon pour nou sekirite alimenter, me nou bezwen reste determinen pour redwi nou depandans lo lenportasyon. E met lanfaz lo en sistenm alimenter ki ganny apiye e kondwir plis par prodiksyon lokal.

Alor nou laspirasyon pour lavenir se pour ogmant nou

kapasite e kapabilite pour prodwi plis sa ki nou konsonmen koman en pep.

Nou stratezi i baze lo en vizyon tre kler e anbisyè, avek 7 lobzektif stratezik ki ganny sipòte par 8 group aksyon ouswa bann *pathways*.

Nou vizyon i senp e kler. Transform nou sistenm prodiksyon agrikol pour kapab atenn en pli o nivo souvrennte alimanter.

Sa vizyon i reprezant lanbisyon pep Seselwa ek motivasyon dirizan pei dan Legzekitiv pour en fwa pour tou elev nou kapasite, e kapabilite pour prodwi plis bann manze ki nou kapab prodwi lokalman.

Pou realiz sa vizyon nou'n defini 7 *goal*. Premyèman nou dezir se elev prodiksyon lavyann poul ek pork, pou ariv par la 80 pousan *market share*.

Elev prodiksyon bann fri ek legim ki kapab ganny kiltive Sesel pou ariv plis ki 90 pousan. Transform nou fason apresye ek prepar nou bann gro manze ek bann lezot *carbohydrates* pou met plis prodwi lo marse.

Target soustenabilite, e sa i en target pou lapès. Target soustenabilite, bann lespes pwason ki pe ganny menase e ogmant konsonmasyon bann

lespes pwason ki pa tro an demann. Lezot bi se ogmant kapasite nou bann ferme pour fer fas avek sanzman klima.

Nou bezwen osi atraver diferan *mekanizm* ogmant rezerv manze dan pei. Nou bezwen ogmant kontribisyon Sekter Agrikol dan prodwi domestik brit pei. Redwir ban maladi ki annan pour fer avek manze ek nitrisyon.

E osi e finalman depas bann target lobzektif devlopman dirab ki apropiye pou Sesel espesyalman target nimerò 2 ki konsèrn manze.

Pou nou arive delivre sa bann bi, nou pou bezwen enplimant bann proze ek program sarze e anbisyè. Si nou pou sorti dan sa sityasyon aktyel kot nou depan preski antyèman lo enportasyon pour nourri nou pep.

Alors, dan sa prosen deseni, nou pour met an mars en seri entervansyon anba 8 group aksyon ki konstitye stratezi transformasyon nou sistenm alimanter.

Bann partisipan sa bann dialog in deza kontribye en pe plis ki 90 diferan propozisyon dan sa demars. Premyèman, nou pou bezwen revwar lankadrem legal pour protez e ranforsi bann eleman kle sa transformasyon.

Nou pour re-evalye Polisi Nasyonal lo Sekirite Alimanter e nitrasyon e met lanfaz lo souvrennte alimanter. Setadir nou abilite pou prodwi plis sa ki nou konsonmen. Nou pou osi revwar serten laspe lanvironnman regilatwar ek latitud, pour fer ki i pli fasil pou fer biznes.

Dezyenm *pathway* se pou nou, nou pour bezwen ranforsi sistenm *supply* e *value chain* pour fer ki nou vin pli prodiktiv e osi konpetitiv.

Byensir nou pou bezwen met plis resours e lenfrastruktir pour ogmant prodiksyon, rezourd bann problemn mankman bann resours de baz, ogmant kapabilite pei pour transform prodwi de baz dan valer azoute, amelyor sistenm distribisyon e osi kordinasyon ant demann avek *supply*.

Sa se detrwa proze, parmi en gran levantay proze pour batir en sistenm *supply* ek *value chain* modern e efikas.

Parey mon'n dir sanzman klima i en priyorite. Alor nou pour bezwen investir dan plis resers pour protez resours zenetik lokal ki annan kapasite adaptasyon e idantifye bann varyete ki kapab osi fer fas avek sanzman klima.

Nou pou bezwen investir dan bann lenfrastruktir pour

redwir risk inondasyon, ogmant kapasite irigasyon, entansifye lenvestisman dan kiltivasyon anba kouvertir e osi kapabilite pei pour fer fas avek pes, maladi.

Sa ki konsern lenvestisman, nou pour bezwen pli aktiv pour mobiliz e diversifye bann sours finansyel pou bann ki dan prodiksyon.

La mon pe koz lo bann proze pour atrakte finansman lokal e osi bilateral e multilateral ki sibstansyel e afordab. Nou osi bezwen anmenn sipor pou bann prodikter ki bezwen agrandi e modernize.

Pou fer sir ki nou tou nou lo menm paz, nou pou bezwen enplimant proze pou fer nou ban lenstitisyon ki siport Sekter Agrikol kapab delivre bann servis, anliny avek sa nivo devlopman ki nou pe targete.

Egalman nou pou osi amelyor bann proze formasyon pou devlop plis nou bann travayer de baz, teknisyen e profesyonnel. Me pli enportan nou pour bezwen revwar la fason ki nou servi e zer nou bann talan, ki egziste dan sa sekter e osi form nouvo talan.

Sa ki konsern demann, nou pour bezwen ogmant zefor *marketing*, pou kontinyen promot kanpanny manz manze lokal e osi travay avek bann

food influencers tel ki;- bann *chefs* ek lotel pour donn plis lenportans nou lakwizin lokal. E osi fason inovatif pour servi bann zengredyen lokal pour prepar bann repa *cuisine* adapte.

Nou pour bezwen kontinyen avek bann program edikasyonnel pour fer nou pep adopte bann fason manze e *lifestyle* pour redwi bann maladi ki annan pour fer avek nitrisyon.

Mr Speaker e bann Manm Onorab, larout parey zot konnen i pa fasil, me nou napa gran swa. Nou pa bezwen esper en lot permitasyon mondyal epi komans blanm kanmarad ankor en fwa. Nou oblize pran nou desten dan nou lanmen.

Nou'n fini prezant sa Rapor avek *Cabinet* Minis, e osi, e ozordi nou vin prezant avek Lasanble Nasyonal.

Prosen letap se pou nou rafin nou plan devlopman pour Sekter Agrikol pour annan en plan ki pli kler, ki enklizif, ki anbisye, me osi ki realizab. An menm tan nou pe osi lans bann proze linisyativ pou demar sa transformasyon.

Mon konnen ki enn bann konsern kle pou tou bann Manm Onorab ozordi, letan nou pe koz lo Lazournen Mondyal pou Manze se akse e

affordability manze par nou bann zabitan.

Annefe parey nou tou nou konnen dan lemonn, laplipar letan se bann problem striktirel ki koz difikilte nitrisyon e non pa problem prodiksyon parey mon'n koz lo la.

Me bann difikilte 2020 e 2021 in sanz bokou keksoz, e i tre enportan etabli nouvo lenformasyon lo en sekirite alimanter dan pei.

Avek bann lenstitisyon dan pei, bann lenformasyon lo standar lavi, e *food insecurity experience* pe ganny ranmase e pe ganny analize. Enn fwa lenformasyon i kler, Nou propoze ki sa size i ganny adrese atraver kordinasyon diferan Minister, dan en fason obzektif e dan en fason byen reflesi.

I reste pour mwan envit zot bann Onorab pour kontinyen sipor nou dan sa parkour pour rekilibre nou priyorite sekirite alimanter, me pli enportan pour nou reklanm nou obligasyon anver souvrennte alimanter.

Letan nou pou adres bann size sansib parey later, ki nou pe al adrese an 2021 e 2022, nou pou bezwen zot sipor. Nou pou bezwen zot sipor atraver zot lyen ki zot annan avek bann

zabitan ek bann prodikter. E nou pou bezwen zot sipor letan nou propoz lafason ki resours Nasyonal i ganny verse pou siport sa sekter.

Mersi pour zot latansyon e mersi pou zot siport kontinyel. Mersi Mr Speaker

(APPLAUSE)

MR SPEAKER

Mersi Minis. Mersi Minis lo lapar bann Manm. Mon mazine ki, parey nou ti fer dernyen fwa, pou permet fasilite kestyon avek bann lezot Manm, nou a kapab propoze ki nou pas dan Komite. E eski, Onorab Georges, dernyen fwa ou ki ti fer Mosyon pou sa.

HON BERNARD GEORGES

Yes Mr Speaker, efektivman. Avek ou permisyon si nou pou, mon krwar i ava en bon lide pou nou pas dan Staz Komite.

Avek ou permisyon donk, les mon a propoz en Mosyon anba *Order* 38(2) ki Lasanble i rezourd pou konstitye son lekor dan en Komite Lasanble an antye, dan en fason ki Manm i kapab adres kestyon direkteman avek *panel*.

Oubyen Minis i kapab dezir en dimoun dan *panel* pou reponn okenn kestyon. Mersi.

MR SPEAKER

Tre byen, nou a ganny en *secondment*. Onorab Arissol.

HON SANDY ARISSOL

Mersi Mr Speaker. Bonn apre midi Minis ek ou delegasyon ek tou dimoun ki a lekout. Mr Speaker mon ti a kontan segonn Mosyon propoze par Onorab Georges, zis pou fasilite bann Manm ganny larepons pou zot kestyon. Mersi.

MR SPEAKER

Tre byen. E nou a pran en vot lo Mosyon silvouple. Manm ki an faver lev lanmen. *Ok*, byen. Okenn Manm ki kont? Mersi Madanm Clerk.

Lo Mosyon pou pas lo *Committee Stage* pou *Statement* lo *World Food Day* 28 Manm in vot pour, 0 kont e 1 abstansyon. Donk Lasanble in aprouv sa Mosyon. Nou ava pran entervansyon bann Manm, nou pou pran sa sesyon ziskan 4er.

Akoz nou annan en lot *item* pou ozordi ki nou pou bezwen fer, ki nou a pas lo li 4er edmi. So, eskiz mwan si mon bezwen limit sa. Mon a pran, tenir lanmen en pti moman silvouple.

Mersi, les, silvouple mon a zis verify mon lalis. Lo sa kote mon annan Onorab Georges, Onorab Henrie, Onorab Mondon, Arissol, Roucou, Bistoquet, Labrosse, Romain, Letourdie, William. E lo sa kote mon annan Onorab Lemiel, Onorab Aglae, Onorab Gill e Onorab Cosgrow.

Eski mon'n mank, mon'n mank Onorab Uranie, mersi. Mon'n mank osi Onorab Esparon. Alor mon pou napa lord bann Manm ki'n lev lanmen. Nou ava balans le de kote.

Selman mon krwar premye dimoun ki mon ti vwar lev lanmen depi lontan ti Onorab Gill. Alor mon a les li pas premye.

HON CHURCHILL GILL

Mersi Mr Chair. Bonn apre midi Minis ek ou delegasyon. Minis ou *Statement* i en *Statement* ki tre enportan pou pei. E sa topik ki ou pe kouver i en topik ki vremen enteresan.

Me selman toultan nou annan bann plan, nou annan bann stratezi, nou bann *goal*. Me selman mon santi toultan nou tant pou anpay en pti gin dan lenplimantasyon.

Akoz parey ou konnen, ou'n donn nou statistik ki i

annan amelyorasyon dan prodiksyon ki i korek. Me selman sa nivo ki ou *Statement* ki ou'n delivre sa *Statement*, se en nivo kot nou pe koz Nasyonal.

E nou ekspekte ki nou war en rezilta tre byento. Menm si ou'n dir sa prosen deseni. Me selman mon mazine nou bezwen komans la.

Alors petet si ou kapab dan en fason tre bref, ki fason, sa fason lenplimantasyon pou ganny fer. Ki ou santi ki nou pou vwar en laklerte sa voyaz ler nou pe lanse.

E nou pa ekspekte ki apre lan, nou, si nou re apros sa size, nou war poudir nou pa'n bouz ditou lo la. Sa lo kote lagrikiltir.

Aprè son lot laspe ki ou'n koz lo la, se *fisheries*. E parey nou konnen, lo kote *fisheries*, sa ki dan nou lanmen, ki nou, nou kapab pran desizyon lo la, nasyonalman i tre limite.

I plis nou bann peser artizanal apre nou bann peser detrwa ki dan *long line*. Me selman pli gro porsyon aktivite lapes i pa ganny kontrole par nou, menm si i dan nou lanmer.

Eski dan sa direksyon, nou pou annan serten keksoz nouvo ki nou pou vwar, ki pou garanti ki nou bann, nou resours ton, dan bann lannen

ki pe vini, i annan bann nouvo stratezi e lapros, pou ki nou a kapab annan bokou, plis *say* lo la.

Akoz parey ou konnen, Linyon Eropeen i gide par en kontra pou bato ton. E nou'n ganny pa mal difikilte pou nou kapab vreman annan *the upper hand* lo la.

Eski, vi ki sa *Statement* se 'Soustenabilite pou pei an antye,' eski dan sa direksyon, nou ekspekte annan nouvo lapros ki pou ed nou annan plis *say* dan nou *stock* ton? E avek Linyon Eropeen, kot nou a kapab fer nou lavwa tann en pe plis ki ozordi? Mersi.

MR SPEAKER

Mersi Onorab Gill. Minis ou a kapab reponn oubyen diriz ou *panel* mannyer ou ti a kontan.

MINISTER FLAVIEN JOUBERT

Mersi Mr Speaker. Mersi Onorab pou ou 2 pwen. Mon pou al lo dezyenm pwen pou komans avek Mr Speaker.

Parey mon'n eksplike boner, mon'n fer sa *Statement* dan prezans en reprezantan Minister pou Lapes. Me selman mon pa ti a voudre antre e eksprim ou lekor lo lapar Minis pou Lapes.

Alor mon krwar i pou dan en pli bon pozisyon pou li reponn sa pwen. Me mon pa konnen si Mr Racombo i kapab zis fer en pti leklersisman lo la. Me avan sa, ou premye pwen Mr Onorab, se lenplimantasyon.

Nou'n fer en kantite pwen dan lepase. E mon osi letan mon'n pran lofis, mon'n swiv en kantite sa bann plan. Mon'n kouver en bon pe sa bann dokiman.

Ki mwan mon'n mete dan mon *Statement*, se ki nou bezwen fer nou en plan ki realizab. Se pou sa rezon ki nou pa'n etabli en kantite target dan nou plan, pou nou kouver partou, tou keksoz i kapab ganny kouver.

Nou, nou ti a voudre ki nou'n fer serten transformasyon ki kle. E sa bann transformasyon i kapab dekoul a lezot keksoz. Byensir i pou annan lezot keksoz ki pou vini apre.

Me nou ti a voudre ki bann transformasyon i dekoul a sa bann keksoz apre. Par egzanp, enn bann keksoz kler ki nou bezwen admet se Lagrikiltir Departman li menm, nou bezwen aranz li e nou bezwen fer sir ki ladan i annan dimoun ki kapab delivre sa manda ki nou pe koz lo la.

Nou pa pou kapab zis fer en plan e met la, e annan menm tim ki ek menm kapasite e ekspekte ki i pou ganny fer. I pa pou ganny fer, i pa pou arive.

Alor pou mwan se nou bezwen zis fer sa bann keksoz kle, idantifye li, admet poudir i annan bann problem. E antre ladan e fer sir tou keksoz i ganny fer byen.

I annan plizyer landrwa ki letan nou gete, i annan bann defayans ki anpes nou bouz devan. I annan sistenm *loan*, bokou dimoun i konplent, so *loan* i pran tro bokou letan.

Nou bezwen reetablir en sistenm, ki vit, ki direk, ki donn en repons ase kler. Parey letan ou al kot en Labank, i devret mars parey.

Nou annan sistenm later, sistenm later ozordi i en pe konfize. Akoz nou annan en kantite dimoun ki pe demande, pa tou i ferme, nou pa ni pe kapab triye.

E i annan ki pe pas devan, i annan ki ti la depi 2015 pa pe gannye. I pe vin en kantite problem, en kantite fristrasyon. Resaman Minister Later in fer en gran zefor e in met en sistenm bokou pli kler pou dimoun ganny akse avek later Gouvernman.

Be lagrikiltir osi se sa lapros ki nou pe pran. Se

reetablir nou lenformasyon lo later, triy tou nou dimoun dan en fason korek e apre fer bann desizyon ki kler, e en dimoun letan i vin devan, nou kapab evalye li e deside ki repons ou pou donn li lo kote later.

Alor pou mwan se fer bann transformasyon ki apre i pou larg keksoz e i pou fer keksoz avanse. So pou mwan se sa mwan. I pa tro en kestyon fer bann gran plan ki vreman, vreman konplike.

E apre letan mon'n get sa bann plan ki'n la dan lepase, byensir zot lanbisyon ti bokou. Me son egzekisyon i bite toultan. E se sa ki nou ti a kontan evite dan sa ka.

Mersi. Mon ti ava demann petet PS Racombo zis pou fer en pti komanter. Me selman si kestyon i petet demann lentervansyon Minis pou Lapes, mon krwar ti ava bon petet apre i ava vini, i a reponn sa kestyon an detay. Mersi Mr Speaker.

MR SPEAKER

Wi, Minis, nou ava envit Mr Racombo pou adrese.

PS KENNETH RACOMBO

Mersi Mr Speaker, bonn apre midi tou Manm Onorab. Onorab pou ou kestyon i annan diferan *platform* kot sa bann

diferan *challenges* ki i annan lo sa *Fisheries Partnership Agreement* ki'n ganny aporte a latansyon nou Minis.

E take it from me, in pran sa bann konsern. Me selman pou ou re negosye en lagreman, i annan en mekanizm ki'n ganny fer.

Li in fer sorti son bann konsern, me selman i pe esper sa *proper platform* kot i asize avek tou reprezantan *EU*, ki dil avek lapes spesifikman lo sa lagreman, pou li kapab refer sorti sa bann *challenges* ki i annan. E rod en fason ki ou pou adrese. Mersi.

MR SPEAKER

Mersi *PS*. Nou a pran Onorab Phillip Arissol.

HON PHILLIP ARISSOL

Mersi Mr Chair. Bonn apre midi tou dimoun. Minis avek bi pou ogmant prodiksyon e pou osi ede asir sekirite alimanter, eski ou ti kapab dir Lasanble, dan ki staz proze irigasyon Montagne Posée e Hermitage in arive? E kan ki ou ekspekte sa proze i konplete? Mersi.

MR SPEAKER

Mersi Onorab. Minis.

MINISTER FLAVIEN JOUBERT

Ok, mersi Mr Chair, mersi Onorab pou sa keston. Mr Chair nou'n fer en rev *internally* tou bann proze irigasyon ki reste depi la ziskan lafen lannen.

E proze Hermitage i enn sa bann proze ki pou ganny fer ant la avek desanm 2020. E nou ekspekte ki letan sa proze i a konplete. Nou bann dimoun ki pe ganny delo dan sa rezyon i a kapab ganny en pli bon fasilite.

An menm tan i annan sa konsern kot en bon pe sa bann zabitan pe servi delo lagrikiltir pou zot lakour.

E alors la nou pou bezwen gete osi avek *PUC* si dan bann ka kot i posib pou bann dimoun osi ganny en delo ki delo trete, pou zot servi dan zot lakaz. Akoz pa tou ki pe servi delo trete dan zot lakour.

E nou konnen ki bann danze ki sa i anmennen. Me selman mon oule reasir Lasanble ki sa i enn bann priyorite ant sa mwan ki nou ete la, ziske lafen Desanm, pou nou kapab konplete. Mersi.

MR SPEAKER

Mersi Minis. Onorab Lemiel.

HON SYLVANNE LEMIEL

Mersi Mr Chair. Bonn apre midi Minis avek ou delegasyon. Minis, dan ou *Statement* i annan en bon pe lasirans ki ou'n fer sorti.

E Komite COGA pou la, pou swiv, pou travay ansanm ek ou Minister, pou nou swiv serten bann lasirans ki ou'n donn nou, ki nou annan dan sa *Statement*.

E ki mon ti a kontan konnen, par egzanp ou'n koz lo, bann distrik ki annan later. Anse Royale nou konnen i annan bann gro fermye ki pe prodwir lo *large scale* e ki pe furni manze, nou kapab dir en pe lo Sesel antye.

Later wi i en pti pe limite, me nou war sa bann fermye pe vin avek bann teknolozi en pe avanse. Mwan mon ti a kontan konnen petet, ki kalite lasistans *or* ki kalite sipor zot, ou Minister pe mazin petet anmennen a sa bann fermye?

Pou donn zot sa lankourazman pou zot kontinyen prodwir, prodwir plis lokalman. E an menm tan dan ou *Statement*, mon ti a kontan konnen kwa, ki bann keksoz imedy a ki ou pe mazin enplimante la, petet dan pli mwayen term?

E sa ki ou pe mazin pli lonterm ki pou ariv kot sa deseni kot ou, ou pe mazin nou

pou'n fini kekfwa, mon pe mazin otosifizans petet.

Ki ou bann plan kourt, mwayen e lonterm ki ou annan pou nou kapab *achieve* sa ki ou'n met dan ou *Statement* Minis? Mersi.

MR SPEAKER

Mersi Onorab. Minis.

MINISTER

FLAVIEN

JOUBERT

Mersi Mr Speaker. Mersi Onorab pou sa 2 pwen. Kot i konsern bann fermye mon krwar ou pe fer referans avek bann gro fermye aktyelman. Bann gro fermye byensir zot pe prodwir lo en lesel gran.

E zot bezwen i diferan avek bann fermye ki pli pti. E zis bann ptipti, bann pti lasistans i pa toultan fasil, i pa toultan fer en gran lefe lo zot.

Bann gro fermye, parey bann pti fermye zot benefisy avek bann materyo, ek bann fasilite ki egziste la ozordi. So si par egzanp zot oule pran en *loan* pou zot *access*, pou zot agrandi ouswa pou aranze keksoz, zot kapab.

I annan diskisyon ki nou'n komanse lo, mon krwar depi lo komansman lannen lo bann *taxes* ki devret aplike pou bann fermye, pou permet zot kapab pli byen zer zot biznes e osi

agrandi zot biznes. Sa bann diskisyon in ale ziskan konmela.

E nou, nou pe ekspekte ki lafen lannen, ti nou target lafen lannen pou nou kapab ariv kot Minister Finans pou donn en kontrandi sa bann diskisyon e ki bann propozisyon ki i annan lo bann sityasyon finansyel, bann propozisyon finansyel pou asiste bann fermye.

Parey ou konnen, konmela bann ti fermye zot pey 0 *tax*, e bann ki pli gro i annan en sonm ki zot peye par lao R250mil.

E i annan bann diskisyon ki pe vini la e ki nou pou bezwen fer en kontrandi avek Minister Finans pou eksplik zot en pe lo kwa ki kapab ganny propoze pou sipor en pe plis bann fermye.

Bokou fermye zot in lev avek nou bann sityasyon kot zot bezwen akse bann gro *loan*, bann pli gro *loan*. E la konmela bann pli gro *loan* nou'n fer li monte, in ariv 5milyon ki en fermye i kapab pran dan la konmela, ki bokou plis ki avan.

Me i annan menm demann pou fer plis ki sa, pou al pli lwen ki sa. E sa nou'n diskite avek Minister Finans. Me i pou depan lo sours finansman.

Akoz pou le moman sours finansman i lokal, napa en

laliny finansman sorti an deor. E i annan en limitasyon lo kantite ki kapab ganny donnen avek bann fermye.

Me toudmenm sa i ne demars ki pou kontinyen. E nou ti a voudre ki evantuelman nou annan sa bann sipor pou donn zot. Pou lezot form sipor, bann sipor i vin parey tou lezot dimoun i ganny akse avek.

I annan bann prodwir ki ganny vann, zot ganny *access* parey zot fermye. I annan bann fasilite, par egzanp irigasyon ouswa drenaz ki ganny fer.

E sa i parey lezot dimoun, pa fer okenn preferans si en dimoun i gro ouswa i ptipti pou nou amelyor drenaz dan en rezyon. Sa i aplik pou tou dimoun e i benefisye tou bann rezidan, bann laferm, eksetera.

Alors sa i bann lapiy ki nou krwar i kapab ed bann fermye ki en pe pli gro. Prezan lo kote sa lalis keksoz nou anvi fer dan limedya, enn bann keksoz ki nou devret fer dan limedya la, avan sa lannen, ki mon'n fini fer diskisyon lo la.

Se in annan en kantite letan an retar lo sa bato al Mahe. Sa bato al Mahe i en proze ki tou sa letan in ganny difikilte avek. Nou'n idantifye sit, nou'n fini ganny Bidze pou li, konponan lokal.

E nou'n ganny diskisyon avek delegasyon Linyon Eropéen ki la dan pei, lo finansman konponan *external*, *sorry*, sorti a leksteryer. E sa in fini korek.

E nou oule lans sa proze ki *by 2022* sa labatwar Mahe nouvo i pe debout. Sa i enn bann proze mazer ki nou pe fer. Nou annan osi konfirmasyon en proze i nou pou fer avek bann fermye Praslin/La Digue, pou distribisyon legim, bann sistenm *cold storage* ki pou servi bann sistenm *solar*.

E sa nou'n fini ganny en konfirmasyon ki i annan en *Grant* ki pe ganny fer *available* pou nou fasilite bann fermye Praslin/La Digue. E sa 2 proze nou oule fer li avan lafen lannen. E demar li avan lafen lannen.

Nou osi annan, parey mon'n dir, nou oule konplet tou mou bann irigasyon ki reste la ozordi. I annan plizyer landrwa, i annan kad bann zournalis bann landrwa ki konplet bann proze irigasyon. E an menm tan, nou pe transform en bon pe *store* lagrikiltir, ki en *major* konplent ki nou pe gannyen.

Mon krwar dernyen fwa ki mon ti vin Lasanble, mon ti eksplike, nou pe transform *store* lagrikiltir dan en fason ase

mazer, lo lafason ki i ganny *supply* e lafason ki bann keksoz i ganny distribye e rikord i ganny garde pou ki nou pa war nou dan en sityasyon parey avan.

Kot *store* i *fail* e tanzantan dimoun pe konplent, pe dir napa materyo dan pei, i annan pest e zot pa pe kapab prodwir. So sa i enn bann keksoz ki nou pe fer dan limedya.

Dan 2022 nou annan en pe bann proze ki annan pou fer avek lenfrastriktir, byensir ki bezwen kontinyen - semen irigasyon ek drenaz. E osi nou pou al rod en pe larzan la.

E i enn nou bann lobzektif sa konferans parti. E sa bann bilateral ki nou pou fer an Novanm letan konferans parti pou klima. Pou nou kapab trouv en pe larzan pou nou ed lagrikiltir pou li adapte avek sanzman klimatik.

Ki vedir bann travay ki annan pou fer avek kiltivasyon anba, dan lanvironnman proteze, bann kontrol pes ek maladi ek bann size ki i annan pou fer avek bann lenfrastriktir parey drenaz eksetera, ki pou ed bann landrwa ki annan laferm.

So sa i bann keksoz ki nou pe fer dan limedya e osi ki nou pe bouz devan avek lannen prosen. E an mezir ki Bidze i re

aranz son lekor, byensir nou pou kapab vin avek plis.

Sirtou lenfrastriktir kot dimoun pe demande, i annan en kantite bezwen pou lenfrastriktir. E enn bann keksoz ki nou ti a kontan fer, se pou donn, ouswa pou asiste bann fermye avek bann ptipti *Grant* pou zot fer amelyorasyon laferm.

En kantite dimoun pe demande, bann ptipti lasistans pou en bout semen, pou en bout rakor, pou en basen, bann pti keksoz koumsa ki vreman i kapab fer en diferans lo zot laferm.

E sa nou pa ankor kapab annan sa finans dan nou lanmen pou nou fer li. Si nou kapab ganny sa, mon krwar i pou fer diferans pou en ta fermye dan pei. Mersi.

MR SPEAKER

Mersi. Onorab Henrie.

HON GERVAIS HENRIE

Mersi Mr Chair. Bonn apre midi tou dimoun. Mon'n ekout *Statement* Minis avek gran lentere. E mon oule demann li pou dir nou en keksoz.

Vizavi sak bann *constituency* ki reprezante la anndan, non-selman Mont

Buxton. Kote nou *fit in* dan sa plan?

Si mon donn ou en *quick example*, par egzanp Minister, kot Minis Devika, zot pe *come up* avek en plan, *One District, One Project* ki pou pran en pe letan. Akoz i pou partenarya avek sektor prive. Me nou annan pasyans pou espere.

Donk pou lagrikiltir ki manner ou pe mazin anmenn tou bann distrik. E mon pe dir sa, akoz ou a rapel dan Bidze, mon ti demann ou lo kestyon *agroforestry*.

E osi mon'n fer en konversasyon avek PS Nancy ki la o bor ou lo sa size, ki manner Mont Buxton nou kapab benefisyé, avek bann keksoz parey dan lafore ki nou annan.

Malgre nou dan lavil, nou annan bwa, nou annan montanny, i annan kannel, bann keksoz koumsa. Donk, ki manner bann distrik i benefisyé direkteman dan sa plan? Mersi.

MR SPEAKER

Mersi Onorab. Minis.

MINISTER
JOUBERT

FLAVIEN

Mersi Mr Speaker. Mersi Onorab pou sa kestyon. Onorab pa tou lenformasyon ki

nou'n fini kapab konplete pou tou bann distrik.

Par egzanp parey mon'n eksplike, nou pe fer en kontrandi bann keksoz ki i annan pou fer avek later ek bann lezot fasilite. Letan nou'n koz avek, nou'n fer diskisyon par egzanp ek Minis ki ou'n fer referans avek Minis pou lenvestisman.

Ki nou'n tonm dakor, se ki dan tou bann landrwa kot i annan bann fasilite later endistriyel, ouswa bann later ki ganny *allocate* pou komersyal, nou bezwen donn plas pou transformasyon ago alimanter.

Sa i en keksoz ki kler, ki dan Polisi, e ki nou satisfè ki in ganny mete ladan. Savedir ki tou bann landrwa kot i annan bann sit kot ozordi in ganny *allocate* pou diferan kalite aktivite dan distrik, nou bezwen annan bann lespas ki ganny *allocate* pou transformasyon agro alimanter.

Ki ava benefisye tou bann dimoun ki anvè fer sa bann aktivite dan zot distrik menm.

Kot i konsèrn bann fasilite parey *agroforestry*, i annan en pe travay ki pe ganny fer pou fer en evalyasyon bann landrwa ki i annan pou fer avek *agroforestry*.

E sa pe ganny fer ansanm avek sipor *FAO*. E nou ti a

voudre ki letan sa i konplete, nou kapab idantifye tou bann landrwa kot i annan potansyèl pou fer *agroforestry*. Aktyelman la, mon a donn en legzanp.

Nou'n idantifye sa bout Montagne Posée ki ti'n deza pe ganny serten aktivite lo la. E nou pou koup li an diferan morso. E nou pou donn apepre 10 dimoun ki anvè fer *agroforestry* lo la, pou zot kapab fer bann travay, enkli mous dimyèl, kiltivasyon fri, legim ek bann lezot prodwir fore. Sa i en lot. *So agroforestry* pe ganny fer anba sa proze avek *FAO*.

E nou ti a voudre ki sak bann diferan rezyon letan i ganny, nou konplet sa legzersis, nou kapab endik dimoun kote ki i annan sa bann potansyèl. E prezan dimoun dan sa bann rezyon i a kapab fer en aplikasyon.

Me selman parey mon'n dir, pa dan tou ka kot tou distrik i pou annan fasilite pou li fer sa. I annan distrik ki napa potansyèl pou lagrikiltir ditou. Annou pran distrik parey Perseverance, i napa sa potansyèl.

So nou pou bezwen regroup nou bann dimoun dan bann landrwa, dan bann zone, ouswa dan bann rezyon kot nou

konnen i annan potansyel pou nou fer sa bann kalite aktivite.

Aprè osi lot diskisyon ki nou'n ganyen avèk *Fisheries* osi, se i annan en kantite zefor pe ganny mete lo bann bazar, bann fasilite ki pou deservi peser. Osi an diskisyon, pou ki sa bann fasilite i bezwen obligatwarman annan fasilite pou ferme ek bann dimoun, ki pe fer distribisyon pou bann prodwir agrikol.

Ki zot osi zot a ganny en lespas pou zot kapab fer keksoz. E sa nou'n ganny diskisyon, nou'n lev sa pwen avèk sa Minister e osi avèk lezot dimoun.

E nou ti a voudre ki sa osi i vin en keksoz ki ganny war koman en keksoz permanan pou tou landrwa ki annan bazar. Akoz bazar pa ganny fer par distrik, i ganny fer par diferan *zone* ouswa diferan rezyon ki egziste.

Me an menm tan Onorab, kot i konsern bann distrik, nou toultan an kominikasyon avèk bann *MNAs*, bann *DAs* pou nou kapab organiz bann keksoz ki plis spesifik pou distrik.

So si i annan, parey ou'n lev sa pwen *agro forestry* pou Mont Buxton, kot ou napa bokou later plat, me ou annan potansyel dan montanny.

Then nou kapab osi travay avèk sa distrik, pou nou travay lo en program, ki adres son sityasyon dan son distrik dapre bann potansyel ki i annan dan sa distrik. Akoz sak distrik son potansyel i diferan.

E mon krwar i enportan osi ki nou annan sa lyezon kontinyel. I annan *MNA* ki nou'n al dan lapay, dan bwa partou pou nou al get bann teren.

E nou fer en keksoz ki spesifikman pou sa distrik, pou adres bann size ki i annan pou fer ek son bann zabitan, ek zot bann bezwen dan zot distrik. Mersi.

MR SPEAKER

Mersi Minis. Onorab Cosgrow.

HON WALLACE COSGROW

Mersi Mr Speaker. Bonn apre midi Minis, bonn apre midi tou lezot dimoun. Minis, pou nou kapab bouz en lavan avèk sa plan petet ki ou'n met devan, i pou nesest ki nou annan akse teren.

Minis eski ou kapab dir nou ki kantite later sou prodiksyon ki zot in petet pran pandan sa dernyen lan? Ki kantite later, nouvo later ki zot in nobou donnen pandan sa menm peryod?

E ki prosedir pou akse later lagrikiltir, eski i ankor parey lo en baz lalis, *first come, first serve*, ouswa zot in sanz bann prosedir?

Par egzantp mon konpran, ti annan en letan ti pe mazin, en dimoun i *submit* en proze e zot *assess* son proze baze lo la, zot donn li en kare later? So mersi Minis.

MR SPEAKER

Mersi Onorab. Minis.

MINISTER FLAVIEN JOUBERT

Mersi Mr Speaker. Mersi Onorab pou sa kestyon. Mr Speaker mon napa sa *figure* egzakt lo later ki'n rebran, ki pa prodiktiv.

Me selman mon ti a oule reasir Onorab e mon kapab donn ou sa bann lenformasyon dan en *email*. Ki nou'n aktyelman pran later ki pa prodiktiv. Resaman nou'n pran e nou ti a voudre akseler sa prosesis dan sa bann mwan ki pe vini.

Nou'n travay avek Minister *MLUH* pou nou idantifye en bon pe bann landrwa. E nou pe kontinyelman fer sa legzersis.

Akoz ki nou'n demann Minister Later pou fer, se transfer tou later ki annan pou

fer ek lagrikiltir anba en sel *database* lenformasyon. La pou le moman, i annan later i pe ganny *manage* kot Minister Later.

I annan later ki pe ganny *manage* kot lagrikiltir. Me pa toultan ki nou konnen, lekel ki lekel e lekel ki i annan plis pou tel peryod letan.

Alor nou oule met tousala ansanm, e osi annan en vre *database*. Pou le moman nou napa en vre *database* pou later, nou annan en *file excel*.

E en *file excel* ou pa kapab *manage* nanryen, akoz ou pa konnen ki *status* sa dimoun, napa okenn lendikasyon ki pe arive avek li. E zis en zour ou dekouver poudir i annan fatak lo later sa dimoun, e apre ou pase e la prezan ou komans prosedir. I pa koumsa ki devret ganny fer.

Alor nou, nou oule anmenn tousala ansanm e travay lo la dan en fason sistematik. E tou bann later ki pa pe ganny servi, nou pou bezwen annan kestyon pou reponn.

Akoz i annan dimoun i asiz lo la tou sa letan. I annan ki fer spekilasyon avek, i pe sey revann *assets*, i pe fer tou *sort* kalite keksoz avek. E nou pa kapab fer sa.

Akoz nou annan en kantite later ki la e ki pa pe ganny servi ditou. E mon ti a osi oule fer remarke Onorab, ki dapre nou evalyasyon letan nou pe gete, i pa neserman nou bezwen adisyonnèl later pou nou al fer lagrikiltir lo la.

Nou bezwen zis pran sa bann ki pe mal ganny servi e met li dan prodiksyon. I annan en kantite landrwa ki pe mal ganny servi. Met li dan prodiksyon e ou ava war ki i annan en diferans lo sa kote.

E si oule bann *case* dan ou rezyon ki kot nou'n reponn, nou kapab donn nou en pe lenformasyon. Akoz nou'n rebran e i annan menm dimoun ki pe konplet akoz nou'n rebran.

Me nou bezwen kontinyen reponn. Lo kote prosedir, letan en dimoun i ganny notife konmkwa i pa pe servi later. Dan lepase ki mon'n war lo *file*, se ki dimoun in fer, in ganny 3, 4 *final*, *final warning*.

Nou pa kapab kontinyen fer sa. Ou ganny en notifikasyon, 2 notifikasyon, *final*, apre *final* i vedir *final*. So nou bezwen tonm dakor lo la, pou dir si ou'n ganny *final* savedir *final*. I pa kapab *final*, *final* e apre nou kontinyen koumsa. Akoz in annan sa dan

lepase e nou pou bezwen desin en laliny a en moman.

Me, wi, prosedir, e nou satisfè parey *PS* in fer mon rapel, nou ase satisfè la prezan ki nou annan en Komite ki ganny dirize par en dimoun ki sorti kot *Attorney Zeneral*, pou bann size ki i annan pou fer avek pou retir later, e zot desizyon i final.

Nou pa zwe avek zot, mon pa kontrol zot desizyon e zot desizyon i ase direk. E enn fwa ki zot donn zot rekomandasyon, nou pa retourn lo la ankor. So si ou'n fini pas ou *final*, i fini.

Lot keksoz Onorab, ou'n demann kestyon lo aplikasyon, ankor enn fwa i en landrwa kot nou war i annan en kantite problem. Letan mon gete, nou annan dimoun ki'n lo lalis depi en long letan, zot pa ankor ganny akse ek later.

I annan dimoun ki'n antre lo lalis resaman, in ganny later, in ale in fer son devlopman. I annan dimoun ki fek antre la resaman, i pe ekspekte ganny later vitman, mon pa konnen akoz.

So i en *massive* dezord. E osi nou annan nou evalyasyon ki nou pe fer ek bann aplikan, mon krwar nou bezwen fer bokou pli serye.

I annan bokou dimoun ou a realize poudir zot pe rod later,

zot pa neserman en fermye, zot en dimoun ki ti a kontan annan en bout later. Me selman eski zot en fermye sa bann dimoun. So sa keston ki nou devret reponn.

E nou bezwen adapte nou sistenm e amelyor nou sistenm pou ki i kler. Letan ou vini pou vin rod en bout later, fodre ou en fermye ki enterese pou devlop sa later pou fer keksoz.

Akoz i annan dimoun, ou pou dakor avek mwan, petet i annan serten ka ki ou'n war, ki son lentansyon se rod en bout later, asiz lo la e fer en lot dimoun kiltive pou li anmas en sonm tou le lafen dimwan. I annan tousala.

Alor nou pou bezwen re aranz nou prosedir e i pa *first come first serve*, i devret dapre ou merit. Me selman i devret ganny fer dan en fason transparan e korek. E sa i enn bann keksoz ki nou oule fer avek sa size reform lo kote later ki nou oule met annord.

Aprè byensir lo kote later, i annan en size ki mon krwar i ankor, i tre enportan e ki pou konsern nou tou e bann Manm Lasanble Nasyon, se sa size bann dimoun ki pe reste lo later lagrikiltir ozordi, ki nou pou bezwen adres li.

I en size ki pou bezwen ganny adrese. I pa pou en size

ki pou tro popiler, i pa pou en size ki pou enplik malis pou person, me nou pou bezwen met li, met annord;- met lord ladan.

So i annan sa bann size, e nou bezwen fer sir ki dan sa travay ki nou pe fer lo kote later keksoz i tonm byen.

E en dimoun ki antre dan sistenm i konpran egzakteman ki i sipoze pe vin fer. E ki son bann lobligasyon letan i pe antre lo later lagrikiltir. Mersi.

MR SPEAKER

Mersi Minis. Onorab Bistoquet.

HON ROSIE BISTOQUET

Mersi Mr Speaker. Bonn apre midi Minis ek ou delegasyon. Minis dan ou *Statement* ti annan 2 keksoz ki'n atrakte latansyon serten dimoun ki pe *text* mwan *back* pou demann mwan.

Dan ou *Statement* ou dir i annan en kantite travay pou fer kot i konsern gro manze, prodiksyon gro manze isi Sesel. Apre e i annan en lot ki ou'n dir, Seselwa nou, nou depan en kantite lo lenportasyon, manze ki enporte.

Baze lo sa 2 *Statement*, la ki ou konnen Minis ki pri avek sa *COVID*, pri transportasyon enternasyon, sirtou pri aryen ouswa pri lo lanmen, bato

ouswa avyon, in ogmante par plis ki 50poursan.

E nou konnen poudir Sesel osi pou ganny afekte. Akoz par egzanp si ou get Sesel, Seselwa i servi plis nou *staple food* i diri.

So isi Sesel nou pa prodwir diri ziska prezan. Ouswa annan de fwa zot al lo ponmdeter. E si par egzanp nou konsonmasyon diri i desann, alors nou pou annan en rediksyon kot Seselwa pa pou kapab servi.

E la ankor mon pou demann ou ki plan ou Minister i annan, pou ranplas sa *staple food* diri avek prodiksyon gro manze isi Sesel, ki annan plis rannman nitritif pou nenport ki, en popilasyon sirtou bann ki pe grandi?

Apre lot i annan en rapor ki'n ganny sorti Minis, ki WHO an 2015, ti annan en rapor ti sorti, ti dir "*Seychelles is the fattest, fattest country in the sub-Saharan.*"

Savedir Sesel i pli gro pei, i annan pli gro dimoun ki pli gro dan *sub-Sahara*. E sa nou ti tonm parmi 5 premye. Nou ti premye lo lalis avek *Mauritania*, avek *Maurice*, avek *Lesotho*.

E nou ti trouve poudir, nou konnen poudir lo kote lasante, o lobezi, lobezi, savedir dimoun ki gra ouswa

overweight, i anmenn en kantite problem lasante. E sa i tonm lo nou sistenm.

E sirtou kot nou trouve ki lobezi i kapab ganny maladi leker, i kapab ganny dyabet, i kapab ganny tansyon, i kapab menm mor.

E i anmenn en kantite problem. Sirtou dyaliz osi i kout tre ser dan en sistenm lasante dan nenport ki pei.

Ki mon pe demann Minis, sirtou la kot sa bann sityasyon i pe ganny afekte nou pei, eski Minis i kapab dir nou, ki fason son Minister pou met, ki plan son Minister pou met anmars pou asire ki i annan bann manze, bann *healthy foods*, ouswa bann manze ki ase nitritif, ki pou ede pou ladyet parey sa tenm in dir?

Ki pou kapab ede pou sa, nou sitwayen ouswa sitwayen Seselwa an bonn sante, napa maladi e tir presyon lo sistenm lasante? Mersi.

MR SPEAKER

Mersi pou ou kestyon Onorab. Minis.

MINISTER FLAVIEN JOUBERT

Mersi Mr Speaker. Mersi Onorab pou ou 2 kestyon. Mr Speaker mon pou pas sa premye kestyon kot i konsern

gro manze, *carbohydrate* ek diri avek Mr Morel, ki en dimoun ki'n pas en bon pe letan lo sa size. Mon ava les li reponn apre mon ava pran lot kestyon. Mersi.

MR SPEAKER

Mersi. Mr Morel ou a pran laparol.

ASSISTANT CONVENOR GUY MOREL

Mersi Mr Speaker. Mersi Minis. Bon zis pou met en pti pe nou kantite *carbs* ki nou konsonmen koman en pei, nou konsonm nou anviron 18mil ton, 18 mil tonn par an.

Ladan diri i zis anviron 8 mil, lafarin, ponmdeter, *pasta*, se tou bann diferan form *carbs* ki nou konsonmen. Travay ki nou'n fer prodiksyon lokal, gro manze, i anviron 1500 tonn.

Parey zot kapab vwar 1500 tonn, ler ou konpar li avek 18mil i en pti poursantaz. Travay ki bezwen ganny fer, i bezwen ganny fer lo laspe prodiksyon, byensir pou ogmant bokou plis prodiksyon dan bann diferan laform *carbs* ki nou annan.

Me osi en program sanzman persepsyon e apresyasyon lafason ki nou vwar e nou konsonm bann *carbohydrates* lokal. Par

egzanp, travay ki nou'n fer, nou'n kapab prodwir *ice cream* a la baz friyapen, patat, mayok e nou pe menm koz lo ki mannyer nou kapab transform bann *local carbs*. In deza ganny fer, i annan en dimoun isi ki'n fer, in fer biskwi avek mayok.

E menm la nou pe gete ki mannyer nou kapab transform friyapen dan lafarin. Byensir sa, teknolozi i egziste e en kantite pei i fer sa.

E nou pe travay avek bann *chef*, bann *executive chef* e osi bann lezot *chef*, pou vwar bann lafason kreatif ki mannyer nou kapab servi *carbs* atraver sa ki nou apel lakwizin adapte. Bann *fine dining*.

E semenn prosen pou pe zwenn avek bann *chef* pou adres sa size. E an menm tan vwar ki mannyer nou kapab servi zot konpetans, pou zot kapab enfliyans en pe lafason ki bann prodwir i ganny itilize dan lafason, pa zis tradisyonnal, me osi inovatif.

E vwala mezir ki nou panse pandan sa 10 an ki nou pe targete, nou kapab dousman, dousman enfliyans lafason ki kiltivasyon byensir pou bezwen ogmant prodiksyon.

Me osi en program ledikasyon e osi en program preparasyon manze, servi bann

food influences, lafason ki nou kapab mye itilize nou bann resours.

Par egzanp mon ti al kot en zanmi ki ti fer en *pie* avek zak tann e ler nou ti goute, ti parey lavyann ek zak tann. E i ti fer en preparasyon leker bannann ki'n fri dan lafarin, zanmen ou a dir leker bannann.

Alor i annan en kantite travay inovasyon ki nou kapab fer an term lafason ki nou prepar manze, pou nou kapab transform sa *dietary imbalance* ki nou annan ozordi dan nou sosyete. Mersi Mr Speaker.

MR SPEAKER

Mersi. Minis i annan lot pwen ou ti pou adrese?

MINISTER FLAVIEN JOUBERT

Mersi Mr Speaker, mersi Mr Morel pou sa bout repons. Mr Speaker Onorab ti'n osi demann kestyon lo konsern lobezite.

Mon pa pou kapab asize fer krwar poudir mon eksper lo obezite, aköz sa i plito konsern bann dimoun Lasante. Ou menm Onorab ou enn sa bann dimoun ki konpran byen.

Me dan mon enterpretasyon obezite i annan pou fer avek manze, me osi avek kalite lavi ki nou viv. E nou

stratezi ki nou pe vin avek, se ankouraz dimoun pou manz plis e pli byen an servan bann prodwir ki la devan nou ozordi.

E nou konnen poudir en bon pe sa bann prodwir i pa neserman bann prodwi ki pou koz nou bann problemn obezite. Me an menm tan, mon krwar i annan en lot morso sa travay ki konsern lafason ki nou bann dimoun i viv.

E lafason ki zot konsonmen, e nou bezwen fer sir ki nou pe osi travay e nou bann dimoun atraver bann aktivite, lafason ki nou kominote i ganny striktire, eksetera.

Pou ki dimoun i kapab osi viv en lavi ki pou pli normal, kot zot pa pe kree problemn lobezite pou zot lekor. E sa i pa neserman dan nou plan, me i pou relye avek nou plan e nou bann konpanyi ki nou oule fer avek bann lezot partner, pou nou ankouraz dimoun pou manz byen e viv byen.

Akoz letan ou get en lavi kot ou pe konsonm lokal, i osi en lavi kot ou aktiv, i osi en lavi kot ou sirkile e ou pe ganny kontak avek diferan dimoun.

E i fer ki ou kapab vreman viv en lavi kot ou pa pe vreman zis asize. Par egzanp dan en transpor, ouswa asize devan televizyon. Apre osi mon

krwar, i annan en pti pwen ki mon'n ti fer Onorab, lo kote *affordability*.

Mon krwar i en kestyon ki nou bezwen osi koz lo la, se ki bokou dimoun pou dir ou manze lokal i ser.

Alor i swazir pou li manz ponmdeter fri kot en *Chips Shop*, kot en landrwa ki fer *fish and, chicken and chips*, olye ki i al aste en manze lokal, ouswa en gro manze lokal.

Alors sa osi nou bezwen travay lo la, pou ki nou pe war lo marse bann prodwir ki rezonnab, pou dimoun kapab konsonmen.

I annan sa bann posibilite, akoz i annan plizyer landrwa, plizyer fermye, plizyer prodikter zot pe ofer sa bann prodwir a bann pri rezonnab. Me selman pa toultan ki sa pri rezonnab pe ariv kot tou dimoun.

Alor nou bezwen organiz nou, pou ki sa bann dimoun ki kapab ofer manze lo en pri vremen rezonnab, i pe kapab ariv kot bann konsonmater i bezwen sa servis e ki kapab prezan akse sa bann manze.

Akoz si nou kontinyen koumsa, toultan nou dimoun pou manz zis ponmdeter e zot pou kontinyen ganny sa problemn lobezite. Mersi.

MR SPEAKER

Mersi Minis. Onorab Georges.

HON BERNARD GEORGES

Mersi Mr Chair. Bonn apre midi Minis avek ou delegasyon. Minis mon ti a kontan remersye ou pou en apersi konpreansiv lo size lagrikiltir avek nou sityasyon manze dan nou pei.

Sa in, mon krwar donn nou en gran konfor ki, e mon konnen mon pa koz pou zis mon tousel ki nou lavenir dan sa sekter i dan bon lanmen. E mon felisit ou pou sa.

Sa ki mon ti a kontan adrese apre midi se 2 pwen an partikilye. Premyerman, si mon'n mank ou, akoz mon'n ariv en pti pe tar apre midi, eskiz mwan.

Me mon pa'n tann bokou keksoz lo *intensive agriculture*. Mon'n tann ou dir e ki ou annan rezon, ki par egzanp Perseverance napa later lagrikiltir, me i ti a kapab kekfwa annan en vokasyon dan *hydroponics* oubyen en lot kalite fason prodiksyon.

Eski, e mon mazine sa i dan ou program, me mon ti a kontan tann en pti pe lo la. Me pli partikilyerman mon ti anvi demann ou en kestyon an zeneral.

Lannen pase ler *COVID* ti'n vremen frap nou, tou

dimoun ti'n tonm dakor ki nou bezwen revwar en pti pe lafason ki nou plan nou lavi dan lefitir.

E nou bezwen, bokou pli otosifizan. Nou bezwen met bokou plis akse lo prodiksyon lokal, ki non-selman pli nitritif, me i *save* en kantite *foreign exchange*, eksetera.

La ki touris in rebran e i pe rebran dan en fason vit, mon en pe konsernen ki nou pou bliye sa bann *pledge* ki nou'n fer e ki nou pou retourn *to the bad old days*, kot nou pou depann lo *tourism*, akoz nou konn fer li, i fasil, i anmenn larzan vit.

E nou pou bliy en pe bann *pledge* ki nou'n fer pou nou diversifye nou lekonomi e al plito lo lagrikiltir o plito devlop lagrikiltir, Sekter Prodiksyon Manze, koman en sekter kle dan nou lekonomi.

Eski ou ti a kapab donn nou en konfor, ki nou pa devret *worry*, nou pa devret trakase, e ki ou pou fer sir ki nou pa *backslide* lo sa bann promes ki nou'n fer avek nou lekor lannen pase? Mersi Mr Chair.

MR SPEAKER

Mersi Onorab. Minis.

MINISTER **JOUBERT**

FLAVIEN

Mersi Mr Speaker, mersi Onorab pou sa 2 kestyon, sa 2 pwen ki tre enportan. Mr Speaker kot i konsern lagrikiltir entansif, i annan demann pou fer lagrikiltir entansif dan pei aktyelman.

E prensip ki nou'n adopte letan mwan mon'n zwenn, se ki nou bezwen ouver laport pou tou form lagrikiltir. E lagrikiltir entansif i pa devret ganny mete dan en kwen koman en keksoz ki diferan avek lagrikiltir normal.

Annefe dan bokou sans lagrikiltir entansif i ekonomik kot i konsern delo, i servi bokou mwens pestisid, akoz ou dan en lanvironnman kontrole, kot ou pa bezwen pe trete kont plizyer pest.

E ou kapab kontrol en kantite ou bann *inputs* e tir en pli bon profi avek ou depans ki ou pe fer lo bann antren ki ou met dan ou prodiksyon. E alor pou mwan i en keksoz ki toutafe normal, ki nou devret pe ankouraz dimoun pou fer.

E i osi tre enportan, en pli bon fason pou nou servi nou later. Akoz lagrikiltir entansif dan en bon pe ka ou pa bezwen bann gran lespas later plat kot ou bezwen al kiltiv sepa konbyen mil met kare.

Aktyelman i ganny fer lo lespas pli ptipti. E i ganny fer

dan bann landrwa ki normalman i pa pou ganny konsidere koman bon later lagrikiltir.

Annefe la aktyelman nou annan 2 zenn ki'n demann nou lespas. E nou pe fer sa bann plas pare lo kote Grand Anse Mahe.

I annan osi en lot dimoun ki'n anvoy en proze, prodiksyon proze pou fer kiltivasyon anndan anba lanvironnman kontrole, e sa osi nou pe sey rod en landrwa, lo lakot Les Mahe ouswa en landrwa kot i apropriye pou nou kapab fer li.

I osi annan dimoun ki, aktyelman nou annan 2 aplikan ki oule fer kiltivasyon totalman an frenmen, kot i annan bann lanvironnman ki 100 pousan kontrole. E sa osi enn lo Mahe, enn lo Praslin.

E sa osi nou pe fer demars pou nou ganny landrwa pou zot kapab komans demar zot loperasyon. E byensir i annan bann keksoz ki nou pe ankouraz zot pou zot adopte, par egzanp met *solar* pou zot koup lo lenerzi ki zot servi.

Me tou form lagrikiltir i merit ganny ankouraze, e personnelman mon napa okenn preferans lo laform ki lagrikiltir i ganny fer, tan ki i donn nou sa prodiksyon.

E osi mon krwar nou bezwen realize osi Onorab, ki sa bann legim ki nou pe enportan par avyon ki pe antre Sesel, i annan en bon pe, pe sorti dan bann fasilite entansif. Me i annan dimoun ki kapab fer entansif isi.

Akoz ki nou pa ankouraz li fer isi Sesel, me selman nou pe enporte sorti an deor. Pou mwan i fer sans toutafe, pou nou ankouraz tou sa ki anvi fer, diferan laform lagrikiltir, donn li sa posibilite kot nou kapab, petet serten ka kot nou napa sa resours, nou napa sa later, me selman kot nou annan, donn li, ouver laport pou li kapab li osi devlope.

Kot i konsern bann *pledges* ki'n ganny fer e sa realizasyon ki'n ganny fer dan letan *COVID*, byensir, letan, letan i normal nou bliye bann promes ki nou ti fer.

Me mon ava zis koz lo 2 pti keksoz ki mon krwar i enportan ki nou, ki dan sa plan ki nou pe koz lo la. Enn, se ki par egzanp lo kote bann later lagrikiltir ek bann *land use*, nou, nou ti a voudre ki nou *lock* sa dan bann lareg ki ou pa kapab kase.

Par egzanp i annan bann *land use* kot konmela, ozordi i lagrikiltir, demen nou dir non, keler lagrikiltir i fer en lot keksoz. Me nou pou bezwen

lock sa down dan regilasyon ouswa dan bann lareg ki pou ou kase ou bezwen annan en prosedir pou ou kas li. So sa i enn bann keksoz.

Lot keksoz ki nou oule fer, se ki nou bezwen annan bokou plis lenfrastruktir ki relye avek lagrikiltir, bann landrwa kot nou pe transformen, kot sa bann dimoun i entegre dan *market*.

I a en bann dimoun ki zis la lo en baz tanporer ale vini, ouswa letan i donnen i prodwir apre i retournen.

Me ou annan bann keksoz ki entegre dan marse, bann sistenm ki entegre dan marse ki reste la lo en baz permanan e i form parti nou lekonomi Nasyonal, pou ki bann dimoun i kontinyen prodwir e osi pe distribye nasyonalman

Enn bann keksoz ki nou'n remarke, se ki benefis lagrikiltir i pa zis dan prodiksyon lo laferm. I bokou annan pou fer avek distribisyon e transformasyon.

E nou bezwen ed bann dimoun pou zot entegre zot byen e etabli zot byen dan transformasyon e distribisyon pou ki zot kapab annan sa permanans dan sa sektor.

E non pa bann dimoun ki zis dan prodiksyon e zour keksoz i tonbe, demann i tonbe,

zot arete lo laferm e apre keksoz i tonbe. I annan tou sa bann keksoz ki nou bezwen fer.

E osi byensir i en kestyon dimoun. Pou le moman en bon pe nou bann laferm i depan lo etranze. E letan etranze i ale, nou, ouswa nou pran *GOP*, nou donn plis *GOP tourism* ki nou donn laferm, *ok?*

So i enportan ki nou kapab osi mazin koumsa, ki nou bezwen annan dimoun ki enterese e ki lonterm dan prodiksyon e zot a kapab kontinyen tenir sa. E zot pe trouv sa benefis ki zot kapab kontinyen reste lo en baz bokou pli permanan.

Akoz si en dimoun pe ganny en pti benefis ki leze, letan sityasyon i dir, i pou sorti ladan. Mersi.

MR SPEAKER

Mersi Minis. Onorab Uranie.

HON ROCKY URANIE

Mersi Mr Speaker, bonn apre midi Minis avek ou delegasyon. Bonn apre midi tou koleg Onorab.

Minis ki plan devlopman lagrikiltir e osi ki proteksyon pou bann pti ferme Digwa, pou ki zot kapab reste soutenab pou prodwi, kontinyen fer zot prodwi lokal?

E osi kote Gouvernman i antre pou fer sir, pou donn serten sipor plito, pou fer sir ki i annan sa sinerzi ant bann pti fermye e Linyon Estate?

Minis akoz mon'n koz lo proteksyon dan mon kestyon, akoz bann fermye ti en pti pe konsernen, akoz zot ti pe tandé ki i annan serten gro prodikter ki ganny drwa pe antre lo La Digue. Mersi.

MR SPEAKER

Mersi Onorab. Minis.

MINISTER FLAVIEN JOUBERT

Mersi Onorab, mersi Mr Speaker. Onorab pou La Digue mon pou zis donn ou, mon pou donn ou egzakteman ki bann keksoz ki dan laliny la, ki nou pe al fer lo La Digue.

Enn se parey mon ti eksplike dernyen fwa, i annan sa bann fermye ki nou pe organize pou donn zot lespas lo kote Grand Anse La Digue.

E 2 nou annan en elever ki annan bef, ki nou pe fer laranzman pou nou fer nou fasilite akote Linyon Estate pou li kapab deplase.

Akoz i annan en gro problemn difikilte pou gannyen avek bann zabitan lo kote La Passé. E se sa bann keksoz ki nou pe targete dan nou, parey

nou dir *pipeline* pou La Digue dan sa letan ki pe vini.

Nou ki nou krwar - parey mon'n dir, bann landrwa ki'n ganny fer aktivite lagrikiltir, i devret ganny proteze dan en fason regle dapre Lalwa.

E sa i ava anpese ki nou ganny okenn problemn dan lefitir, kot sa bann landrwa i ganny tire e ganny servi pou lezot bi.

Me kot i konsern Linyon Estate, mon napa tou lenformasyon lo bann plan Linyon Estate pou lefitir, me selman nou konnen ki Linyon Estate son rol ki i zwe lo La Digue.

E i merit, dan tou fason Linyon Estate i annan en relasyon direk avek bann dimoun ki prodwir lo La Digue e i pa devret vin en sityasyon kot i annan en konpetisyon. Akoz Linyon Estate finalman i reprezant leta.

I pa kapab pe antre an konpetisyon e deplas bann dimoun ki deza dan prodiksyon lo La Digue. Pou mwan mon krwar i devret annan sa diskisyon, sa, si i annan en plan prodiksyon pou Linyon Estate, en plan akselere, sa nou ava rod en pe lenformasyon e nou a kapab donn ou.

Me selman dan tou fason Linyon Estate son plan i devret

annakor avek en plan pou prodiksyon lo La Digue, e pa zis pou Linyon Estate, pou li deplas bann ferme ki deza la e tir bann loportinite pou zot.

Parey mon ti'n eksplike pli boner, nou annan en proze ki nou pe ekspekte konfirm en don pou nou fer fasilite *cold storage*.

E enn bann landrwa ki nou'n ganny diskisyon, Mr Morel dan son bann enteraksyon in ganny en diskisyon avek bann ferme La Digue.

E nou ti a voudre anmenn sa an premye lo La Digue pou ed bann ferme annan en fasilite *cold storage*, ki *solar*, ki a kapab ed zot pou zot fer regroupman e distribisyon bann prodwir.

Me nou pa pou kapab fer sa si zot an konpetisyon avek Linyon Estate. I bezwen ganny fer an akor avek sa ki pe ganny fer Linyon e tou dimoun i devret pe travay pou menm bi.

E nou bi se met manze lo marse lokal. Alor mon pa pou kapab donn tou, plis lenformasyon lo Linyon Estate la konmela aktyelman.

Me mon ava rod en pe lenformasyon lo son plan devlopman lagrikiltir dan bann letan ki pe vini, e trouve ki manner sa bann plan prodiksyon ek sa bann target

prodiksyon i kapab ganny met anliny avek en plan prodiksyon pou La Digue e non pa zis pou sa estate. Mersi.

MR SPEAKER

Mersi Minis. Mon a pas Onorab Waven William.

HON WAVEN WILLIAM

Mersi Mr Speaker. Bonn apre midi Minis avek ou lekip. Minis mon'n ekout ou avek latansyon e mon'n pran kont bann defi.

Mon anvi demann avek ou, par lefe ki ou Minister li menm li, i annan sa konponan lanvironnman, sanzman klima, lagrikiltir, mon anvi demann ou si a ler aktyel, ou santi poudir ou Minister pe annan bon balans?

Par lefe ki nou pe koz *lo food security*, me an menm tan i annan sa laspe proteksyon lanvironnman, prenon kont profil nou *landscape* later.

E akonpanyen avek sa, mon anvi demann ou si, eski ou santi poudir ou menm ou personnelman ou satisfè poudir i pou annan sa nesesite pou al dan *zoning*? Akoz i annan serten bann aktivite ki si nou pa veye, i pou annan en lenpak lo lanvironnman.

E dezyenmman Minis, par lefe ki ou dir poudir teknolozi

dan lavenir pou zwe en rol enportan.

Mon anvi demann ou, sirtou avek sa laspe sanzman klima, proteksyon lanvironnman, eski ou santi poudir a lavenir nou pou bezwen regard plis anver en devlopman lagrikiltir entansif anba en sistenm kontrol?

E akoz si ou pe koz sanzman klima san en lanvironnman kontrole, mon pou war li en pe difisil Minis. Mersi.

MR SPEAKER

Mersi Onorab. Minis.

MINISTER FLAVIEN JOUBERT

Mersi Mr Speaker, mersi Onorab pou sa 2 kestyon. Mr Speaker mon ava al direk lo sa enn dezyenm.

Mon krwar larepons i wi, an mezir keksoz i devlope e dapre bann teknolozi ki ganny prodwir, nou pou bezwen koman en pei konsider bokou plis bann kiltivasyon ki nou annan plis kontrol;- pou ki nou kapab adapte e kontinyen prodwi san ki nou bezwen swa agrandi nou lespas ki nou pe prodwi lo la.

Ouswa san ki nou bezwen, par egzanp servi plis pestisid eksetera. Alor nou pou

bezwen pe travay bokou plis lo la. E parey mon'n dir, fodre pa ki nou get sa bann teknolozi, menm si nou konsider li koman en teknolozi entansif.

Pa toultan ki nou bezwen get sa bann teknolozi koman bann keksoz ki abnormal ouswa ki negativ. Akoz dan serten ka i permet en dimoun lo en lespas ki mwayen, aktyelman prodwir, met manze lo marse avek mwens lenpak.

Konpare avek en kantite bann kiltivasyon ki i annan lo bann gran lespas.

Premye pwen Mr Speaker, ti pe refer lo si sa lyen e sa koabitasyon dan en fason parey Onorab pe dir, ant Lanvironnman ek Lagrikiltir anba menm Minister pe mars byen.

Dapre mon lenterpretasyon, wi i pe mars byen. I annan serten ka kot keksoz i kapab vin en pe kontredir kanmarad. Me selman, mon krwar i mars byen e i annan plizyer landrwa kot nou pe trouv bann sinerzi ant sa de.

Par egzanp parey mon'n dir la, enn nou bann bi devan nou, se pou nou fer ki lagrikiltir i benefisye avek bann fasilite ki egziste pou adaptasyon klimatik.

Dan lepase zot in debout zistans ek kanmarad e nou pa'n vwar sa benefis kot i vini. E enn bann keksoz ki nou anvi fer e ki nou target pou nou fer, se anmenn sa bout adaptasyon klimatik bokou plis lagrikiltir.

E trouv bann sours sipor, finansyel, teknik, pou nou kapab ed bann fermye pou zot fer fas avek bann sityasyon ki nou pe koz lo la, kot i konsern adaptasyon klimatik.

E la mon pe koz, mon pa pe koz bann keksoz ki an deor sa ki nou abitye konnen. Nou pe koz sistenm pou nou ponp delo, nou pe koz sistenm pou nou kontrol lanvironnman kot nou pe kiltive.

Nou pe koz bann sipor pou fer sir nou annan en pli bon drenaz eksetera. Ki ed en dimoun kiltive e fer son travay dan en fason pli bokou pli sir e san risk.

Alor pou mwan Onorab, sa bout legzistans lagrikiltir ek lanvironnman anba menm Minister i pa tro en problem. Mon krwar i kapab fonksyonnen, e nou kapab montre poudir i pe fonksyonnen.

Eski nou pou bezwen zone serten landrwa pou nou redwir lenpak? Mon krwar i en pe direksyon ki nou pou bezwen ale evantyelman.

Se travay avek bann diferan Minister par egzantp Minister ki Responsab Later e tonm dakor lo nou bann, lafason ki nou servi nou bann teren dan pei.

E fer sir nou konkretiz sa bann *zoning* dan en fason ki bokou pli direk, e pa les li vin en keksoz kot toulezour desizyon i ganny fer diferan fason.

I annan plizyer landrwa kot fermye pe konplent par egzantp, ki mon'n konmans fer mon laferm, mon ti'n fer li dan tel fason. Me apre la mon war en lot lareg ki vini, ki dir mon, mon bezwen tire, swa mon bezwen aranze, aziste, ki i kree en problem.

Alor nou pou bezwen fer keksoz dan en fason bokou pli sir lo sa zafer *zoning* ek *contain* bann diferan lenpak dan diferan rezyon. Mersi.

MR SPEAKER

Mersi Minis. Onorab Roucou.

HON MICHEL ROUCOU

Mersi Mr Speaker. Bonn apre midi Minis avek ou lekip. Bonn apre midi spesyal pou zabitan Mont Fleuri.

Minis anvi ki nou vwar, avek bann devlopman ki pe vini, mazorite nou popilasyon pe reste dan bann flat, dan bann *housing estate*. E nou

vwar poudir osi dan bann lakour, i annan lankourazman kot bann dimoun pe plant kot zot.

E ler ou pas dan plizyer distrik, nou war bann pti latab kot dimoun pe vann bann fri e bann gro manze.

Ki Minister pe fer pou kontinyen ankouraz pou plant kot bann lakour e menm koz avek Minister pou Lakaz avek Later, pou ankouraz bann dimoun ki reste dan bann flat, pou zot servi bann bout later ki i annan, pou zot kapab plante? Ki sa i a benefisye pei li menm li.

Aprè mon dezyenm kestyon, i lo kote, ou'n dir ki i annan bann nouvo dimoun ki pe vin devan, ki pe montre lentere pou zot ganny later, pou zot plante. Si ou kapab dir nou apepre kantite dimoun ki annan la ki pe vin devan la ki pe espere?

E mon trwazyenm kestyon Minis, eski ou Minister i pe mazin lonterm? Nou'n war poudir i annan en zenerasyon la ki pe vye e nou annan en nouvo zenerasyon la, sirtou kot Lekol pou Plante Baie Lazare.

Ki zot, eski zot pe antre en dyalog avek bann fermye ki zot bezwen ankadre sa bann etidyan, ki demen zot a kapab

pran larelev sa devlopman? Mersi.

MR SPEAKER

Mersi Onorab. Minis.

MINISTER FLAVIEN JOUBERT

Mersi Mr Speaker. Mersi Onorab pou 3 pwen. Kiltivasyon dan bann landrwa kot ou annan bann flat sirtou, mon krwar i en keksoz ki vreman enportan, i annan bann group ki'n deza komans bann serten linisyativ.

E dan lepase Minister atraver en proze in siporte sa bann linisyativ. E i enn - i form parti nou plan pou nou kontinyen siport sa bann zefor. Akoz parey mon'n fer resorti i annan apepre 8 mil lakaz ki pe fer en kalite aktivite lagrikiltir o mwen.

E si nou kalkile, nou annan nou mwens ki 50mil lakaz Sesel, i en gro proporsyon nou bann zabitan ki pe fer en zefor lo kote kiltivasyon.

Me mon krwar sa pwen ki ou'n leve i en pwen tre enportan kot i konsern nou fason ki nou pe viv konmela. Avan sa nou ti pe viv dan bann landrwa kot ou annan lespas e dimoun ti pe fer kiltivasyon lo bor zot lakaz, zot ti annan later.

Me ozordi nou vwar bokou fanmir pe viv dan flat e zot napa en bout ater pou zot kapab fer kiltivasyon. E sa i lev en pwen lo eski prezan nou pou bezwen annan bann lespas ganny met a kote letan nou pe fer bann estate, nou planifye li byen.

Bann lespas kot dimoun prezan i kapab sorti kot li al dan en lespas kot i konnen li ki an kontrol dan sa landrwa. E i kapab fer en pe kiltivasyon pou sonny son fanmir ouswa pou ed son lekor.

E sa i kapab vin en komansman osi pou li antre dan sa rol lagrikiltir. Akoz si ou'n komans dan en flat e ou pa pe pratike, ou pa pou zanmen demare.

E mon krwar sa i en keksoz ki devret antre dan bann plan devlopman bann *estate*. Pou ki nou kapab vreman ed nou bann dimoun, donn zot sipor pou zot kapab fer kiltivasyon.

Parey mon'n dir lo kote nou bann *store*, nou ti a voudre ki nou bann *store* i *improve* e i kapab prodwir plis. I kapab donn plis prodwir pou bann dimoun ki oule fer kiltivasyon lo bann pti lesel.

Dimoun i merit kapab antre dan en landrwa e non pa get dan en trou, parey nou war konmela. I devret antre dan en

magazen, rod en prodwir pou li servi dan son kiltivasyon ki i pe fer kot son lakour.

So donn sa bann dimoun sipor pou zot fer sa bann keksoz. Me osi an menm tan planifye pou zot letan nou pe kalkil bann *housing estate*.

Mon krwar nou'n ariv en staz kot nou pou bezwen mazine *housing estate* koman en landrwa ki dimoun i viv e non pa en landrwa kot met zis dimoun dan en lakaz ouswa dan en flat e apre nou bliy li.

I devret en landrwa kot dimoun i annan lespas pou li viv e lespas pou li aranz son lavi lafanmir, son lavi la kominoter byen. So sa mon krwar i en pwen tre enportan Onorab.

Konbyen dimoun ki'n vin devan pou later lagrikiltir? Aktyelman la nou kapab dir in mont par pres 150.

E nou ti annan en bon pe ki ti reste lo lalis depi avan, ki fer ki nou kantite dimoun ki pe demande i pe monte en kantite. E tou sa bann dimoun zot dir ou mon oule, byensir zot oule.

Me nou napa bokou, nou napa ase later. Nou bezwen triye e target bann ki nou konnen zot annan sa potansyel pou zot vreman fer en keksoz avek sa later ki zot pou gannyen.

E se sa keksoz ki lakle, ki manner nou triy sa bann group dimoun e ki bann kriter ki nou aplike tou?

Nouvo zenerasyon fermye, eski nou'n antre an dyalog avek bann diferan fermye? Nou bann *extension officer* i konn en pe bann sityasyon lo bann fermye.

Me parey mon'n dir, nou napa aktyelman en bon *database* lo nou bann laferm en. Nou konn zot lo *file* e nou annan en bon pe fermye, en bon dimoun ki nou annan lalis avek.

E zot annan, zot non i la lo *file*, nou napa ase lenformasyon lo zot e nou pa pe *manage* zot byen. E mwan resaman, par egzant mon'n war *renewal list* pou dimoun ki annan 70an an montan.

E mon demann mon lekor sa kestyon, eski nou pa devret pe, depi lontan depi ler nou ti konnen i pe apros sa laz, komans travay pou nou annan en lot keksoz ki vin apre sa? So i annan en kantite keksoz ki nou bezwen travay lo la.

Me kot i konsern nouvo zenerasyon, i annan en travay vremen, vremen enportan ki nou bezwen fer atraver nou sistenm edikatif, pou nou fer ki nouvo manrmay i antre dan sistenm lagrikiltir.

Bann ki enterese, bann ki annan potansyel, depi nivo teknik ziskan nivo laferm, sa bann dimoun zot kapab fer keksoz, e zot annan bann konesans e kapasite pou zot fer li.

Annou pran legzanp, napa bokou manrmay ozordi ki konpran mekanizasyon. Zot pa pe ganny ekspoze preski ditou avek mekanizasyon dan lagrikiltir, avek servi bann masin pou zot fer kiltivasyon.

E sa i fer ki zot pa santi zot konfortab pou zot al fer travay ki *manual*. Me nou devret annan bann fasilite, bann loportinite pou bann manrmay kapab konpran ki manner keksoz i ganny fer lo en lesel ki korek.

Enn bann diskisyon ki nou'n fer Onorab se nou'n diskrit avek *IDC*, e depi Zanvye 2022, nou pou lans dan en linisyativ avek zot, pou nou kapab ankadre en bon pe bann zenn dan bann aktivite laferm pou plizyer mwan, depan manner program i ava ganny fer.

Pou zot kapab ganny ankadre e zot a partisip dan devlopman lagrikiltir. E apre sa ou konnen poudir ou'n form bann dimoun ki vremen konnen ki zot pe fer.

E apre nou a kapab, sa i enn bann lapros ki nou pe pran, ki nou'n fini fer diskisyon avek zot. E lekòl *SIAH* i an kontak avek *IDC* pou kapab finaliz keksoz.

E nou ti a voudre ki nou ankadre dimoun byen e zot konpran sa bann kalite travay mannyer i ganny fer. E zot annan sa konfidans poudir zot kapab fer keksoz.

So Mr Speaker, *sorry* mon ti annan en ti lenformasyon *updated*. Depi 1999 dernyen aplikan ki pa ankor ganny later lo nou lalis, e ozordi kantite aplikan kot Minister Later i 213.

E nou napa, e nou annan mwens ki 50 kare later ki nou kapab servi la aktyelman. Ou vwar ki 3 kar pa pou gannyen en kare later. E i pou kontinyen reste koumsa si nou pa fer nou en bon sistenm pou nou triy nou bann dimoun byen. Mersi.

MR SPEAKER

Mersi Minis. Ser Manm, si ou pa'n ganny sans demann ou kestyon, mon leskiz. Konsole ki i annan 9 lezot osi ki pa'n kapab. I zis en kestyon letan, dezole.

Nou pou *pause* la e nou a rebran travay 4er edmi silvouple. Mon a dir Minis ek son delegasyon, mersi bokou

pou zot partisipasyon, bonn antre e bonn kontinyasyon, e bon kouraz dan sa travay enportan. Parey Minis in dekrir, pou met prodwir lo marse lokal. Mersi. Alor 4er edmi.

(BREAK)

MR SPEAKER

Byen nou a retourn dan Staz Lasanble pou nou kontinyen. E nou annan *Second Reading of Public Bill*. Madanm raporter ou ava apel Vis-Prezidan e son delegasyon silvouple, pou sa *item*.

Bon bonn apre midi Vis-Prezidan Ahmed Afif, ki'n zwenn nou pou *Access to Information (Amendment) Bill*.

E bonn apre midi e byenveni Mr Frank Ally *Attorney General* e Ms Thereza Dogley *Chief Executive Officer, Seychelles Information Commission*.

Nou a prosede, e mon ava envit Onorab *Leader Biznes Gouvernman*, pou prezant Mosyon pou *Second Reading*.

HON BERNARD GEORGES

Mersi Mr Speaker. Bonn apre midi Vis-Prezidan *Attorney General* e tou dimoun dan ou tim.

Mr Speaker anba *Order* 69(2) mon *move* ki *the Access to Information (Amendment) Bill* 2021 i ganny lir en Dezyenm Fwa. Mersi.

MR SPEAKER

Mersi. Mon a ganny en segonnman silvouple. Onorab Arissol.

HON SANDY ARISSOL

Mersi Mr Speaker. Vis-Prezidan avek ou delegasyon bonn apre midi. Mr Speaker Mosyon i ganny segonde. Mersi.

MR SPEAKER

Mersi. Vis-Prezidan, mon ava envit ou pou entrodwi sa *Bill*.

THE VICE-PRESIDENT AHMED AFIF

Mersi bokou Mr Speaker. Bonn apre midi Mr Speaker, *Leader Government Business*, tou bann Manm Lasanble e tou dimoun a lekout.

Sa Prozedlwa ki devan Lasanble, i annan pou bi aport en lamanman dan kondisyon, fonksyon Sef Komisyoner Lenformasyon, Komisyoner Lenformasyon e Sef Egzekitiv Komisyon Lenformasyon.

Lalwa Akse a Lenformasyon 2018, i en Lalwa pou ranfors latransparans e

rann kont dan servis e ladministrasyon piblik.

En eleman enportan sa Lalwa Akse a Lenformasyon, ki enn son fonksyon enportan se azir parey en *Appeal Board* pou bann antite piblik, an relasyon avek en demann ki ganny fer par en endividi, pou li ganny akse avek lenformasyon anba sa Lalwa.

Komisyon Lenformasyon i ganny formen par en Sef Komisyoner Lenformasyon e de Komisyoner Lenformasyon.

Komisyon i ganny administre par en Sef Egzekitiv. Se Prezidan Larepublik ki apwent Sef Komisyoner Lenformasyon e Komisyoner Lenformasyon.

Parmi bann kandida ki Lotorite Lapwentman Konstitisyonnèl (CAA) i propoz ek Prezidan Larepublik, an konsiltasyon ek Speaker Lasanble Nasyonal.

Ler nou pran Seksyon 45, Lalwa Akse a Lenformasyon, sa seksyon i etabli, ki pozisyon Sef Komisyoner Lenformasyon, bann lezot Komisyoner Lenformasyon avek Sef Egzekitiv Komisyon Lenformasyon, i pa ganny drwa, pandan zot term dan lofis okip, ouswa angaze dan nenport lot aktivite, profesyon, ou komers pou en bi finansyel, ou politik.

Se lopinyon Lotorite Lapwentman Konstitisyonnèl, (CAA), ki propoz avek Prezidan Larepublik bann kandida kalifye pou sa, bann lofis. Se zot lopinyon ki sa limitasyon, lo travay an deor sa lapwentman, i pa atrakte bann aplikan konpetan ki ti pou kapab konsider sa pozisyon.

Sa in vin pli evidan par egzanz kot nou ti annan en *vacancy*, dan pozisyon Sef Komisyoner Lenformasyon, kot personn pa'n montre lenter pou pran sa lofis, pou bann menm rezon ki mon'n detaye avan.

Sa Prozedlwa ki nou pe anmennen ozordi, propoz pou amann Seksyon 45, sa Lalwa zisteman pou retir sa restriksyon lo Sef Komisyoner Lenformasyon. Komisyoner Lenformasyon, pou pran travay an deor sa lofis dan sekter prive pou bi finansyel.

Parkont sa restriksyon lo travay dan servis piblik, oubyen avek en antite ki tonm anba ziridiksyon sa Lalwa, i reste.

Sa Prozedlwa i osi propoze ki Komisyon Lenformasyon, i pibliy dan Gazet Ofisyel, en lalis non, tou bann zofisyen lenformasyon ki ganny apwente par bann diferan lorganizasyon piblik ant le 01 Zanvyè e le 31

Desanm dan sa lannen presedan.

Sa se pou asire ki, i annan en lalis konplet. Tou zofisyen lenformasyon dan bann gran lorganizasyon piblik, ki nou kapab ganny akse avek lo sit web Gazet.

Vwala Mr Speaker, mon ti a alor demann Lasanble, pou vot an faver sa Prozedlwa. Mersi bokou.

MR SPEAKER

Mersi Vis-Prezidan. Nou a ouver lasal pou lentervansyon bann Manm lo deba lo sa *Bill*. Onorab Romain, i a komanse.

HON GEORGE ROMAIN

Mersi Mr Speaker. Bonzour *VP* avek ou delegasyon. Bonzour, bonn apre midi tou bann koleg Onorab.

Mr Speaker mon pou donn mon sipor pou sa lamannman lo sa *Bill*, akoz mon santi ki sa pe anmenn en amelyorasyon dan lafason ki nou fer keksoz dan sa pei.

Sa lamannman pou prezan, kapab donn sa bann zofisyen Gouvernman enkli zot *CEO*, zot Sef Komisyoner Lenformasyon bokou plis lespas, pou zot osi kapab petet angaz zot dan en lot aktivite ki kapab anmenn en benefis direk

pou zot. En keksoz ki zot pa kapab fer ozordi.

Mr Speaker Lalwa ozordi i restrikte sa bann zofisyè, pou angaz zot dan en lot aktivite menm si i napa nanryen pou fer avek zot louvraz prensipal. Me menm si i pa afekte zot louvraz ki zot pe fer ozordi.

Petet sa endividi, i annan en lot *skill* ki i kapab aplike. Me parkont Lalwa, pa donn li sa permisyon pou fer li, si i dan pozisyon tel ki *CEO* oubyen Sef Komisyoner Lenformasyon.

Mr Speaker, sa in dekouraz bokou bann endividi ki kalifye, pou kapab tenir sa bann pozisyon. Me ki'n ganny dekouraze, par sa bann restriksyon ki Lalwa i anmennen.

E alor sa Gouvernman *du jour* in vwar ki en fason pou amelyor efikasite, nou resours imen dan nou pei se pour nou retir ta bann tel restriksyon.

Mr Speaker, avek sa lamannman ozordi nou annan zis de restriksyon ler ou okip pozisyon tel koman *CEO*. Premyerman, se restriksyon pou tenir en pozisyon ofisyel dan en parti politik.

Me selman sa pa al kont ou drwa Konstitisyon, pou ou kapab asosye ou ek en parti politik, oubyen menm partisip

dan bann aktivite politik ki sa parti i organize.

Mr Speaker, e dezyenm restriksyon i demande ki si ou deside koman enn sa bann zofisyè tel koman en *CEO*, pou al angaz ou dan en lot aktivite an deor ou travay ofisyel. Sa aktivite ki ou pe al fer fodre pa afekte ou louvraz prensipal.

E osi napa okenn konfli lentere avek ou pozisyon an se moman. E alors Mr Speaker, sa lamannman ki devan nou ozordi, i en keksoz ki pou atir bokou plis dimoun, pou *apply* pou sa bann pozisyon dan lavenir, akoz i annan lespas loportinite ki egziste pou sa bann endividi.

Mr Speaker sa Gouvernman *LDS* ki o pouvwar ozordi, i enn ki proaktiv dan lafason ki fer keksoz. E alors mon pou donn mon sipor pou sa lamannman lo sa *Bill*. Mersi Mr Speaker.

MR SPEAKER

Mersi Onorab Romain. Bon napa okenn lot Manm pou entervenir. Onorab Henrie? Wi.

HON GERVAIS HENRIE

Mersi Mr Speaker. Bonn apre midi tou dimoun. An prensip mon krwar, sa lamannman ki devan nou i *straight forward*, e nou konpran. E i rapel mwan en

lot sityasyon dan sizyenm Lasanble ki nou ti annan.

Mon krwar i ti annan en keksoz pou fer avek *public officer ethics*, en zafer koumsa ki nou ti sanze li a trwa repriz. Avan i dir, i bezwen en dimoun ki ti annan, ti en Ziz, swa ti'n deza en Ziz. Personn pa vin devan, resanze fer kalifikasyon kontinyelman desann.

Donk, tanzantan dan Sesel nou ganny sa difikilte. E sa i annan en keksoz akoz enn, lentere piblik, ouswa de, kalite kalifikasyon dimoun ki la deor.

Donk okenn keksoz ki nou koman en Lasanble nou kapab fer nou, pou asire ki bann lenstitisyon i fonksyonnen, nou pou siporte. Ki nenport kote latab kot nou ti pou ete.

Me Mr Speaker, mon pa krwar. Mon krwar i en, mon pa pou kapab rat sa sans la ki Komisyon i devan nou. Zis pou mwan port latansyon, de keksoz.

Sa Komisyon ou a krwar konmsi i en pe tro trankil. I en pe, nou pa tann li, nou pa vwar li. Mon panse krwar i bezwen pran en rol en pe pli aktiv. Par egzanp letan mon pe get enn son bann keksoz ki i dwatet fer dan son *Act*.

I dir ek li i sipoze, pe promouvwar *awareness* avek ledikasyon otour size akse

lenformasyon. E i bezwen travay avek bann *stakeholders* ki swa bann *MDAs*, ki swa bann *NGOs*. E koumsa nou kapab mobiliz piblik Seselwa pou *claim* sa *right*. Pou demann lenformasyon.

Akoz souvandfwa nou'n vwar poudir, i annan en mank lenformasyon. E sa i kapab kree rimer, bann dimoun prezan ki bann swadizan malen dan lasosyete, i kapab zis met en bann nide dan latet dimoun, fer zot desann avek en bann plakar kot Lorloz, e zis dir nenport kwa.

E so mon pe demann sa Komisyon pou pran en rol aktiv, dir avek Seselwa i annan sa fasilite la. Servi li, e zot menm bezwen osi, mon krwar dan zot *Act* Lartik 70, i annan zot Rapor Anyel ki sipoze donn avek Minis Finans. Apre Minis Finans i anmenn kot Lasanble. So pou nou vwar ki zot pe fer.

E mon pe menm get zot *website*, bann lenformasyon ki mon krwar ti merit lo la, par egzanp zot *annual report*, unless mon pe mal gete. Par egzanp dan paz *downloads*, napa nanryen. Mon krwar i ti merit la.

Donk zot menm zot ki sipoze pe *provide access to information*, zot bezwen en pe pli aktiv. So mon pou siport zot,

e *from now on*, nou pou gard en lizye lo zot akoz sirtou, sirtou Bidze pe vini. Nou'n donn zot en Bidze, anyelman pou zot fer zot travay.

E mon pa ekspekte *anything less than maximum* performans *from the Commission*. Mersi Mr Speaker.

MR SPEAKER

Mersi Onorab. Onorab Georges.

HON BERNARD GEORGES

Mr Speaker, mon'n napa nanryen poudir lo sa *Bill* tou sa ki devret ganny dir, in ganny dir.

Mon ti a kontan zis pran laparol, pou mwan rekonnet ansyen *Chief Information Officer* Mr John Richardson, ki nepli avek nou. E ki ti sa enn dimoun ki ti vin devan ler okenn lezot dimoun pa ti, pa ti anvi oubyen pa ti kapab vin devan akoz sa restriksyon lo lanplwa an deor sa *job*.

E in fer en travay remarkab, pandan son kourt letan. E in etabli mon krwar en bon fondasyon pou sa enn ki pou vin apre li.

Mon ti kontan zis ozordi an piblik, rekonnet son kontribisyon e remersye li pour sa. Mersi Mr Speaker.

MR SPEAKER

Mersi. Bon, be avek sa nou'n fer deba lo sa *Bill*, e mon ava envit *VP* pou fer son repons.

THE VICE-PRESIDENT AHMED AFIF

Mersi bokou Mr Speaker. Mr Speaker i paret ki bann Manm i satisfè avek leksplikasyon ki nou'n donner, pour sa amannman ki la devan nou.

An bref nou pa pe ganny dimoun pou pran sa trwa pozisyon, sa de Komisioner e sa *Chair*. E se senpleman, akoz nou pe dir ek zot pou zot travay ki probableman zot rankontre enn fwa par mwan, oubyen enn fwa tou lede mwan.

Zot bezwen zis fer sa loubraz, zot pa annan drwa annan en lot loubraz. E ou pa pou ganny dimoun pou travay, pou en, pou 2 zour dan en mwan oubyen 3 zour dan en mwan i pa annan drwa fer lezot keksoz.

Alor sa, nou pe tir sa restriksyon. E sa i permet zot kapab, kapab ganny sa lezot dimoun ki dan lanplwa, ki pare pou donn en koudmen, pou zot vin devan.

An sa ki konsern *CEO*, parey Onorab Romain in fer sorti. *CEO* li si i santi ki i kapab fer en lot loubraz an deor. I swiv *Public Service Order*.

E si nenport ki louvraz, parey nenport ki travayer Gouvernman, ki anvi fer en travay an deor. Swa aktivman oubyen, pa aktivman, mon mazine plito dan en rol pasiv. Zot kapab demann permisyon, e si pa konfli i napa en konfli ek zot travay sa osi i permete.

Vreman se bann pti azisteman, pou nou ganny dimoun apropiye, dan bann plas apropiye pou zot kapab fer sa travay.

Mon osi profit sa lokazyon pou rann omaz avek msye - parey Onorab Georges in dir Mr Richardson - ki'n fer sa premye travay pou met detrwa blok fondasyon dan sa lorganizasyon.

E mon krwar avek son CEO ki i la, zot pou fer en travay formidab pou fer sir ki sa Lalwa, i la pou donn tou Seselwa akse avek lenformasyon, lenformasyon ki korek.

E si zot pa satisfè, byensir zot kapab fer en *appeal* e al zisteman kot sa Komisyon, ki pou regarde pou fer sir pour ki Gouvernman i reste touzour transparan. E lenformasyon i toultan ariv a la porte piblik.

Alor avek sa mon ti a kontan remersi ou Mr Speaker, pou donn nou sa pti moman pou nou pas sa *Bill* ki kourt, me

selman i enportan. Mersi bokou.

MR SPEAKER

Mersi Vis-Prezidan. Bon nou a pran vot lo merit zeneral sa *Bill*. Manm ki an faver lev lanmen silvouple. Mersi. Okenn Manm ki kont? Mersi Madanm Clerk. Alor vot lo *general merit of the Access to Information (Amendment) Bill 2021*. 25 Manm in vot pour, 0 kont e 3 abstansyon. *Bill* in aprouve par Lasanble.

Madanm Clerk mon a envit ou fer *Formal Second Reading*.

MADAM CLERK

Mersi Mr Speaker. *A Bill for an Act to amend the Access to Information Act, 2018*. Mersi Mr Speaker.

MR SPEAKER

Mersi Madanm Clerk. Dan mon versyon mon pa vwar okenn amannman. Eski *Bills Committee* napa? Eski okenn Manm i le lev amannman? Dan sa ka nou pou skip Staz Komite.

E Onorab Georges nou bezwen en Mosyon pou sa mon krwar?

HON BERNARD GEORGES

Wi, non! Zis *Third Reading*.

MR SPEAKER

Nou pas direk lo *Third Reading*, nou pa bezwen Mosyon pou *Third Reading*? Tre byen.

HON BERNARD GEORGES

We need a Motion? Non! Sorry. Eskiz mwan Mr Speaker, wi annefe ...

MR SPEAKER

Mon krwar pou *skip* Komite.

HON BERNARD GEORGES

Wi nou bezwen sispann. Wi pou sot Staz Komite.

Yes, Mr Speaker anba *Order 97(1)* mon *move* pou sispann *Order 70* a *75* pou sot Staz Komite. Mersi.

MR SPEAKER

Mersi. Mon a ganny en segonde. Onorab Arissol.

HON SANDY ARISSOL

Mr Speaker mon ti a kontan segonn Mosyon, anmennen par Onorab Georges pou nou sot Staz Komite.

E nou pe dir gran mersi Onorab Pillay, pa la sanzan nou ti pou bezwen antre dan Staz Komite. Mersi.

MR SPEAKER

Mersi. Nou ale. Manm ki an faver sa Mosyon lev lanmen

silvouple. Ok Madanm Clerk, okenn Manm ki kont?

Mosyon pou *skip Committee Stage lo Access to Information (Amendment) Bill 2021*. 23 manm in vot pour, 0 kont e 5 abstansyon.

Alor nou dakor pou *skip* Komite e mon ava envit *Leader Biznes Gouvernman* pour anmenn Mosyon pou *Third Reading*.

HON BERNARD GEORGES

Mersi Mr Speaker. Mr Speaker anba *Order 76(1)* mon *move* ki *Access to Information (Amendment) Bill, 2021* i ganny lir en Trwazyenm Fwa.

E apre ki in ganny segonde, mon ti a kontan dir de mo silvouple. Mersi.

MR SPEAKER

Byen. Nou a ganny en *secondment*. Onorab Henrie.

HON GERVAIS HENRIE

Motion for Third Reading is seconded Mr Speaker. Mersi.

MR SPEAKER

Wi, ou pou adres nou avan nou pran vot *LGB*?

HON BERNARD GEORGES

Wi Mr, Mr Speaker. Anba sa menm *Order 76*, i kapab annan

minor amendments ki ganny fer at *Third Reading Stage*.

E apre ki nou ti'n sot Staz Komite, mon'n realize ki i annan en virgil ki manke dan *Clause 1*.

Alor avek, si, si *panel* i dakor dan trwazyenm laliny apre mo '*which*', mon propoze ki nou *insert* en '*comma*'. *Which, 'comma' as amended, 'comma' is herein after referred to as the "principal Act"*.

MR SPEAKER

Ok avek *panel*? Tre byen. Nou a prezan pas lo vot lo *Third Reading*. Manm ki an faver lev lanmen. Silvouple. Mersi okenn Manm ki kont?

Mersi Madanm Clerk. Vot lo *Formal Third Reading Access to Information (Amendment) Bill, 2021*. 24 Manm in vot pour, 0 kont e 4 abstansyon. Donk sa *Bill* in aprouve par Lasanble.

Mon a remersye tou bann Manm. Madanm Clerk i a fer *Third Reading*. Please.

MADAM CLERK

Mersi Mr Speaker. *This Act may be cited as the Access to Information (Amendment) Act, 2021, and shall be read and construed as one with the Access to Information Act, 2021, which as amended, is hereinafter referred to as the*

"principal Act" Mersi Mr Speaker.

MR SPEAKER

Mersi Madanm Clerk. *Bill is passed*. VP avek ou delegasyon, mersi pou zot partisipasyon.

E mersi bann Manm pou zot travay ozordi. Nou ava *adjourn* la. E nou a rebran travay demen *matin 9er*. *Adjourn*.

(ADJOURNMENT)